


豐鎮廳志



新纂豐鎮廳志序

今邑志古國史也周官外史掌四方之志小史掌邦國之志訓方氏掌道四方之政事與其上下之志古之志皆以史領之而志又通謂之史春秋時列國各有史晉之乘楚之檮杌魯之春秋皆史也嬴劉以來著錄蔚起漢太史司馬子長史記一書本紀世家列傳年表百三十篇地志闕如至扶風班氏漢書始作地理志言成帝時劉向略言其地分丞相張禹使屬潁川朱贛條其風俗猶未全究唐李延壽南北二史偶闕未備司馬溫公撰資治通鑑猶以不作志書為憾謂使數

代制度因革皆沒不見是志以佐史相為表裏不可不詳且覈也審矣第記載貴能得實而立言期於有用漢地理風俗記遠莫能詳唐元和郡縣志今為最古其博采人物名勝古蹟題詠則有樂史太平寰宇之富且賅列軍州赤畿戶口山川則有王存元豐九域之精而核他如吳郡新安雍錄齋乘各記方隅咸號善本可與正史並傳然遙遙在昔落落數人宜於古者未必盡信於今蓋志之體昉於史志之義準於經言天文則屬易言政事則屬書言民風土俗則屬詩禮其間筆削褒貶則皆本之春秋以史筆而兼經術纂述大非易事

是以志叅史體志猶史也其不同者史記天下之事志止一隅非境內不錄史識一朝之事志自建邑至今在封內例皆得書建置沿革具焉星象機祥著焉關山道里土風物產備焉食貨兵防祠祀陵墓寓焉文人賢媛技藝仙釋列焉利病存於是得失見於是勸懲亦寄於是無志可稽則興革變通之故將無所考山川毓靈忠孝節義與夫蓄道德而能文章者久亦同於榛蕪之湮沒何由徵文獻而成民俗故其為文繁則蕪簡則陋龔公家言則鄒鄒不親難於體裁之各當而自昔稱名作者咸推康對山之志武功以其語無溢美事歸得實而褒誅褒鉞悉祖麟經遺意洵有切世教之文不可多得也豐鎮遠處塞北其地雄博廓乎無垠自秦迄明戎馬戰爭殆無虛日勝國猶為荒服我

聖朝肇造區夏中外一家開疆拓土窮邊絕域共隸版圖凡蒙古外藩諸部君長莫不受吏編名臣僕是効以故士無事於秋防農相安於夏耨食

帝力而享太平不知有烽燧之警何其休歟顧天下郡縣皆有志而廳獨闕焉無志薄材同檣櫓賴諸紳士執筆墨以從事發

凡起例蒐羅軼典採輯新編上自漢魏以迄昭代學士大夫之流風逸韻故家遺俗下逮閭門里巷匹夫匹婦凡有彰風教而式民行者爬梳抉剔折衷於史法而進退之閱五旬而歲事以成一邑完書嗟呼設廳至今二百餘年矣孰不謂邊塞荒涼詎可語於文章勲節也哉茲全書告成於建置沿革見古今之興廢於山川疆域見形勢之阨要於人物吏治見民風之蒸蒸日上賦役之不繁見國家輕徭薄斂於風俗之茂美見

聲教漸被誕敷且於兵防鋪遞營伍堡寨之設向之列屯衛者
今皆設為城邑向之謂邊陲者今皆視為腹地又以見我
列聖相承

德化涵濡中外禔福直駕唐虞三代而上之然則是書之成庶
足以信今而傳後豈扶輿磅礴之氣鬱之又久革而顯於今
日歟抑造物有待而然歟而亦何幸歟莊子曰迹者履之所
自出如必履舊迹而斤斤然銖兩尺寸以求合安知異日者
聲明文物不尤勝於今日乎今所為志草創焉耳志也云乎
哉若夫加以潤色則尚有待是為序

光緒七年歲次辛巳秋九月豐鎮理事同知德溥撰

豐鎮廳新志凡例二十則

一凡志之作本周禮職方小史太史所掌所以傳信愚按
山西省志式遵一統志廳隸大同府而府隸山西則志
當惟省是式蓋省志古晉乘之遺出自董狐司馬氏筆
為後世志史鼻祖其義正其文簡而不俚今志取以為
楷因舊章也

一分星畫野辨疆正域不有圖考何以審形勢察稷祥為
制馭敬時之計故繪以圖而詳其說便觀覽資修省也
一八景名色本於瀟湘天下志書倣倣舊志新為增入俾

閱者知荒服之地有名勝也

一星野沿革巡幸雜志府志恭詳今悉錄舊良以豐鎮文
獻不足無從考核不敢穿鑿附會誤後人貽笑柄也

一疆域城池疊次開拓以今視昔大相逕庭至若風土物
產府志概從簡略是編記載詳明紀實蹟也

一山川古蹟舊志皆摭拾成文今略為節訂存之於前復
稽山海經水經注一統志證據確鑿更加增考於後俾
閱者參互釐正以決疑信

一大同為秦雲中郡唐置雲州雲中郡五代因之石晉天

福元年割入契丹改曰雲中縣趙宋宣和五年來歸改曰雲中府明宣德元年築雲川城於豐州西南後徙於大同城內於是豐勝之間為古雲中豐鎮為新雲中最易混淆故人物事蹟必與豐鎮有證實者方採入志中不敢濫收

一威甯海威甯口在今甯遠廳境內拒門堡之間茲不載入廳志至古長城白道泉飲馬長城窟辨疑詳古蹟不敢牽混示區別也

一境內居民雜處有漢旗蒙回洋諸名近草地者罔知禮教往往因飲博社席小忿尋讐起釁釀成巨案第志與史異史乃據事直書善惡並著志則意存彰善以樹風聲是編不載非隱諱也遵體例也

一學校以育人材廟祠以崇祀典而文廟昭忠名宦鄉賢節孝等祠及學署書院至今均未建設故姑闕之雖他祠宇紀載頗多然寺觀有之淫祠不與至若義學亦名存實亡故與壇壝義塚養濟院並附營建之末以存朔鎮之禮

一分門別類稱詳也詳則用之以約故各以名義所近者

附於列表而不復細分卷帙以相凌錯省繁文惜物力也

一稽核不厭精詳也謂之實錄信者必傳疑者闕焉不欲以疑傳疑受疑於世者還以疑世也所以崇志體示信史也

一志之作也表忠孝之幽光振將來之風化凡善可錄行可述有關於世教者雖在編氓必傳其真其無關風教者雖在貴胄不溢其美存公道示不阿也

一豐鎮在輿記乃九邊外地魏遼金元故土自漢迄明久為戎馬蹂躪入寇出沒之區故凡一切兵制鋪遞驛站必詳載之俾知邊陲要地謹防禦修武備也

一職官設自雍正初年建立城垣則自乾隆二年始或歸直隸張理廳管轄或陽高大朔理事通判移駐管理或豐川鎮甯武職兼理以征收賦稅而已後并衛所為一官改為廳凡新平平遠邊外皆隸焉至登記事蹟考之國朝居多故志之使知沿革所由也

一省志有雜著災祥幻異雜事今新增入俾司民者知所恐懼惕勵也

一新增節烈孝友仙釋技藝諸志雖只二三條而志類所
不可少者姑為備體以俟後來補入

一藝文收錄不敢太繁惟招壑收厥廟塚碑記於政教然
有關係者始為載入其他遊山玩景之篇概不濫收

一府志詩賦載百有餘首而合選者不過十七八首姑存
之以備體例近作無取濫入然勝境未經登記者其題
詠亦不可少故附錄於後識者諒之勿謂效顰也

一豐鎮素無志今初立焉雖舊載府志之末頗有錄本而
所記事蹟僅什一於千百即此外細加採訪然猶有世遠

闕

湮而無考者有地勢隔闕而未聞者耳目所及難免脫
漏君子不得以鹵莽譏焉止竭心力草創規模以俟後
人修飾潤色云

豐鎮廳志

卷首

序文

凡例

目錄

街名

圖考

星野

星圖

占候

躔度

考證

氣候

卷一

沿革

地表

疆域

道路

村莊

卷二

山川

水利

形勝

古蹟

塚墓

景致

營建

城池

祠祀

寺廟

壇壝

公署

倉儲

庫藏

橋梁

街坊

義學

教法

卷四

義塚
養濟院

巡幸

封爵

職官

選舉

卷五

兵防

武事

田賦

鋪遞
驛站
稅課附內

卷六

倉庫

戶口

風土

士習
婚禮

物產

農事
喪禮

災祥

工作
祭禮

幻異

商賈
節序

卷七

人物

冠禮

孝子

孝婦

卷八

節婦

技藝

仙釋

藝文

上

奏疏

書啟

紀畧

碑記

附述作


藝文



下

古近體詩

補附今詩







豐鎮廳新志

纂修姓氏

纂輯

在任候補知府蒙民理事同知 德溥時泉 正黃旗人

分纂

壬子科舉人 麻麗五蓬生 崞縣人

定襄縣學附生 王楨垣翰 原籍定襄縣人

大同縣學廩生 張鳳翔覽子 原籍大同縣人

忻州學增生 范大元伯掄 原籍忻州人

理局

例貢生 溫廣深泉資 壽陽縣人

布政使理問 閻世隆鼎臣 原籍直隸懷安縣人

太學生候選縣丞 史文郁 原籍大同縣人

議敘五品軍功馬龍圖大同縣人

候補州吏目李承鄴卷山東萊州府人

騰錄

業 儒 杜元仁益忻州人

業 儒 趙啟昌臣邑人

業 儒 吳承周 邑人

業 儒 郭鍾文達邑人

業 儒 趙鼎世陽高縣人

較正

介 賓 王 霑澤

參閱

議敘六品軍功趙傑漢

吏 員 張師孔

邑 業 儒 吳宗周讓

業 儒 張綸言

採訪

布政使經歷 薛兆齡承

圖考

周禮職方氏掌天下之圖以辨九州之國周書周公營洛俾
來獻圖漢書張良借箸指畫地形東坡蘇氏指掌圖序云蘇
秦按此以說諸侯而知六國形勢之所在蕭何本此以相高
祖而知天下阨塞之所關聚米為山馬援以度隗囂建樓籌
邊德裕以服南詔藩鎮強梁於河北而險要詳於吉甫先零
跋扈於隴西而地形上於充國歷考載籍輿圖不綦重哉是
知在天成象在地成形厥形與象非志無由傳非圖莫可考
故上而星辰下而城邑與夫山川名勝一披圖而瞭如指掌


也我

朝德威遠播拓地萬里旃裘毳幕基布北庭咸內附為外藩固
已中外一家蕩蕩平平增其式廓矣豐鎮雖最爾彈丸僻陋
邊陲然規形度勢不有繪圖何能炳若日星茲於分星畫野
後先稽經注考正山水次疆域次城池次公署而八景附入
一一圖而志之俾言風雅者便觀覽焉

唐李氏素諳天文撰法象志據漢十二次度數以唐州縣配之其分配躔次率多謬譌宋容齋洪氏譏其蔽於天而不知地良以茫茫堪輿俯仰無垠郡縣所入宿度揆諸古數烏能悉準可見分星辨野非易事也大同為趙北鄙昔人上應星次下畫山河列宿分躔區別九州皆以昂畢為趙分豐鎮隸大同得冀并代雲地自當以昂畢為分野第幅員廣狹古今不同其星分度數不可執蠡測管窺之見失之穿鑿附會焉然舍星躔於不論則泛而無紀故博採史志於占候躔度引

云
用考證皆接拾舊聞不敢稍參臆說並繪列星圖遵照舊志

昂畢二宿圖



占候

昴十一度下為日月中道天之耳目也主西方主獄事又為旄頭甘氏云主口舌奏對若明大則君無佞臣天下安和張衡云昴明則獄訟平天阿一星在胃東月一星在昴東皆黑星又曰天阿主察山林妖變天陰五星在畢柄西主從天子弋獵之臣天苑十六星在昴畢南如環狀天子之苑囿養禽獸之所也主馬牛羊明則馬牛羊盈芻藁六星在苑西以供牛馬之食也一曰天積天子之藏府也星盛則歲豐穰卷舌六星在昴北天讒之外主口語以知讒佞張衡云主樞機曲而靜則賢人用天讒

一星在卷舌中主醫巫占與從官同礪石四星在五車北主磨礪鋒刃

晉志天阿卷舌天讒俱屬天市垣天苑在二十八宿之外芻藁天陰月礪石晉志不載隋史有之武密又以芻藁屬胃卷舌屬胃又屬昴乾象新書以芻藁屬婁卷舌西三星屬胃東三星屬昴天苑西八星屬胃南八星屬昴步天歌以上諸星皆屬昴宿

躔度

昴七星距西南星去極七十度天阿一星去極六十六度入胃

占候

畢十七度主刀兵主弋獵其大星曰天高一曰邊將星明大則
遠人來貢天下安甘氏云畢主街巷陰雨天之雨師也明而定
則天下安張衡云畢為天馬昂畢間二星曰天街三光之道也
主伺候關梁又云主國界附耳一星在畢下天高東南隅主聽
得失伺愆邪察不祥天節八星在畢南主使臣之所持也宣威
德於四方明則吉諸王六星在五車南天漢之中主宗社藩屏
王室也明則諸侯奉上天下安天高四星在參旗西北近畢比
臺榭之高主遠望氣象五車五星三柱九星共十四星在畢東

北五車主天子五兵張衡云天子兵車舍也西北曰天庫主太
白秦也次東北星曰天獄主辰星燕趙也次東南星曰天倉主
歲星衛魯也中央星曰司空主鎮星楚也次西南星曰卿主熒
惑魏也五星有變各以其所主占之三柱一曰三泉一曰休一
曰旗五星均明柱皆具即人倉廩實五車三柱有變各以其國
占之天潢五星在五車中主河梁濟渡之處也咸池三星在五
車中天潢南魚圍也天關一星在五車南畢西北亦曰天門日
月五星所行之道也主邊塞事主關閉參旗九星在參西五車
之間天旗也明而稀則邊方不動一曰天弓主弓弩之張候變

禦難玉井西南九星曰九旂天子之旗也主邊軍進退天苑之南十三星曰天園植果菜之所也曲而鈎則果菜熟

步天歌以天節九州殊口附耳天高五車三柱天潢咸池天關天園諸星皆屬畢宿武密書以天節屬昴參旗天關五車三柱俱屬觜乾象新書以天節參旗皆屬畢天園西八星屬昴東五星亦屬畢五車北西南三大星屬畢東二星及三柱屬參

躔度

畢八星距右股第一星去極七十五度天街二星距南星去極七十一度入昴宿十度附耳一星去極七十七度入畢宿三度天節八星距北星去極八十度半入畢宿三度諸王六星距西星去極七十度入畢宿三度天高四星距東星去極七十四度半入畢宿六度五車五星三柱九星距大星去極四十七度半入畢宿八度半天潢五星距西北星去極五十八度入畢宿十一度咸池三星距南星去極五十一度入畢宿十一度半天關一星去極七十一度半入觜宿初度參旗九星距南第一星大星去極八十七度入畢宿六度九旂九星距南星去極一百一十三度入畢宿十二度天園十三星距東北星去極一百二十

四度入畢宿五度

考證

周禮保章氏以星土辨九州之地鄭注昴畢冀州也

春秋元命苞畢散為冀州分為趙國立為恒山宋均注恒山昴畢之精

史記天官書昴畢冀州昴曰旄頭畢曰罕車昴畢間為天街其陰陰國其陽陽國正義曰昴畢為大梁之次

漢天文志昴畢冀州又曰占於街北昴主之占於街南畢主之地理志趙地昴畢之分野定襄雲中皆趙分也

後漢書馬融傳畢為兵患至於分野并州是也

晉天文志昴畢趙冀州恒山入昴五度

隋地理志自胃七度至畢十一度為大梁屬冀州

唐天文志胃昴畢大梁也胃得馬牧之氣與冀之北土同占初胃四度餘二千五百四十九秒入太中昴六度終畢九度自

魏郡濁漳之北得全趙之分又北逾衆山盡代郡雁門雲中定襄之地與北方之國北紀之東陽表襄山河以蕃屏中國為畢分循北河之表西盡塞垣皆髦頭故地為昴分冀之北土馬牧之所蕃庶故天苑之象存焉地理志代雲朔蔚等州

為大梁分

金歷志胃四度二十四分三十三秒外入趙分大梁之次

明天文志胃四度至畢六度大梁之次也山西布政司所屬之大同府應朔渾源蔚四州皆昴畢分

帝王世紀自胃至畢十一度曰大梁之次於辰在酉謂之作噩於律為姑洗斗建在辰今趙分野

月令章句注胃一度至畢六度為清明穀兩大梁趙分

容齋隨筆十二國分野上屬二十八宿其甚不可曉者莫如晉天文志雍州為秦其下乃列雲中雁門定襄代郡蓋自屬并

州及幽州耳

明一統志大同府禹貢冀州之域虞周屬并州天文昴畢分野圖書編大同昴畢分野

按昴七星曰髦頭畢曰罕車為邊兵爾雅曰濁謂之畢孫炎曰掩兔之畢或呼為濁因以名星蘇竟曰畢為天網昴畢同宮曰大梁之次於州為冀蓋趙之分也大同為趙之北郡在天街之南是為陽國

山西通志昴畢大梁之次於辰在酉於周為冀趙之分也而胃宿附入焉史記曰昴畢冀州晉天文志曰自胃七度至畢十

一度為大梁趙分野唐天文志曰胃昴畢大梁也初胃四度餘二千五百四十九秒入太中昴十度終畢六度天原發微曰胃七至畢十一辰酉曰作噩律始洗斗辰趙分費直周易分野曰起婁十度蔡邕月令章句曰起胃一度金史曰胃四度二十四分三十三秒外入趙分大梁之次雖度數起終稍有不同而大梁之為趙其占為昴畢則無不同也

以上分野俱主昴畢言又有屬之五星者有主之北斗者有占之天市垣及女分國星者並附其說於後

辰主恒山冀州幽州并州大梁以負北海其神主於恒山辰星

位焉

玉衡第八星主幽州常以五寅日候之庚寅為代郡第九星主并州常以五申日候之甲申為雁門丙申為雲中戊申為定襄

天市垣二十二星在房心東北東西列各十一星其東垣南第一星曰宋第二星曰南海第三星曰燕第四星曰東海第五星曰徐第六星曰吳越第七星曰齊第八星曰中山第九星曰九河第十星曰趙第十一星曰魏

須女下十二諸侯國有十六星齊一星在九坎之東齊北二星

曰趙趙北一星曰鄭鄭北一星曰越越東二星曰周周東南
北列二星曰秦秦南二星曰代代西一星曰晉晉北一星曰
韓韓北一星曰魏魏西一星曰楚楚南一星曰燕其星有變
各以其國占之

中台下星主冀招搖一星天鋒一星梗河三星天壘十二星並
主北邊

按州郡所入宿度史漢皆不道晉書始本陳卓之說著之
天文志雍州為秦其下乃列雲中定襄雁門代郡謂入東
井分容齋洪氏已指其謬固不待辨漢地理志雲中定襄

屬趙為昴畢分代郡雁門別屬燕為尾箕分則當兼占尾
箕矣趙本晉地參為晉星則又當占參自胃至畢為大梁
分則又當兼占胃考史記趙襄子北登夏屋而併代武靈
王破林人樓煩盡有其地故蘇秦曰趙西有常山北有燕
國是燕地之入於趙者不獨葛武陽平舒也亦猶上黨本
韓之別都遠韓近趙卒降趙皆趙分也晉語實沈之墟晉
人是居參星主晉是矣第三晉地最廣不可限以今之山
西也且趙分晉得三之一而大同又僅趙之北邊近髦頭
故地圖書編曰山西諸郡三冀參四參井惟大同為昴畢

宋天文志參星十度右足入畢十三度勢本鈎連故白登之圍月暈參畢自當以昴畢為主而參附入焉唐志胃得馬牧之氣與冀之北土同占曰同占者亦附入之義未嘗指衆山以北之地為胃分也又嘗疑昴畢同宮而昴主塞外則宜專占畢矣按東漢建武十三年正月彗星見於昴十一月盧芳入居高柳為代之屬邑當在今府東北陽高豐鎮之界晉太元中大黃星出昴畢占白當有真人起於燕代間是為北魏太祖皇始元年越一年自雲中徙都平城於漢為雁門郡屬卽今府所治也董子曰善言天者必

有驗於人大同之占昴畢庶幾近之然歷代州郡屢更歲差又不能盡合也星之於土以精氣相屬而不係乎方隅占測以山河為限而不主乎州國此唐一行山河兩戒雲漢升降之論為不可廢矣

氣候

土高地瘠天寒霜早三春無花四季少暖夏始布穀秋初刈麥種既難早收又恐遲

沿革

粵自十二州肇於舜九州定於禹商周不改九州之制而爾雅所載商制也有幽營而無青梁職方所掌周制也有幽并而無徐梁變更亦云屢矣秦并天下分為三十六郡漢復分為十三州由晉及明置郡置鎮置路置軍歷代沿革因時更易士生千百年後必欲舊名舊壤無不核實誠夏夏乎其難之然而改邑不改井山川萬古如斯也豐鎮古為新雲中國朝始設衛所隸府治乾隆間併衛所更今名茲編於前代因革興廢詳考史書地志敘厥原委仰見我

朝聲教漸被無遠弗屆分疆定界所為損益乎古制者盡美盡善云

地表

統隸

分屬

縣名

唐 冀州
虞 并州
夏 冀州
商 冀州
周 并州

代國
代國

秦

趙國

鴈門郡

雲中郡

代郡

漢

并州

鴈門郡

雲中郡

定襄郡

成樂

武進

高柳馬城

延陵參合

且如東安陽

東漢

并州

鴈門郡

代郡

代國

魏晉

并州

鴈門郡

幽州

代郡

高柳

馬城

東安陽

雲中郡

成樂

武進

幽州

代郡

北魏

恒州 司州代都

代郡

梁城郡

參合

高柳郡

安陽

高柳

北靈邱郡

北齊 北恒州

撫冥鎮 柔元鎮

北周 北朔州

隋 定襄郡

唐 河東道 雲州雲中郡

關內道 單于都護府

後唐 雲州大同軍

遼 西京道 大同府 宣德

宋 雲中府路 雲中府

金 西京路 大同府 宣甯

撫州 柔遠 豐利 威甯

元 河東山西道 大同路

興和路 寶昌州 威甯

明 山西布政司行都 大同府

國朝 山西布政司 大同府 豐鎮廳

豐鎮廳府城北一百里

漢代郡且如馬城高柳縣地定襄郡成樂武進縣地 按漢書

且如縣有于延水武進縣有白渠水水經注于延水逕且如

縣故城南又東南逕馬城縣故城北今名東洋河源出天鎮

邊外金史太宗子果傳天輔五年復取西京果率大軍趨白水
水滌疑卽古白渠水也漢定襄郡治盛樂省志云卽元魏北
都遼金元之豐州當在今歸化城左右及考金志大同縣有盛
樂城不言在豐州竊意大同之盛樂城北魏始祖所遷穆帝
所居道武登國元年所幸所謂定襄之盛樂者乃西漢故縣
而昭成所都道武登國十年所幸所謂雲中盛樂宮者卽永
興中置盛樂郡地在今歸化城界距豐鎮尚遠魏天賜三年
北巡材山宮遂登定襄角史山又幸馬城是時已都平城車
駕循京北而西而東正在今豐鎮界內又今陽高縣開山口

迤北為古高柳塞近漢高柳縣地故魏書道武紀云屯于延
水南出代谷會賀麟於高柳地本連屬以今地界覈之馬城
在天鎮邊外高柳在陽高邊外成樂武進在大同邊外且如
在正黃旗察哈爾南界然不可盡考矣

東漢且如縣省成樂武進改屬雲中高柳馬城仍屬代見漢

書郡國志

北魏梁城高柳郡地屬恒州北境又北為柔元撫冥二鎮魏
書地形志梁城郡領參合桓鴻二縣高柳郡領安陽高柳二
縣按水經注如渾水出涼城疑卽梁城旋鴻疑卽縣今府城東北

八十里有如渾水源出塞外葫蘆海高柳二漢屬代郡說見後高柳故城附近有參合陂一統志柔元故鎮在天鎮縣東北邊牆外按魏書孝文紀太和十八年幸柔元鎮通鑑注曰柔元鎮在漢且如縣西北塞外其西卽撫冥鎮今考其地應在豐鎮境暨正黃旗察哈爾之間又西則為懷朔鎮非豐鎮界

唐置單于大都護府 唐書地理志本雲中都護府龍朔三年置麟德元年更名尹耕曰單于都護府置在雲中而永醕間復徙瀚海都護府於雲中為雲中都護府是雲中有兩都護

府也或曰瀚海所徙史文曰古雲中單于府所置但曰雲中是其時有新舊兩城明一統志亦言新雲中在今大同府北郭外古雲中在豐勝之間相去四百餘里按此則豐鎮當為新雲中地

遼大同天成長青三縣北境兼有德州撫州地 遼史地理志

德州領宣德縣本西德店地開泰八年置在今甯遠界撫州今張家口西界遼秦國大長公主建見金史地理志豐鎮西鄰甯遠東接張家口南屏大同陽高天鎮皆遼西京北境也金撫州西境大同宣甯二縣東北境 金史地理志撫州鎮甯

軍明昌三年置承安二年升為節鎮領柔遠集甯豐利威甯
四縣按柔遠縣有雙山鴛鴦濼得勝口明史大同北有威甯
海子興和所西有集甯路雲州堡西北有鴛鴦泊威甯口在陽
高西北七十里得勝口在大同北八十里雙山在天鎮縣東
北六十餘里新平邊外皆豐鎮境意豐川衛即豐利故縣鎮
甯所亦昉於鎮甯軍也又按金志宣甯縣即遼宣德縣有彌
陀山在今大同西北九十里拒牆堡北東西袤百里北連口
外

元高原威甯二縣寶昌一州屬興和路 元史興和路金撫州

屬西京元中統三年以郡為內輔升隆興路後更名見地理
志太祖七年南伐取豐利等縣寶昌桓撫等州見太祖紀按
恒州在上都西又西為興和路又西北為寶昌州以今邊界
考之獨石口外為上都其西為桓州張家口之西豐鎮之東
為撫州而寶昌則在察哈爾南界也又按興和路領高原懷
安天成威甯四縣天成即天鎮縣廳在天鎮西北邊外當為
興和路西北境又西則為大同路之東北境

明初屬興和守禦千戶所後廢 明史地理志興和所洪武三
十年置永樂二十年徙治宣府衛城而所地遂虛宣德衛洪

武二十六年置後廢按興和所卽元興和路西有集甯路西
北有寶昌州又有高原縣洪武中並廢所謂大同興和塞外
諸郡已廢為邱墟明初僅置衛所正統間英宗北狩時諸衛
所什伍虛耗盡皆徙置其後大同陽和天城各邊皆為邊衛
至嘉靖間叛人邱富等居豐州築城自衛號曰板升宣甯卽
宣德衛在今豐鎮甯遠間而甯遠為多

國朝初係蒙古察哈爾正黃正紅旗遊牧地其南毗連民地者
為太僕寺牧廠雍正三年以地土間曠招民墾種歸直隸宣
化府張家口理事同知管理十三年經大同鎮總兵李如栢

奏山西口外多有產礦山場聚匪滋事張家口廳鞭長莫
及請設衛所員弁彈壓稽查奉部議准十三年經山西巡撫
覺羅石麟 奏准於新平路邊外地名高廟子設立豐川衛
得勝路邊外地名衙門口設立鎮甯所衛設守備一員所設
千總一員隸大同府管轄乾隆十五年因口外種地民人生
齒日繁事務較多復經山西巡撫阿里衮 奏明將豐川衛
鎮甯所裁汰改設豐鎮廳以大同府分防陽高通判移駐管
理二十一年改為滿洲蒙古旗缺三十年經察哈爾都統
奏請將太僕寺空出牧廠餘地東自哈檀和碩西至十八兒

太迤長二百餘里召民認墾三十三年將通判一缺改為同
知仍隸山西大同府光緒十年六月初一日經撫憲張 奏
請將理事同知改為撫民同知隸歸綏道管轄

疆域

疆成於積壤域定於分畛土疆山域澤疆水域此定制也周
頌曰無此疆爾界商頌曰正域彼四方洵我

國家中外一統之義也考之周禮形方氏掌邦國之地正其封
疆大司徒以天下之圖周知九州地域廣輪之數蓋度疆界
紀域方所以辨土宜定地守焉至於分疆畫井各子其民而
煙火相望比戶可封則守土者之責綦重矣
廳境東西廣二百七十里

南北袤二百五十里

東南至

京七百二十里西南至省八百二十里

東至直隸宣化府張家口理事廳界二百三十里

西至朔平府甯遠城理事廳界四十里

南至大同縣治得勝口界二十里

北至察哈爾正紅旗界四十里

東南至天鎮縣治新平口界二百三十里

西南至左雲縣治拒門堡界四十里

東北至察哈爾正黃旗界二百五十里

西北至察哈爾正紅旗界一百里

道路

周禮合方氏掌達天下之道路小行人掌天下之六節道路用旌節委人掌道路之委積凡國野之道十里有廬三十里有宿五十里有市而康莊衢達爾雅亦詳一達以訖九達之數凡以便往來通財利稽送逆待施惠道路之所係非淺鮮也我

朝龍興遼瀋定鼎燕京輶車往復幾徧海澨山陬久已王道蕩蕩王道平平矣故凡梯航貢職者莫不遵道遵路來享來王豈有限於道阻且長路途遙遠而不內附効順者哉夫通衢固多要衝而僻路亦有坦途勿謂歧中有歧遂可略而不志也

東由吉慶梁集賢莊大莊科平頂山張皋兒包家營高廟子等村凡二百三十里接張家口理事廳界

西由留雲窠保全莊聚寶莊等村凡四十里接甯遠城理事廳界

南由三臺道望城坡等村凡二十里接大同縣治得勝口界北由澤落溝湧月灣三祝窠新瑞村等村凡四十里接察哈

爾正紅旗界

東南由官屯堡黑土墩古城兒平遠頭等村凡二百三十里

東接張家口理事廳界南接天鎮縣治新平口界

西南由九成里常稔莊磚樓溝十四圈等村凡四十里西接

甯遠城理事廳界南接左雲縣治拒門堡界

東北由永善莊隆盛莊三瑞里富貴邨豐盛堡黃榆窰等村

凡二百五十里東接張家口理事廳界北接察哈正黃旗

界

西北由悅來邨十八兒太大壩溝慶雲莊等村凡一百里西

接甯遠城理事廳界北接察哈爾正紅旗界

邨莊

周禮大司徒布瀆施教首於比閭族黨州鄉小司徒任土比民始於井邑邨甸鄉都由鄰里漸及鄉黨使之情義聯絡相友相助相扶持風俗成而後教化行所係非淺鮮也廳屬墾地之初村落寥寥穴居野處頗有上古風現今土廣民眾基布星羅煙戶比鄰非復草茨露宿可謂庶矣富教之亟不能無厚望焉

東北鄉 三百二十五邨

得勝莊 距城十二里

二道溝 距城十二里

頭道溝 距城十五里

一素灣 距城十八里

二道邊 距城二十里

榆柏溝 距城二十五里

小莊窩 距城二十五里

黑圪塔 距城三十里

馬王廟 距城三十里

頭墩溝 距城三十五里

南井兒 距城四十里

北井兒 距城四十里

二十四水泉 距城四十里

永盛莊 距城四十里

常山窰 距城五十里

官屯堡 距城五十里

它它營 距城五十五里

井兒邨 距城六十里

十三溝 距城六十里

擺烟圖 距城六十里

五烟圖 距城六十里

北吉燕 距城六十五里

西老背 距城六十五里

東老背 距城七十里

西柳溝 距城七十里

康家窩 距城七十五里

忻州窩 距城八十里

王家窩 距城九十里

留地窩 距城九十里

榆樹溝 距城六十里

三眼井 距城八十五里

大莊科 距城九十里

西梁後 距城九十五里

土堡子 距城一百里

石嘴子 距城一百一十五里

三圖營 距城一百二十里

三道邊 距城一百二十里

東溝掌 距城一百二十里

黑土臺 距城六十里

井泉窩 距城六十五里

豬兒崖 距城六十五里

東柳溝 距城七十里

豐收嶺 距城七十里

達什窩 距城八十里

趙家窩 距城八十五里

五官窩 距城九十里

王半夜窩 距城一百二十里

西地邨 距城六十里

飲馬溝 距城八十五里

小南溝 距城九十五里

大東溝 距城一百里

永和窩 距城一百一十里

豐盛莊 距城一百一十五里

海老窩 距城一百一十五里

平頂山 距城一百二十里

趙子法窩 距城一百二十五里

張白槐窠 距城一百一十里

蕨菜溝 距城一百三十里

西溝掌 距城一百三十里

旗杆梁 距城一百四十里

五道嘴 距城一百四十里

渾源窠 距城一百四十里

六道溝 距城一百三十里

天花板 距城一百五十里

板拍縫溝 距城一百五十里

高家窠 距城一百三十里

水泉窠 距城一百三十里

老松窠 距城一百四十里

抓風窠 距城一百四十里

王良弓窠 距城一百四十里

五道溝 距城一百三十里

張皋兒 距城一百四十里

老官窠 距城一百五十里

西溝門 距城一百五十五里

劉成官窠 距城一百五十里

色楞窠 距城二百里

李家窠 距城二百一十里

二道溝 距城二百一十五里

頭道溝 距城二百二十里

新平二墩 距城二百二十里

十五墩 距城二百二十里

八墩子 距城二百三十里

夏家窠 距城二百三十里

蘆草灣 距城二百里

楊蘭窠 距城二百一十里

三道溝 距城二百一十五里

高廟子 距城二百三十里

西石嘴 距城二百三十里

東石嘴 距城二百三十五里

十六墩 距城二百二十里

二十墩 距城二百三十里

韓家營 距城二百三十五里

古城兒

距城二百四十里

舊馬屯

距城二百四十里

民間房

距城二百四十里

大石人

距城二百四十五里

粒我邨

距城二十里

玉成莊

距城四十里

廣收梁

距城五十里

集賢莊

距城五十五里

喜新嶺

距城六十里

木廠溝

距城二百四十里

頭臺子

距城二百四十里

平遠頭

距城二百四十里

吉慶梁

距城十五里

永善莊

距城三十里

艾蒿窰

距城四十五里

樂成莊

距城五十里

仁壽屯

距城五十五里

慶豐窰

距城五十里

豐樂窰

距城六十里

萬金莊

距城六十里

松柏莊

距城七十里

隆盛莊

距城八十里

百寶莊

距城八十里

四美莊

距城八十里

富家鄉

距城一百里

日新莊

距城一百里

元盛莊

距城一百二十里

毓秀莊

距城六十里

順成莊

距城七十里

天寶屯

距城八十里

拱照邨

距城八十里

三喜坪

距城九十里

重興窰

距城九十里

五福屯

距城一百里

平裕莊

距城一百一十里

復興莊

距城一百二十里

九華嶺 距城一百二十五里

彩雲嶺 距城一百三十里

秀水窯 距城一百三十五里

昇平峪 距城一百四十里

慶雲邨 距城一百四十里

日昇莊 距城一百五十里

發祥邨 距城一百五十里

富貴邨 距城一百五十里

鄂博坪 距城一百七十里

桃花嶺 距城一百三十里

富民莊 距城一百三十里

景星莊 距城一百四十里

聚財邨 距城一百四十里

福緣莊 距城一百四十里

三瑞里 距城一百三十里

柔遠邨 距城一百五十里

保和莊 距城一百六十里

永平邨 距城一百七十里

永泰梁 距城一百七十里

仁里邨 距城一百八十里

近仁邨 距城二百里

裕如莊東窯 距城二百五里

十九溝 距城三十里

徐家營 距城四十里

十九山巖 距城四十里

朱家營 距城四十五里

金六兒營 距城四十五里

大甯莊 距城一百七十里

豐泰莊 距城一百九十里

裕如莊 距城二百里

野場邨 距城三十里

鄧家營 距城四十里

田家營 距城四十里

西梁王家營 距城四十五里

碌砣溝 距城四十五里

大十三溝 距城五十里

十五坡 距城五十里

大灘白家營 距城六十里

紅娘峪 距城六十里

南獐子窩 距城六十里

前灘二道邊 距城六十里

于家營 距城七十里

白家營 距城八十里

大興莊 距城九十里

正北溝 距城九十里

朱家後營 距城五十里

楊家新營子 距城六十里

圪柳溝 距城六十里

北獐子窩 距城六十里

八墩口 距城七十里

王家營 距城八十里

大紅土溝 距城八十里

小紅土溝 距城九十里

大營子 距城九十里

土白家營 距城一百里

五根牛溝 距城一百里

大沙溝 距城一百一十里

灤州窰 距城一百一十里

山羊崖 距城一百二十里

東黃耀 距城一百二十里

站羊灣 距城一百二十里

新安營 距城一百二十五里

亮馬臺 距城一百二十五里

老虎溝 距城一百里

黑土墩 距城一百里

葱地溝 距城一百一十里

大梁上 距城一百一十五里

二十窰 距城一百二十里

西黃耀 距城一百二十里

碓白溝 距城一百二十里

西山兒溝 距城一百二十五里

鹿交溝 距城一百二十五里

小邨兒窠 距城一百三十里

岳五道窠 距城一百三十里

石頭窠 距城一百五十里

官屯堡窠 距城一百五十五里

二道溝掌 距城一百六十里

興盛莊 距城一百六十里

班定營 距城一百六十里

三道溝門 距城一百六十五里

一道溝門 距城一百七十里

陳鬍子營 距城一百三十里

二道邊 距城一百四十里

小四道溝 距城一百五十五里

二道半溝 距城一百六十里

四道溝 距城一百六十里

長盛莊 距城一百六十里

土深邨 距城一百六十里

頭道溝 距城一百七十里

三道溝掌 距城一百七十里

板深邨 距城一百七十里

陶保窠 距城一百七十里

新地窠 距城一百七十里

烏拉哈答 距城一百八十里

管家堡窠 距城一百八十里

拖布袋營 距城一百八十里

胡盧蘇臺溝 距城一百八十五里

盧家營 距城一百九十里

陽和窠 距城一百九十里

大同窠 距城一百七十里

富貴窠 距城一百七十里

興隆莊 距城一百七十里

包家營 距城一百八十里

小梁子 距城一百八十里

賈漢窠 距城一百八十五里

七家營 距城一百八十五里

大榆樹溝 距城一百八十五里

小榆樹溝 距城一百九十里

白木匠窩 距城一百九十里

白家營 距城二百里

拉嗎營 距城二百里

北京壩 距城二百里

豐盛堡 距城二百里

八姐窩 距城二百五里

董家窩 距城二百一十里

黑土窩 距城二百一十里

碾房窩 距城二百二十里

王家營 距城二百里

劉柱兒營 距城二百里

曲寬窩 距城二百里

七道溝 距城二百里

小五道溝 距城二百五里

店子上 距城二百一十里

紅土窩 距城二百一十里

十八兒太 距城二百二十里

哈拉溝 距城二百二十里

天城南窩 距城二百三十里

鴉兒帶營 距城二百三十里

西灣頭道營 距城二百二十里

南灣頭道營 距城二百三十五里

南灣二道營 距城二百四十里

豐裕莊 距城二百四十里

普豐莊 距城二百二十里

阜豐莊 距城二百二十里

同豐莊 距城二百二十里

田刺溝 距城二百三十里

北營子 距城二百三十里

西灣二道溝 距城二百二十里

不懺溝 距城二百三十五里

金家營 距城二百四十里

黃榆窩 距城二百五十里

豐載莊 距城二百二十五里

豐業莊 距城二百三十五里

豐昇莊 距城二百四十里

慶豐莊 距城二百二十五里

厚豐莊 距城二百三十里

生豐莊 距城二百三十里

利豐莊 距城二百三十里

寶豐莊 距城二百四十五里

萬金莊 距城二百五十里

同善莊 距城二百里

晉寶莊 距城一百六十里

大盈莊 距城二百五十里

豐平莊 距城二百四十里

地利莊 距城二百五十里

公議莊 距城二百里

平定莊 距城二百里

發源莊 距城二百一十里

亨茂莊 距城二百二十里

泰來莊 距城二百二十里

全新莊 距城二百一十里

甲寅邨 距城五十里

乙卯邨 距城六十里

丁巳邨 距城七十里

己未邨 距城九十里

辛酉邨 距城一百里

豫順莊 距城一百七十里

復興莊 距城二百三十里

臨財莊 距城二百五十里

慶盈莊 距城一百八十里

疆裕莊 距城一百七十里

丙辰邨 距城六十五里

戊午邨 距城八十里

庚申邨 距城一百里

東太平邨 距城一百里

謙和莊 距城一百八十里

濟美莊 距城二百四十里

有餘莊 距城二百六十里

咸勤莊 距城一百五十里

聖恩莊 距城一百六十里

需霖莊 距城一百四十里
福善莊 距城一百四十里
豐裕莊 距城一百八十里
樂業莊 距城二百二十里
永綏莊 距城一百九十里
豐萬莊 距城二百一十里
豐樂莊 距城二百里
用豐莊 距城一百九十里
天時莊 距城二百二十里

西北鄉八十一邨

留雲窯 距城八里
富喜邨 距城二十里
保全莊 距城二十里
常稔莊 距城二十五里
石田嶺 距城二十五里
興盛溝 距城三十里
十四園 距城三十里
山邨 距城三十里
大有莊 距城三十里
洪潤莊 距城四十里
太安嶺 距城四十里

慶噶溝西梁 距城四十里
石莊子溝 距城四十五里
車道溝 距城五十里
臺子山 距城五十里
馬鞍山 距城五十里
東廟溝 距城五十里
亂營溝門 距城六十里
鄧家梁前懷 距城六十里
聖水泉 距城六十里

寶善莊 距城一百六十里
熙甯莊 距城一百二十里
安居莊 距城一百八十里
富厚莊 距城一百七十里
時雨莊 距城二百里
豐民莊 距城一百九十里
豐安莊 距城二百里
人和莊 距城二百五十里

九成里 距城十二里
悅來邨 距城二十里

餘慶莊 距城二十里
十一灣 距城二十五里
磚樓溝 距城三十里
園圖邨 距城三十里
西十八兒太 距城三十里
聚寶莊 距城三十里
盈收莊 距城三十里
調元莊 距城四十里
慶噶卡倫 距城四十里

羊圈溝 距城四十五里
他拉大壩 距城四十五里
柳條壩 距城五十里
青椿子背 距城五十里
大通溝 距城五十里
紅旗溝 距城六十里
鄧家梁 距城六十里
鄧家梁水泉 距城六十里
水泉溝 距城六十里

太平圪塔 距城七十里

青楊林溝 距城七十里

白塔溝東梁 距城七十里

二道背 距城七十里

黃芪窩背 距城七十里

永慶邨 距城七十里

鄂博山 距城八十里

二架圪塔 距城八十里

四架圪塔 距城八十里

海留素太 距城八十里

額兒克營 距城八十里

雙水泉子 距城八十里

萬裕莊 距城八十里

平安莊 距城九十里

民樂莊 距城九十里

慶雲莊 距城一百里

雲海莊 距城一百三十里

松海莊 距城一百四十五里

衙衙太 距城七十里

包頭溝 距城七十里

白塔溝西梁 距城七十里

黃花背 距城七十里

黃芪窩溝 距城七十里

興隆灣 距城八十里

亂營灘 距城八十里

三架圪塔 距城八十里

狼窩溝 距城八十里

井兒泉 距城八十里

韭菜背 距城八十里

椴樹嘴 距城八十里

豐盈莊 距城九十里

裕後莊 距城九十里

吉泰莊 距城九十里

春萌莊 距城一百里

鈺海莊 距城一百四十里

泉海莊 距城一百四十里

源泉莊 距城一百三十五里
流泉莊 距城一百四十里
福海莊 距城一百三十里

南鄉 七邨

新城灣 距城五里

二十一溝 距城十里

四臺溝 距城十五里

河口灘 距城十八里

北鄉 一十七邨

衙門口 附城

湧月灣 距城十里

三祝窰 距城三十里

永旺莊 距城三十里

積玉莊 距城三十里

遠泉莊 距城一百五十里
長泉莊 距城一百二十里

三臺道 距城八里

五臺窰 距城十五里

焦山尾 距城十五里

畢各溝 距城五里

興旺嶺 距城十五里

新安莊 距城二十五里

阜豐莊 距城三十里

玉寶莊 距城三十里

慶豐莊 距城三十五里

天德邨 距城三十五里

興盛邨 距城四十里

永豐莊 距城三十五里

吉祥邨 距城三十五里

仁德邨 距城三十五里

新瑞邨 距城四十里



山川

粵稽虞舜封山濬川禹奠高山大川晉郭景純注山海經北魏酈道元撰水經注依古以來志地理者莫不因其脈絡原委分畛域定疆界焉顧山川終古不易而名號今昔頓殊以今例昔往往多未確切爰據現在名目考其支幹源流有與史籍證實者著之於篇所不知者闕焉

奚望山在得勝口外彌陀山之東新城得勝二河之所逕也西北距廳治十六里上有鬪雞臺唐乾符中雲中守捉使李克用偕程懷信等募士萬人次於此今名望城坡

三台道山在望城坡西北高坡叢石路徑險仄西北距廳治八里許得勝河西來逕之一名三台道河東南注於新城河省志載焦山在大同北明嘉靖間大同叛卒亡出塞退保焦山今朔平府左雲縣之焦山在助馬邊內與出塞之說不合三台道為得勝口外出入要路現在設兵防汛左邊有村名焦山尾疑焦山即三台道山

尖山子南距廳治三十五里其西北為大壩山距廳治四十里越兩山而北為五字圖廟及蒙古賽拉嗎克特不黑地又北則察哈爾正黃旗南界



白牙义山在大壩山之東東南距廳治三十里下有村名十八
兒太蓋言黃土溝也西接甯遠廳治東連石田嶺嶺東南距
廳治二十里

留雲山在廳治西北五里下有留雲窠迤東陂阜橫亘亂石犖
塉城北枕以為險

興望嶺在留雲山之東北南距廳治十里

石元山西距廳治里餘盤踞二里高六十丈有奇平野獨秀如
擎芝蓋新城河北來逕其右亦名新城山其左靈泉出焉東
南注於新城河巔有古寨址傳是五代周德威屯兵處又云

是唐薛剛寨俱無證實旁古井一深不可測以小石投之鏗
錙震蕩良久乃寂

飛來峯即小石元山西距廳治二里山巔有金龍大王廟廟前
百步許即靈泉發源處因在石元山東故名小石元山
二龍山俗名二八洞山其山委蛇蜿蜒酷肖龍形西南距廳治
五里山前有飛來峯即金龍大王建廟處

金鵝山在新城灣之村西西距廳治五里山形如鵝土人因名
金鵝撲水

馬脊山在河口灘北西距廳治十五里形如馬脊因呼馬脊山

頭道溝河逕其左二道溝水在其右二水俱南注新城河
東山巖在馬脊山東西距廳治二十里南北橫臥波阜崎嶇
十九山巖在得勝邊外東山巖之南西北距廳治二十五里
牛心山在新城河之東北豐樂窰村西西南距廳治六十里孤
峯直上高五百丈有奇其巔有墩高數丈周五丈許俱砌以
石上有草似蓆麻最茂密螻螂羣飛環繞墩上而山下則無
其西北重巖複岫若拱若翼直跨正黃旗遊牧地下掘長塹
為界環山屈曲蒙古營帳碁布塹外陟巔北眺則威寧菱角
葫蘆諸海了了可辨大青山委蛇西來雲霧杳冥遠在二百

里外考魏書太祖登國元年自駕山遷幸牛川屯于延水南
天賜三年行幸青牛山西登武要北原觀九十九泉按于延
水即今東洋河九十九泉在歸化城北青塚南武要於漢屬
定襄郡亦近今朔平邊外疑青牛即今牛心山而山北之平
川亦近古牛川也明嘉靖間大同烽警時總兵梁震戰捷牛
心山則在今右玉縣南四十五里亦與歸化城西北百十里
之牛心山別

廣收梁在牛心山之西少南西南距廳治五十里

八稜山松柏山俱在廣收梁東俱西南距廳治八十里

稜一作楞

盤羊山蒙古名衣馬圖在鎮川口外西北距廳治八十里東南接乾柴洞土人云舊產盤羊即獬羊代都賦所謂獬羊養草以盤旋是也盤與蟠通用北魏太祖天賜四年夏五月北巡自參合陂東過蟠羊山太宗泰昌六年六月北巡至蟠羊山疑即此與歸化城東北七十里蟠羊山別

乾柴洞山在守口邊外清涼嶺之北西北距廳治百里舊有礦洞今封塞

清涼嶺在守口邊外雲門山西北西距廳治百三十里重巒疊巘震蔚雲蒸連山隱隱東出遼塞其巔為神谷有穴名風洞

邃不可測東通天鎮風神山石洞守口河導源其麓即古鴈門水也一名南洋河水經注鴈門水出鴈門山在高柳北今考其地陽高縣西北二十里有虎兒山又西有猴兒山守口河自兩山間出名開山口金史謂之墨谷口崇慶元年元帥左都監奧屯襄救西京至墨谷口一軍盡殪迤北有撫風崖即古高柳塞鴈門山即雲門以東諸山與勾注之鴈門別雲門山在清涼嶺東南西距廳治百一十里與陽高之雲門毗連西南接大同採掠山東北連天鎮環翠山延袤百餘里山嵐疊翠如列屏障亦名翠屏山即古之青波山唐地理志所

謂雲州有青陂道為出兵路梁元帝橫吹曲云朝跋青陂道是也遼之長青縣以此得名又名青龍山石色青黑頭南尾北委蛇蜿蜒酷肖龍形故名青龍上有懸雲觀諸勝境詳祠祀其東為鍊裏門為大小鵝鵠峪口明嘉靖間王邦直率義兵出塞抵鵝鵠峪即其處也

鵝鵠峪在鎮甯堡邊外西北距廳治百八十里明一統志衛當東最衝有白羊口鵝鵠峪萬歷間王邦直為虜所害處五煙圖山西距廳治六十里紅娘山在五煙圖山西南色如渥赭草木不生故名紅娘西距

廳治六十里

慈老壩西北距廳治百八十里南直鐵裏門徐化溥詩引塞上一種似鴈非鴈與鴈往來名曰慈老山之受名未詳或曰即鵝鵠峪

豐收嶺在五煙圖之東西距廳治七十里

天花板山西距廳治百三十里

猴兒山在永善莊西北南距廳治四十里有故城址今圮傳是薛剛妻避難處無可證實土人於雨後黎明時每見城現又聞城內有演武教戰之聲誕妄不經姑存其說

前
雙乳山在隆盛莊東西南距廳治百里有奇兩峯並峙高數十丈層崖聳秀中有微林葱蘢叢雜下有清泉清潔潺湲遙望其形宛如雙乳故名

奶坡山在四美莊西北西南距廳治八十里山之受名與雙乳同山下有海周百頃餘四季不涸近年海側村農因水佔地擬議鑿渠放流別處有形家者言奶坡有海猶乳有汁該村自開地以來未遭旱潦之災利益賴是開放奚為渠議遂止至今稱乳海焉

狼頭山東接旗杆梁西南距廳治百二十里疑即古豺山北魏

離宮所在也

平頂山在狼頭山之東西距廳治百二十里東西延長十餘里

與明暗山接北連桃花彩雲二嶺

桃花嶺在平頂山北西南距廳治百三十里

彩雲嶺在桃花嶺少西西南距廳治百三十里

玉泉山在彩雲嶺西頂有清泉西南距廳治百二十里

惱包山即察哈奧包山上壘石為小祠蒙古俗謂之奧包一作

鄂博故稱奧包山在玉泉山之北少西西南距廳治百二十里

三道溝山西北距廳治百四十里水泉壩西北距廳治二百里
 兩山之間曰葫蘆速太猶言榆樹溝有龍泉寺飲馬池東西
 二灣西洋河導源於此東入馬市口古延鄉水也水經注延
 鄉水出延陵縣西山按山西通志載唐太宗飲馬於龍泉寺作飲馬長城窟行蓋指此飲馬池而言然漢樂府詩已有此題詠恐據此亦未確切
 黑山子在正黃旗之南西南距廳治二百里按明史嘉靖間大
 同烽警時前衛總兵周尚文與戰黑山進至涼城水經注如
 渾水出涼城旋鴻縣即今察哈爾境內之葫蘆海在黑山之
 北疑周尚文戰處即此山也王越周璽傳亦稱黑石崖疑一
 山異名然府境稱黑石崖者甚多未能確指其處又古豐州

境內有黑山與雲內州夾山相連則在今歸化城西南非此
 黑山

雙山在西洋河之北新平堡邊牆外西南距廳治二百四十里
 兩峯對峙巒嶂重疊三春積雪不消謂之雙山積雪金史撫
 州柔遠縣有雙山世宗大定二十七年秋獵次雙山子即此
 大青山蒙古名庫庫和邵在高廟子北西南距廳治二百三十
 里西接察哈爾正黃旗界東一峯尤高蒼翠峻嶒故土人謂
 大青山東洋河北來繞其麓東入直隸懷安縣界同治年間
 農人山麓耕田得紅色石一塊長數寸似玉而不甚光澤未

知何物其友京師懋遷攜之代售獲二金居民聞知競往創
取石有五色徑二三寸長尺餘不等蓋砥砢類也然今不易
有矣

蘇木山在木廠溝村南西距廳治二百里山產蘇木樺木俱不
成材按詩山有扶蘇注扶蘇猶扶胥小木也因名蘇木山
新城河即如渾河源出正紅旗葫蘆海今名三泉兒水經注如
渾水出涼城旋鴻縣由小草地河東南流會車道白塔溝喇
嘛溝衙衙太諸河合流注於九龍灣河至賽拉嗎克特不黑
流入廳境永旺莊南流逕三祝窰又南逕湧月灣三瑞里河

東來注之又南逕慈老溝又東南逕新城灣謂之新城河靈
泉自左注之又南逕三臺道山後營水西來注之東流逕焦
山尾又東南逕河口灘潘家圪塔大莊科河東來注之行廳
境凡五十餘里由鎮羌堡水口流入大同縣界

得勝河一名三臺道河源出察哈爾正紅旗游牧地由朔平府
屬甯遠廳東流入廳境西二十五里民地名常稔莊又東逕
富喜村東南逕二十一溝五臺窰東北流逕三臺道山注於
如渾水

靈泉出廳治東石元山麓東北百步許清冽淵涵時有物蜿蜒

其上禱雨多驗其水西南流屈逕山南又南逕新城灣村注於如渾水

馬廠河源出台子山東流逕廣德村入聚寶莊河

聚寶莊河源出恩義村東南流逕黃羊嶺溝又東南逕廣德村馬廠河西來注之又東南逕聚寶莊又東南逕保全莊又南逕留雲窰村又東逕富喜村注於後營水謂之得勝河

留雲窰水源出留雲山麓泉孔最多平灘湧出眾水會合成河南流注於聚寶莊河

大莊科河源出大小飲馬溝西流逕大莊科又西逕黑土台又

西逕忻州營又西南逕西瓦窰又南逕廣財溝大梁河東來注之又西南流至潘家圪塔注於新城河

大梁河源出守口邊外西北舊大梁之西麓西流半里許即伏又西由豐收嶺至豬兒崖泉水湧出細流不竭又西逕北吉燕又西逕擺煙圖土人引以灌園出村外又伏又西由沙溝堰至小山子泉孔沸騰四時不涸又西逕慶豐窰河南田畝灌溉十餘頃又西逕馬王廟又西逕廣財溝西南注於大莊科河

官屯堡河源出村西北山麓南流二十里入鎮川口大同縣界

南邊口水源出廳境南灣東流從樺門山入天鎮縣界

延鄉水即今西洋河導源廳治東北百八十五里山溝蒙古謂之葫蘆速太其水由七家營東流逕高廟子東石嘴俗名頭道河東流入天鎮縣之平遠水口水經注延鄉水出延陵縣西山東逕延陵縣故城北俗謂之琦城川又東逕羅亭又東逕馬城北又東注修水一統志延鄉水在天鎮縣西北邊牆外一名西洋河

于延水一名修水即今東洋河由察哈爾正黃旗五祿戶灘發源南流逕一大山俗呼為大青山又南逕八戒窩黑土窩屈

而東逕碾房窩謂之二道河又東入直隸懷安界山海經梁渠之山修水出焉漢書地理志代郡且如縣有于延水出塞外東至甯入沽魏書登國元年帝自弩山遷幸牛川屯于延水南水經注于延水出塞外柔元鎮西長川城南小山東南流逕且如縣故城南即修水也又東逕馬城縣故城北俗謂是水為河頭河頭出戎方土俗變名耳又東逕零丁城南右合延鄉水又東南流大甯郡北右注鴈門水自下通謂之于延水合數條考之柔元鎮近今正黃旗五祿戶灘且如近廳境東北馬城近懷安零丁近萬全長川城南小山即梁渠山後漢書永初

三年敗五原郡兵於高渠谷東觀記曰戰九原高渠谷疑即
山海經所稱梁渠山也一統志云于延水在天鎮縣北一名
修水一名東洋河源出縣北邊牆外時豐鎮未設耳

琦城川地理志延鄉水出延陵縣西山東逕延陵縣故城俗謂
之琦城川按此當在新平口城北西洋河按廣靈縣本漢延
陵縣地屬代郡東漢省漢書地理志代郡有延陵史記趙孝
成王十八年延陵鈞率師從相國信平君助魏攻燕徐廣曰
代郡有延陵縣是即路史所謂延陵有五其一在代者也今
考其地古延陵縣在廳境東北近天鎮縣去廣靈縣三百餘

里不得牽混

附考

牛川通鑑晉太元十一年拓跋珪大會於牛川即王位魏紀窟
咄之來寇也珪乞師於燕自弩川至牛川屯于延水南則牛
川亦在且如塞外矣今考其地當在察哈爾正黃旗南界即
今廳屬牛心山北之平川也

附考

鴛鴦河發源於正黃旗五股泉西南流至元山子謂之鴛鴦河
即遼景宗興宗道宗屢幸之鴛鴦濼又折而東南流逕二道
河村北注於後河東流入直隸界

水利附

粵稽大禹濬畎澮匠人為溝洫為民興水利除水患也自井田廢而水道之法湮旱則赤地千里潦則洪流萬頃雨暘不盡時若人惟聽命於天而已第水利之設東南為最塞北多高原少下隰蓄洩之法率多不諳然一堰一渠農事攸關誠能相土之宜凡陂塘渠堰因勢而修治利導旱則蓄之潦則洩之雖有凶災而民不困何患利之不溥歟

富東渠在新城河東一帶園圃胥賴灌溉種蔬者養贍其家鬻販者亦資生焉

靈泉在把總營村西北村民導水灌畦南流逕新城灣村引以

溉圃

城南菜圃甚夥胥用桔槔汲井水以灌畦

四城窪村北亦以桔槔取新城河水溉圃

三祝窰村有清泉土人引以運磨下流注新城河逕慈老溝村鑿渠運磨兼溉田園

大莊科河由大小飲馬溝西南流至頭道溝一素灣等村導以

溉田又南流至潘家圪塔鑿渠溉田兼運水磨

豬兒崖水西流至擺烟圖村鑿渠溉圃溉田

小山村水西流至慶豐窰河南玉來園引以溉田

渾源渠在張皋鎮北導源於駱駝山又名筆架山南流注於鎮東北隅龍王廟海子內復匯出西流逕鎮北入渠過淮銀橋又西流會湧金渠水西北流入於二道河村北後河土人言此水通張家口銅橋河鎮地窪下水來無洩相傳堪輿家謂此處有九達通衢是為九龍混水故無水害

湧金渠在張皋鎮南每遇暴雨南山諸水漲發北流直注西街由巡司署前繞西灘入渠西北流入渾源渠向因鎮地低窪西南逼近四五道溝諸山水來有蓄無洩故有是渠又形家有案潮投懷貴若湧金之說因名渠曰湧金渠壩曰湧金壩

壩上有石碑二一係乾隆五十一年刊勒字迹多殘缺難識一係嘉慶五年重修渠壩建立碑陰鐫前巡檢朱煌撰文

形勝

孟子云固國不以山谿之險吳子云在德不在險似形勝非所重也然秦據崤函而稱帝楚恃漢水以僭王蕭相入關收籍具知天下阨塞張子房借箸運籌分晰山川要害馬伏波聚米為山指畫地域勢形所以固封疆完要塞謹關梁塞蹊徑者即易所謂王公設險以守其國也則頓固封守誠要務焉豐鎮邊外一隅雖無劍閣潼關之險而南扼長城東通居庸北跨洋河西連岱海不特為三晉之藩籬且為

神京之鎖鑰我

國家疆輿式廓向係蒙古牧壤今皆設官建邑制同腹裏茲斯土者其無忘設險以守之意也乎

望城坡在得勝口外北距廳治一十六里與三臺道山橫互聯絡足為內地屏障

三臺道山在廳治南七八里高坡叢石路徑險仄中通山溝一道為得勝口出入要路現設汛兵防守

三祝窰在廳治北二十里南通湧月灣北連察哈爾正紅旗界平沙曠野惟新城河一道流出兩山之間遠北而東而南可稱天險

保全莊在廳治西少北二十里窪下積水泥淖難行東南接留
雲窰西通甯遠城界現設汛兵防守

十八兒太東南距廳治三十里在白牙又山北麓又北為大壩
山西通甯遠踰大壩而北為察哈爾正紅旗界險類鴈門

東山巖在廳治東北六十里南北橫列如屏北連八稜山山左
為拱照村右為樂成莊俱設汛兵防守

平頂大山在廳治東一百二十里北連桃花彩雲二嶺迤東通
張皋兒包家營高廟子各村直達張家口西南至集賢莊二
十里中有峻嶺深溝嶮巖泥淖頗稱緊要

四美莊在廳治東北八十里地勢平坦無險額設官兵駐防又
北為隆盛平裕二莊皆與察哈爾南界毗連設兵防守

高廟子西南距廳治二百三十里東通張家口北有二道河又
西北有黑山子中有哈拉溝一道路通察哈爾正黃旗界現
設豐川營官兵防守

貓兒莊省志云在陽高縣北一百里其北二十里有口子牆以
今考當在四美莊大莊科之間疑即俗名帽兒山

八墩口在鎮川口外西為十九山毗連邊牆
石人口在鎮門口外少東今名大石人

外寨在大邊外形如偃月東西皆附於舊寨明嘉靖二十八年
築今廢址尚存周經重脩大邊記大同於九十里外築小城
曰小邊於百里外築大城曰大邊

古蹟

地閱人而蹟著人閱世而古名燕然紀勲峴山墮淚往蹟流傳洵足重也豐鎮為前代蒙古地遺蹟蓋寡然而芒芒舊壤城邑雖非山川猶是觀乎版築秦趙之故址尚存披乎輿圖魏遼之荒墟宛在後之視今猶今視昔故異躅芳蹤好事者每多咨賞而斷碣殘碑過其下者亦歛歔而不忍去豈非興廢存亡之感入人有甚深耶倘無景行仰止之思而徒憑高弔古感慨係之無益也

古長城廳治北察哈爾界有古城址相傳秦始皇築土色皆紫故名紫塞按載籍云秦長城起臨洮至遼東則雲代在其中或云今內三關之間有版築迹與起洮至遼海者為一城為秦之長城其在宣大以北者起赤城止五原乃元魏秦常八年所築按史記趙肅侯築長城自雲中以北至代武靈王自代並陰山下至高闕為塞秦并天下北築長城起臨洮至遼東延袤萬餘里是長城始於戰國而亘萬里以為限者特因其舊而增拓之考漢書地理志雲中雁門代郡皆秦置故史記云渡河據陽山逶蛇而北也水經注陽山即陰山一統志陰山即大青山在今歸化城北二十里東接察哈爾界廳在

陰山東南得漢雲中東境代西北境故應在秦長城內矣大率趙秦洎北魏舊蹟俱在明邊垣之外其在內三關者疑齊隋以後所築或北宋時遺址緣宋時跨忻代應等州為界耳且如故城漢書地理志代郡且如縣有于延水出塞外水經注于延水出塞外柔元鎮西長川城南小山東南流逕且如縣故城南又東南逕馬城縣故城北俗謂是水為河頭又于延水即今東洋河源出廳東北察哈爾正黃旗五祿戶灘南流逕八戒窩黑土窩折而東逕碾房窩田刺溝又東流入直隸張家口與葛河合是馬城當在廳東界且如當在廳東北界

矣且如亦作沮如北魏神瑞二年行幸沮如城即此縣志云馬城故城在今察哈爾正黃旗哈洮河之南

成樂故城金史地理志大同縣有盛樂城按盛樂漢志作成樂定襄郡治魏書穆帝統一部居定襄之盛樂故城即此

單于臺廳西北察哈爾正紅旗界俗稱議事臺漢武帝元封初勒兵十八萬騎登此通典雲中單于臺漢武自將待邊處

飲馬長城窟即白道泉綱目集覽曰白道在古雲中郡省志云大同北有白道泉天鎮縣志西洋河源出邊外飲馬池東西二灣今民地內有名飲馬溝小飲馬溝者疑即古長城窟也

又天鎮縣北四十里廢樺門堡有飲馬長城窟碑

按史記趙武靈王築長城自代並陰山水經注白道嶺上有垣若頽基沿溪亘嶺東西無極則古長城在歸化城北陰山疑趙武靈王之所築也一統志陰山卽大青山歸化城志陰山一名翁公山在城北三十五里有元時建甸城廢址西自河套之北起吳喇忒西境東至歸化城東北層巒峻嶺綿亘五百餘里自西而東諸山雖土名不一皆陰山也而翁公勢尤高魏書太宗紀太常四年西巡雲中踰白道水經注芒干水西南逕白道南谷口有長城背山

面澤謂之白道嶺沿路惟土穴出泉挹之不竭廣韻穴窟也綱目集覽曰白道在古雲中郡一統志新雲中在大同北郭外古雲中在豐勝之間相去四百餘里以今地界覈之新雲中卽豐鎮古雲中卽歸化城歸化城志雲州故城在城西南明新設衛宣德四年於豐州西南築城後徙於大同城內今豐鎮距歸化城三百六十里而曰四百餘里蓋指雲州故城而言是長城窟卽白道泉在歸化城北無疑省志云大同北有白道泉誤矣又接天鎮縣志西洋河源出邊外飲馬池東西二灣今民地內有榆樹溝蒙古謂

之葫蘆遠太在三道溝水泉壩兩山之間西洋河發源於
此東流從馬市口入天鎮縣界是飲馬池東至天鎮長城
僅數十里正紅旗南界民地內有飲馬泉南至得勝口長
城一百二十里粒我村東南有飲馬溝大莊河北來逕之
南至得勝口長城十六里若大莊科東之飲馬溝小飲馬
溝大東溝水蟠羊山水皆注此水南距鎮川口長城九十
餘里古飲馬長城窟未知孰是府志疑飲馬溝小飲馬溝
卽古長城窟似亦不合附錄於此以俟博古者訂正焉
延陵故城一統志在天鎮縣北邊牆外本趙邑史記趙世家孝

成王十八年延陵鈞率師從相國信平君助魏攻燕漢置延
陵縣屬代郡後漢廢水經注延鄉水東逕延陵故城北地理
風俗記當城西北有延陵鄉故縣也今考其地當在新平口
外諸村若以廣靈縣本漢延陵縣牽混之則相去遠甚未免
大誤

單于都護府唐書雲中都護府龍朔三年置麟德初徙瀚海都
護府於古雲中城號雲中都護府改雲中為單于大都護府
以殷王旭輪為單于都護載籍云瀚海所徙史文曰古雲中
單于府所置但曰雲中是其時有新舊兩城也一統志新雲

中在大同北郭外古雲中在豐勝之間相去四百餘里

柔元鎮撫冥鎮一統志柔元鎮在天鎮東北邊牆外按水經注于延水出塞外柔元鎮魏書孝文紀太和十八年幸柔元鎮胡三省通鑑註柔元鎮在漢且如縣西北塞外其西卽撫冥鎮則柔元當在正黃旗界撫冥^當在正紅旗界皆與廳北境毗連

馬射臺魏書世祖始光元年築馬射臺於長川上親登臺觀走馬王公諸國君以下馳射賜中者金錦繒絮各有差按長川在柔元鎮西北其南卽秦昌八年築城處也疑今旗地^內之

亮馬臺是其故址

豺山宮北魏離宮也天興六年築於豺山遂名魏書天賜三年正月北巡豺山宮校獵四月復幸豺山宮遂登定襄角史山又幸馬城五年行幸豺山宮遂如參合陂按定襄馬城參合俱在今府北說詳沿革是豺山必附近代都今廳境所稱狼頭山者疑近古豺山然無可證實

獨谷孤城水經注如渾水出涼城旋鴻縣西南五十餘里東流逕故城南北俗謂獨谷孤城水亦卽名馬又東南流逕永固縣因山堂之目以氏縣也按如渾水源出塞外之葫蘆海南

流入得勝口東南運方嶺右脇相傳上有北魏遺址卽永固石室也今考其地永固縣當在得勝口內獨谷孤城則在廉境永旺莊左近矣

鬪雞臺在岐王山唐乾符三年雲中守捉使李克用偕程懷信等募士萬人趨雲州次鬪雞臺卽此岐王山詳見山川

石元山寨相傳後唐周德威屯兵處寨址尚存又云薛剛避難處

附塚墓

金雁甫侈於泉下玉盃已出於人間此光武所以獨崇夫古葬昭陵所以獨全於寇亂也抑更有進者柳季之壠樵猶却

步萇宏之血碧化他年俾憑弔者悼九泉之不作顧一坏而泫然夫亦存乎其人也彼魯隱公營菟裘趙文子觀九原豈非感浪死而念虛生哉如徒對荒塚累累而曰令人不樂令人不得不哀所見猶淺耳隋楊俊曰人生求名史書足矣何以碑為若不能保家徒與人作鎮耳然則誌銘不如史乘也北魏定陵公和跋塚在材山魏書道武幸材山收跋刑之後太武幸材山校獵山忽霧四塞怪問之羣下僉言跋世居此祠塚猶存或者能致斯變乃遣建興公古弼祭以二牲霧卽除後太武蒐狩之日必先祭之

金左丞相純石烈良弼墓良弼居宣甯大定十八年卒於西京
命翰林待制移刺履勒銘墓碑

廳治西南里許地名西四城有古墓土人呼為王墓後有廢
城址猶存

廳治東一百五十里老官窰村山上有老官墳墓址累累傳
是牧羊人後居大官卒葬於此

廳治東北二百五十里察哈爾正黃旗南界有一塚俗呼王
墓墓前有石翁仲四如古太監形石猪石羊石馬猶存

彩雲嶺之麓半崖塌出一小穴村童隨其父力田見禽飛入

穴中呼其父用鋤創之穴愈大村農望見悉來掘之乃一古
墓中有一棺鐵裹未朽知是王宦之塚遂封塞如故以上四
墓惜文獻無徵終不知為何許人何時代也

景致

寰輿傳記例載勝景大同舊志別立景物一門至八景名色爭效西湖瀟湘志蓋以八景宜人足令山川生色也豐地僻壤雖無閭岑蓬島之觀鳳嶺龍門之勝然山秀水清柳暗花明誠有豁人心目者况長城孤塞控東南菱角葫蘆環西北其間靈奇蒼翠無非星土人物之精氣所鍾聚固不徒風光物景別有異致克為都邑增輝且足供騷人逸士嘯歌登臨飛觴賭韻也故仍沿舊例志為八則云

青山寶藏在大青山山盤踞百餘里一峯特出尤高山麓居民

某入山採樵沿溪行路轉峯迴渾忘遐邇到水窮處斷壁千仞下有石穴某探之得五色石數枚六稜若削長尺餘光怪陸離亦不知為何物攜歸頗不貴視之置几上兒童以為玩具有客自燕來見而異之曰此旱精也胡為乎來哉某述所遇與客偕往復尋舊路見水源不一遂迷故處徘徊半日但見怪石嶙峋清流激湍一嶺白雲滿徑黃葉而已某與客惆悵而返

碧海風濤在岱海與察哈爾鑲紅旗連界周數百里深不可測一望無際每當春秋之交風濤大作浪高大餘若林立若雲

垂峻嶺奇峯重見疊出傾刻萬變莫可名狀洵塞外奇觀也
雲門古洞在雲門山山半有觀觀旁有泉泉上有洞相傳為王
栩祖師修真處洞口苔封若隱若顯遙望之甚真觀中道士
言風雨晦明時嘗聞盂聲不絕距三五里許靜聆之最嘹唳
蹤跡則杳洞外浮圖龍蛇有時盤繞其上見人亦不甚避其
靈異有如此者其他古跡詳山川志

煙浦靈泉在石元山左其地有泉甚清冽深不見底天旱禱雨
投瓶其中有神物傾瓶水滿卽雨無不應者因於泉上飛來
峯頂建金龍大王祠四時香火不絕早晚天晴風靜泉中似

有呼吸之者滿城炊烟趨之如鶩雲覆其上將石元山圍繞
如盤捧珠久而不散

牛心獨秀在城北牛心山孤峯聳翠上出重霄遠望奇峭天然
若削及登巔一覽如身入雲際星辰可摘古詩云不敢高聲
語恐驚天上人彷彿似之俯視遠近諸山皆培塿矣可謂雄
鎮邊疆夏夏獨造者歟

馬脊雙流在城東南馬脊山此地有清泉二從山之東西分流
而出映帶左右又有人家田園廬舍樹木陰翳雖不比名山
大川開人心胸識見而山之秀水之清山陰蘭亭不是過也

一觴一詠豈不足以暢敘幽情乎

海樓夜月在飛來峯頂純陽閣下望海樓樓前浦平如掌周圍數里許因靈泉發源積水成海故名樓當春暖冰融水光天色上下相映抑或長烟一空皓月千里浮光耀金靜影沈璧騷人韻士多會於此或對景懷人或感時起興倡酬交錯把酒論文至更深露冷尤低徊留之不忍去

山寺朝霞在城東北隅靈巖寺寺依山之麓凡十九級而至其巔迴闌曲折處有禪室二負山面水盤踞雲間憑闌眺望河東塲圃星羅碁列採掠雲門紅娘諸山亦送青於几席之上當月落天曉日將出時霞光射來樓閣樹石俱成赤色而於積雨初霽後尤奇

營建

上古穴居野處不言建置雖黃帝制宮室伯鯨築城郭伊祁
茅茨土階載籍可稽而亦無營建明文自周禮匠人曰建國
曰營國詩序言衛文公始建城市而營宮室春秋葺舊書城
創始書築厥制始詳蓋甚重乎其事也我

朝拓宇開疆田野日廣凡蒙古遊牧駐地疊次設官建邑故入
其境而城郭完倉廩繕祠廟肅傳舍無稽程行旅不病涉則
長吏之無廢事也可知表厥宅里綽楔相望則通邑之無流
風也可知而特是窮邊極塞本前代馬出沒之區今雖制同
腹裏而揆諸有備無患之義則禦暴守險營建其大要也故
志之

城池

豐鎮為雲中後戶自乾隆十五年裁汰豐川鎮甯衛所改設
馬廳以來並無金湯之險足以固圉後雖倚山砌石環築土
墉制類堡寨所恃衆志成城用作屏翰保障一方俾毳幕羶
帳之徒不敢南下而牧馬而呂新吾先生郡縣高城深池非
如竹籬土垣遮人眼目則守斯土者所宜隨時修葺補其殘
缺庶備豫不虞有合於重門待暴蓋取諸豫之意也乎

豐鎮舊在得勝口邊外地名衙門口村乾隆十八年大朔理事通判色明率民創築土城周五百七十五丈東西南三面均高一丈厚四尺各開門以司啟閉北面倚山砌石高七尺厚三尺二十一年開放牧地招民墾種漸次烟戶懋遷廛舍鱗密環土城而居者較之城內更繁三十八年同知八格勸諭商農捐貲展築仍舊土垣周八百四十五丈五尺東西南均高一丈基厚五尺頂廣一尺四寸西北隅築小土牆高七尺基厚三尺頂廣八寸北面接砌石垣高七尺厚三尺頂廣一尺西面濠廣三尺深七尺南面濠廣三尺深二尺門五曰

東門曰東北門門外加築甕城曰西門曰西北門曰南門題曰永甯嗣後居民比櫛毫無隙地道光二十年同知興齡捐俸勸輸復行展拓仍築土墉周一千六百七十三丈五尺東西南均高一丈五尺基厚五尺頂廣二尺北面仍砌石牆高九尺基厚四尺頂廣二尺又建浮圖於北山巔名文筆塔今圮廢門如舊制

祠祀

祀典有五法施於民以死勤事以勞定國禦大菑捍大患是雖神道設教而實明德惟馨也豐鎮祠廟合於典者舉之莫廢豈梁武溺數十萬眾於淮上而虛崇同泰浮圖宋徽棄萬生靈於山後而徒高神霄教主孽自己作猶妄祈福乞報乎夫蚩蚩顛蒙勸以福善之說而愆然者懲以禍淫之說而惕然矣故人雖愆不畏死猶知向木形土偶而稽首是象教亦足補聖化之窮苟非狄梁之毀淫豈為端木之去籛周公曰祀於新邑咸秩無文言雖祀典不載而義所當祀亦敘而祭之彼創始者必有取焉然則廳俗輝金煌碧暮鼓晨鐘亦未可厚非者詎得以蠱惑人心而槩廢歟

城隍廟在城內西街乾隆三十三年同知威中額三十七年同知八格建四十五年同知春普署同知增祿修六十年同知湍東額重修增建抱廈道光八年同知松祿咸豐四年同知恒裕相繼修葺俱有碑記

龍王廟在城內東街乾隆七年鎮甯所千總張祖述建四十五年署同知增祿修五十五年同知成熙五十九年同知湍東額重修嘉慶元年增建鼓樓道光二十七年同知書勳同治

四年同知文山六年同知成錦相繼重修俱有碑記廳境高廟子張

舉兒大莊科四美莊官屯堡等處及各村莊龍王廟俱係創建茲不備載

關帝廟在城內東街乾隆十一年大朔理事通判長世圖初建五十六年同知阿永修嘉慶八年同知訥福署同知明祥二十年同知松音道光十五年同知松祿咸豐二年同知恒祐署同知伊麟泰署同知慶麟光緒六年闔城舖商相繼重修俱有碑記一在奧包山巔乾隆四十八年創建有碑記行旅經此必詣廟拜跪有禱即應匾額層疊香火不絕住持云此廟乃天現也乾隆三十年此地尚未墾科農人昧爽開墾見

奧包旁有廟宛然 關帝宮當雲興雨霽時尤顯明遂於山

腰建小祠後因時祀不便乃移廟於天現所增其式廓東南隅鼓樓近奧包焉嗣後屢次修葺石刻俱詳茲不贅一在廳治東百里舊大梁山徑險巖為守口出入要路緣鳥道盤旋曲折而登攀崖踰嶺不啻羊腸坂蠶叢路之危峻行旅病之土人因建 關帝廟於山椒云

大王廟在城東二里小石元山舊有小祠祀金龍大王在今廟後石奧包側係遼天慶五年建修嘉慶十九年同知松音重修移廟於山巔前近靈泉改建大殿三楹寢宮三楹道光二

年同知松祿重修七年復於廟西南隅創建 呂祖閣一楹
名看海樓閣右建亭二楹牌坊一楹院內腰亭三楹厨室二
間二十四年同知聯綬又於後院寢宮左側建係嬰 聖母
祠右側建增福財神祠各一楹油酒仙翁附祀於 財神祠
內咸豐二年同知恒祐重修俱有碑記一在城內 龍王廟
左側乾隆二十四年通判圖明阿建

聖母廟在城內 關帝廟左側乾隆二十一年通判觀光建
財神廟在城內 關帝廟右側廟內兼祀 馬王乾隆二十一
年通判觀光建一在城內西街光緒二年同知薩麟建有碑

記

八蜡廟在城內東街 霜神廟西乾隆二十六年通判圖明阿
建廟內兼祀 五穀神

霜神廟在 八蜡廟左 龍王廟右 風神 湖神附祀 龍
王廟內俱乾隆二十一年同知八格建

火神廟在 關帝廟右 龍王廟左乾隆六十年建 老君

魯班 孫臏 吳道子附祀廟中 太陽真君則專祀於牌
坊閣上咸豐四年被火焚燬同知恒祐重建

文昌 奎星一閣在小東門上

馬王閣在小西門上

玉皇 三清 三官

觀音一閣在城東南隅南門上向在廳

署西南隅於道光十四年移建於此其舊址改建牌坊下修
三元橋俱有碑記

正覺寺在城外東南郊嘉慶三年同知湍東額建二十一年同

知松音修道光元年署同知奎斌重修咸豐五年被火焚燬

同知恒祐建修七年工竣俱有碑記

鄴侯廟在正覺寺內迤西嘉慶二十五年同知松音建道光三

年同知松祿告成有碑記

河神廟在城東北隅大東門外倚雷雲山前瀕新城河創建無

考同治三年雷震山崩毀損廟壁神像同知文山重建

牛王廟在河神廟咸豐二年同知恒祐建

山神廟在牛王廟內西巖之半椒旁有大仙祠光緒三年建

背山面水稱為勝境

厲壇 先農壇舊壇址道光十二年同知承章設立於大南門

官廳內

白雨龍王廟在城東八十里八棱山

馬王廟在城西四十里馬王廟村內有 關帝 財神祠雍正

十一年大同總兵李如柏建初大同營牧廠在陽和衛是年
移此道光元年因馬廠毗連民地有礙營牧復移牧廠於正
黃旗此處牧地空閒招民墾種因以廟名村焉三年增修光
緒元年因廟貌傾圮神像跋斜村民楊秉貞首倡重建輸孔
方千餘緡移舊廟於路北增建正殿九楹李洪募化助緣集
腋成裘獲數千金建東西兩廡各五楹過殿三楹鐘鼓樓二
楹山門二間樂樓三楹廟外植以樹木礪山帶河稱勝境云
圓果寺在城東六十五里擺烟圖村

懸雲觀在城東百一十里雲門山其山高峻由正南乘石磴拾

級而登路繞羊腸幾經盤曲行六七里方至觀所內建佛
殿三楹東廡觀音殿西廡三皇殿各三楹大殿後有石
洞甚深邃內塑三官像觀之西有仙人橋捨身崖形如虹
腰人莫敢至高五六丈峻嶒突兀石色蒼翠丹碧相間陡
出懸空勢若欲墮崖之巔有地一區約半畝餘俗稱早種晚
收旁一大石上面平濶名金場面前有古洞南向深不可測
相傳王禪老祖修煉處從百步外望之洞口最真近杳然無
蹟每當月夜風晨天空人靜時常聞擊鉢聲三五里外更嘹
唳然終不知何許人迤西又有古洞亦南向常有羽士在內

修煉再循鳥道而躋盤迴曲折高數十仞若在雲表則陟山巔
矣俯視羣峯如蟻垤然洋河諸水真同襪綫其他龍首鴈門
菱角葫蘆諸山海了了可辨至若奇花異草古蹟仙蹤多且
有真塞北第一勝境也

公署

地既設官君必立署非侈壯麗便私安也。涖堂皇者種德名區澤周節屋勞心公務恩答楓宸亦既聿來胥宇固當職思其居使以遽廬傳舍視之官為過客署如逆旅致令斗拱含風瓦衣卧地而猶泄泄寢興承前解以儼臨躡後福而倖去於敬君勤民之謂何所願堂上塗黃補苴不怠廳前莎綠灌漑常勤庶幾甘棠留召翠柏思萊不為竹馬兒童銅蚨父老所竊笑也。

廳治

在城內東偏舊係大翔理事通判公署乾隆二年大同縣知縣李伯謙估計鎮甯所千總王與朋督工建修十八年通判色明增修二十一年通判奉文裁缺衙署空間詳准留作豐鎮廳署二十五年通判圖明阿重修三十八年同知八格增修咸豐二年同知恒祐建修光緒元年同知玉麟重修大堂

二堂壯麗踰初

大門 三楹 大堂 三楹 二堂 三楹 儀門 三楹 書吏房 東西各三楹 役班房 東西各三楹 庫 一楹 在 庫書房 三楹 門子房 二楹 宅門 一楹 門房 東西各二楹 書室 東西各二楹 內宅門 一座 住屋 三楹 廂房 東西各三楹 花亭

三楹 廚房 三楹 東小院上房 三楹 西小院 西房五楹 南房三楹 獄門在大
禁卒房 二楹

司獄署

在廳署西側乾隆十一年鎮甯所千總張祖述估計承建

大莊科巡檢署

在廳境東八十里大莊科村乾隆三十四年同知威中額估計承建

豐鎮廳巡檢署

舊在廳境東北二百二十里高廟子村乾隆二十一年通判

黃大鶴承建四十年移駐廳東北一百四十里張皋兒村

豐川營守備署

在廳境東北高廟子村乾隆四十三年同知威中額承建外
堂內室軍裝庫三楹火藥庫一楹隨營外委住房四間營房
一百六十間

四美莊把總署

在廳境東北八十里四美莊村乾隆三十四年同知威中額
承建

豐鎮營把總署

在廳治東北隅乾隆二年大同縣知縣李伯謙奉文估建二
十五年通判圖明阿增建營房六十間舊係鎮甯所千總署
乾隆十五年裁汰所官衙署空間二十六年奉文撥給新設
豐鎮汛把總駐劄光緒七年把總靳汝功重修大堂三楹二
堂三楹大門一座二門一座庫房二間

橋梁

渡以濟行旅梁以通車輿故周官司川澤之阻國制嚴津渡之修夏令曰九月除道十月成梁令人利涉而不病涉焉苟澤不破障川無橋梁則厲深揭淺寒洄堪憂土淖泥濘沮洳足慮雖司塗之咎而將移於守土矣是必徒杠輿梁務期普濟使能舉偏興墜葺舊增新庶不復致單襄之誠亦不必踵國僑之惠也夫

通順橋在城南舊城濠上向係架木為之咸豐元年改建石橋長四丈廣七丈有碑記

三元橋在城東街牌坊南舊城濠上

新城河橋在廳治東門外新城河上乾隆二十五年民人王良募建砌石為橋長八丈廣二丈高一丈下洞三上有石檻嗣因疊次開墾牧地衆流會注河水漲溢石橋圯廢每年霜降前架木成梁長六十二丈廣一丈一尺高八尺立夏後徹梁本城八行舖商任其事

五里橋在城東南得勝河上距廳治五里五臺眾村民任其事望城橋在城東南得勝河上距廳治七里三臺道村民任其事利涉橋在城西南聚寶莊河上距廳治八里富喜村民司其事

樂善橋在城東北一百八十里二道河後河上光緒六年創建
豐盛堡闔鎮舖商任其事

淮銀石橋在張皋兒潭源渠上係南北往來要街上有石檻橋
雖小而甚堅固

義學

古者家有塾黨有序自王宮國都以及閭巷莫不有學俾肄業者八歲入小學十五入大學學古有獲非徒教以灑掃應對進退之節禮樂射御書數之文已也而又慮寒儒就傅力不能支於是義學之設以廣鄉學之教育補成均之不逮焉昔漢明帝冠帶環橋使期門羽林之士皆通孝經章句時則有若單于猶且遣子入侍况我

朝文德誕敷人遊太平之宇熙熙如上春臺俾郡縣廣設義學凡鄉城貧寒子弟皆納之軌物得身親講學明倫之地童而習之朝漸夕摩迄於成材上之建功立業次亦不失為謹厚循良成人有德小子有造譽髦斯士比戶可封雖風動時雍之盛不是過也豐鎮自設立以來並無學校黌宮而有義學以造就之君子詩書小人樂利文教亦蒸蒸蔚起矣故志義學而以教法附之

本城義學

在南街古地名衙門口設自雍正年間向係官捐資給乾隆七年通判顧世衡以龍王廟迤東官地六十八畝城南三十畝河東三十畝東河畔十五畝共地一項四十三畝撥入義

學聽館師歲收租息以資膏火

鄉村義學

慈老溝村道光年間里民楊仲元施地一項為館師膳
小莊窩村道光年間廟僧沙爾沁施地若干畝歲收租息油
麥九石八斗八升大炭二千觔給館師脯金膏火

教法

粵自帝敷五教王明七教樂正崇四術立四教春夏教以禮
樂秋冬教以詩書蛾子時術學以積成故釋菜鼓篋以遜其
志宵雅肄三以官其始夏楚二物以收其威教人之法由來

尚矣秦李斯焚書坑儒古學既亡教法寢廢漢儒馬融絳帳
講學前授生徒後列女樂南郡士林譏之迨宋儒蔚起以倡
明聖道為己任考亭鷺湖之學註釋經義輯著成書體用兼
備詳且盡矣乃法久漸弛卑鄙之流視為具文

國朝崇道重儒雍正甲辰春頒朱子白鹿洞規於郡縣俾學者
從切己處做工夫非止寡尤寡悔下學之功能實乃希聖希
賢上達之基址千古教法莫踰於此故因志義學而附記條
目臚列於左

父子有親君臣有義夫婦有別長幼有序朋友有信

右五教之目

博學之審問之慎思之明辨之篤行之

右為學之序

言忠信行篤敬懲忿窒慾遷善改過

右修己之要

正其誼不謀其利明其道不計其功

右處事之要

己所不欲勿施於人行有不得反求諸己

右接物之要

義塚

澤及枯骨西伯稱仁後世義塚之設亦仿古掩骼埋胔遺意
宋天禧初於四禪院買地瘞無主骸骨官給錢六百幼者半
之後漸廢弛仁宗復舉世祖詔京師漏澤園天下府郡縣各
置義塚免科永著為令仁政溥矣或曰昔范文正公置義田
以厚宗族其子純仁以麥舟濟故人較之瘞貧骸於義地慈
惠為優然雖有生死之異而存心惟仁舉事惟義則一也夫
造物所以生生不已王政推斯心而加諸彼者祇此不忍之
心耳而體此不忍之心以行不忍之事非仁人君子其孰能

之則此義舉何可沒也故志之以為繼起者勸

黃旗道義塚地十畝嘉慶十五年同知珠拉置

留雲窰村東南義塚地一項一十畝道光三十年同知恒祐

置有碑記

二十一溝村北義塚地五畝咸豐九年公義社置

哈達街義地一項光緒七年忻州歲貢生薛壽朋置

養濟院

按兩漢於鰥寡孤獨老眊篤癯之人每詔郡國軫惻問亦有粟布之賜宋致和三年韓琦請罷鬻諸路戶絕田募人承佃以夏秋所得之課給在城老幼貧疾乃詔天下置廣惠倉崇甯元年詔諸道置安濟坊紹興二年詔臨安府置養濟院明洪武五年詔天下郡縣立養濟院凡孤獨許入院月給米薪夏給布

國朝因之即哀此覺獨之仁政也故志之

養濟院在城南郊其創始不可考舊例每歲自仲冬朔起至次年仲春晦日止每名給米八合三勺薪水菜錢六文逐日領取又每名給皮衣一件恐苦樂不均同知委司獄監理其費除官賞給外紳庶有樂輸者飭房登簿詳報並飭大莊科張皋鎮巡司照例辦理逐月造冊詳報道光三十年同知恒祐重修把總趙萬清仍顏其額每歲冬鋪商捐貲酌給米薪

巡幸

巡狩之舉昉自有虞沿及秦漢下逮前明巡邊軼事亦散見於史冊所以省方勸稼考制度正禮法觀民風明黜陟洵盛典也遼宋金元雲中為帝都西京地豐鎮密邇以巡以畋不可勝紀

國朝康熙中時巡載舉媿美唐虞廳雖窮荒邊陲實為畿輔右翼迄今稱道

翠華遙臨警蹕扈至士庶呼嵩歡騰舞蹈洵千載奇遇也

秦始皇三十三年幸碣石遂巡北邊

漢武帝元封元年帝親帥十二部將軍巡邊行至雲陽北歷上郡西河五原出長城單于臺

章帝元和三年春北巡狩二月進幸中山遣使者祠北嶽出長城

北魏太祖登國元年冬十月帝自營山遷幸牛川屯于延水南出代谷會慕容賀麟於高柳

二年冬十二月巡松漠還幸牛川五年夏六月復幸秋八月又幸

六年秋七月講武於牛川

十二年冬十一月帝討慕容寶至參合陂

天興六年秋七月車駕北巡築離宮於材山縱士校獵東北
踰罽嶺出參合代谷

天賜元年冬十二月車駕幸材山宮是年至五年凡四幸

三年秋八月行幸青牛山西登五要北原觀九十九泉

四年夏五月北巡自參合陂東過蟠羊山大雨暴水遂東北
踰石漠至長川

五年春正月行幸材山宮遂如參合陂觀漁于延水

太宗永興二年夏五月帝幸參合陂

四年冬十二月車駕北巡至長城而還

五年春二月幸高柳川

神瑞元年春二月幸材山宮夏六月復幸明年冬十二月又
幸

二年夏四月車駕北巡五月次於參合陂冬十月行幸沮洳
城

泰昌元年春正月行幸材山宮夏六月車駕北巡秋七月大
獮於牛川

二年夏四月幸高柳

六年夏六月北巡至蟠羊山冬十月行幸代
八年夏六月北巡至於參合陂

世祖始光三年秋七月築馬射臺於長川帝親登臺觀王公
諸國君長馳射賜中者金錦繒絮各有差

神麋元年夏六月行幸長川冬十月北巡畋於牛川

高祖太和九年夏六月幸雲泉池是年至十九年凡十幸

十三年秋七月幸雲泉池與羣臣御龍舟賦詩

十八年秋八月北幸懷朔武川柔元撫冥諸鎮所過皆親見
高年問民間疾苦貧窮孤老賜以粟帛

隋煬帝大業四年春三月車駕出塞巡長城

遼景宗統和二十年春三月駐蹕於鴛鴦灤是年至開泰九年
凡六幸

興宗重熙十一年春二月如鴛鴦灤十四年春又幸十八年
春又幸

十二年帝親征夏國會大軍於九十九泉

道宗清甯六年春如鴛鴦灤是年至太康六年凡五幸

大安六年春二月駐蹕雙山

壽隆三年春正月駐蹕雙山

天祚乾統五年春二月幸鴛鴦灤是年至保大二年凡六年
金世宗大定二十七年秋獵八月次雙山子

元太祖六年春二月帝自將南伐克捷於野狐嶺取大水豐利
等縣

太宗三年夏五月避暑於九十九泉

英宗至治元年秋八月車駕駐蹕興和

明成祖永樂十二年春三月親征至大同夏四月次興和

封爵

古者建象諸侯屏藩王室君班爵臣就封展親報功典至鉅也自秦郡縣海內盡廢封建之制後世持論者因王綰李斯異議於是各主一說互相排詆紛紛聚訟不可復置象矣然漢唐以來藩封列爵歷代不乏考史記年家世表列傳或食封郡邑或拜爵名藩諸公侯王雖有實授遙授之殊而一時帶礪之榮亦猶行古之道也

東漢代王盧芳建武十六年封芳乘王莽之亂借邊外兵掠地光武數討之至是入居高柳乞降遂封代王十八年復亡出

塞

武進侯隨憲昱弟建武十二年封

蜀漢新興王劉恂後主子景耀二年封後入晉襲後主安樂公爵按新興郡魏地遙取美名以為封號如蕭梁定襄侯趙宋雲中侯之類皆是

魏武進亭侯魯芝以討諸葛誕功封後進爵豫城鄉侯按武進前漢屬定襄郡後漢屬雲中郡建安中已廢魏武更置新興郡是封號尚沿舊縣名也他皆類此

晉代公拓拔猗盧建興三年封初并州刺史劉琨乞師代公助

兵三萬琨甚德之請於朝封為代公又與琨并力討劉曜於
晉陽破之遂晉爵為王傳至道武稱帝改國號魏

定襄侯劉興廣武侯琨兄為東海范陽二王所用有功封謚
曰貞子演嗣

定襄侯衛操勸說代公猗盧匡助晉氏東嬴公司馬騰聞而
善之表加將號封侯

北魏新興王元佗太宗第七子泰常七年封後坐法降公旋國
除 按晉志惠帝改新興為晉昌郡即北魏之永安郡也地
形志所載新興郡則梁武僑置非故郡地

定襄縣王元鸞恭宗孫太和十九年以赭陽失利由陽城陽
王降封

新興公元丕河間公與都子孝文時由平陽郡公謚曰平
新興縣開國子衍穆魏郡公羅子

南朝新興王劉嵩宋明帝第十一子齊受禪降封定襄縣公

新興郡王蕭大莊梁簡文帝第十三子大同元年由高唐縣
公晉封 按潁州新興郡蕭衍置見魏地形志

新興王陳叔純宣帝第二十八子至德元年入隋為河北令
定襄侯蕭祗梁封太清三年北降

定襄侯張冲臨沮伯邵孫梁武帝時以軍功封

西魏新興縣伯豆盧永恩以迎孝武封邑五百戶

唐新興郡王李德良長平王叔良弟武德初封孫晉襲

定襄王李大恩

新興郡王李誠代宗孫端王遇子

定襄郡王郭英乂太原郡公知運子廣德元年以軍功封

定襄郡王阿史那存禮安祿山將歸降封

定襄公李宏號王鳳子

新興郡公趙文恪武德二年以佐命功封

新興縣公王君愕武德初封太宗時從征戰沒贈邢國公

新興縣公馬三寶柴紹家僮從定京師平薛仁果封新興縣

男貞觀初晉封

宋新興郡王吳蓋乾德中以憲聖后弟封

新興郡侯趙從都英國公惟憲子贈金州觀察使新興侯

元并王晃火帖木兒河平王昔里吉子泰定二年由嘉王改封

雲中王牙牙由唐國王改封 省志云雲中王牙牙阿沙不

花弟由康國公晉封按元史阿沙不花傳牙牙封康國王生

六子阿沙不花最賢又云母弟脫脫為名臣又按康里脫脫

傳脫脫父曰牙牙由康國王封雲中王阿沙不花之弟此承
脫脫言省志以牙牙為阿沙不花弟且二傳俱不言牙牙封
公是由康國改王雲中其非晉封可知

宣甯王速哥諡忠襄忽蘭孫天德子思俱追封雲國公

宣甯郡王乃蠻台木華黎五世孫至元三年襲國王爵至順
間封

宣甯郡王帖木兒不花至大四年封

宣甯郡王阿憐帖木耳至順元年封

威甯郡公月舉連赤海牙至順中追封諡襄靖

職官



郡守始於戰國漢更名曰太守百官志載北魏恒州領郡八
 州置刺史三郡置太守三舊制置州郡必置副貳以佐之亦
 猶縣之有令有丞有簿也專城分轄職雖不同要其治民守
 土之責則一考豐鎮改設廳治自乾隆十五年始歷代以來
 涖斯土者職制各殊或以文領武事或以武兼文職世遠年
 湮姓氏不無闕失今按有籍可稽者悉著於左

漢雲中都尉初名郡尉凡郡口二十萬舉一人
典兵禁備盜賊景帝更名曰都尉

鄭吉宣帝時

定襄都尉

趙不虞武帝元狩中

後漢定襄都尉

陰承

北魏柔元鎮將

奚直代人

豆盧長昌黎徒河人

撫冥鎮將

元業太和

元篤陽平王熙孫

柔元鎮司馬

元 瓌 高涼王孫

唐雲中守捉使 凡軍兵之戍邊者大

龐 勛 時中

李克用 乾符三年

後唐雲中令

畢中昱 雲中人

金鎮甯軍節度副使

烏古論仲温 蓋州人

威甯防城千戶

劉伯林 濟南人宣宗時

雲中羣牧使 明昌四年置羣牧所使掌檢校羣牧畜養蕃息

黜 公 雲中人

元雲中義軍千戶 凡管軍七百以上為上千戶所五百以上為中千戶所三百以上為下千戶所

孫 威 渾源人太祖初

興和路達魯花赤

紐的該 博爾朮四世孫至正中

國朝大朔理事通判 雍正十三年設駐劄衙門口乾隆二十一年改設豐鎮廳

三吉札布 正藍旗筆帖式乾隆元年任

長世圖 鑲紅旗監生乾隆十年任
顧世衡 鑲黃旗廕生乾隆四年任
明 鑲藍旗監生乾隆十五年任

領下府添人字

觀光 鑲黃旗進士乾隆十年

豐鎮理事通判 乾隆十年 監生 通判 移駐 豐鎮 通判

劉之館 山東諸城人 監生 乾隆十年 黃大鶴 江蘇如皋貢生 乾隆十年

觀光 鑲黃旗進士乾隆十年 圖明阿 鑲白旗筆帖式 乾隆二十四年

朝璧 正黃旗生員 乾隆十年 豐鎮廳理事同知 乾隆十年 移駐 陽高 改陽高糧捕同知 為豐鎮理事

豐鎮廳理事同知 乾隆十年 移駐 陽高 改陽高糧捕同知 為豐鎮理事

同知 移駐 豐鎮

咸中額 鑲藍旗舉人 乾隆十年

三藏寶 蒙古人 乾隆十年

八格 正藍旗人 乾隆十年 額騰額 正白旗人 乾隆十年

春普 廂藍旗人 乾隆十年

滿東額 正黃旗滿洲 乾隆十年

隆昌 廂紅旗嘉慶三年 領下

松山 廂黃旗嘉慶四年 領下

訥福 廂藍旗嘉慶五年 領下

松音 廂紅旗嘉慶八年 領下

明祥 廂藍旗嘉慶八年 領下

珠拉 廂黃旗嘉慶十年 領下

塔清阿 正白旗嘉慶十七年 領下

嘉慶十七年 領下

吉齡 正紅旗滿洲德山佐領下

保英 嘉慶二十年任

奎斌 正黃旗滿洲伊明阿佐領下

承章 正藍旗滿洲恒敬佐領下

祥璋 正白旗滿洲達善佐領下

松祿 由廂黃旗滿洲琦琛布佐領下

德楞額 廂黃旗滿洲恒山佐領下

富豐阿 廂黃旗滿洲耀奎佐領下

札克當阿 廂白旗滿洲富山佐領下

興齡 下廂黃旗滿洲公和世太佐領

聯綬 正藍旗滿洲宗室潤壽佐領

書勲 廂白旗滿洲多齡佐領

恒祐 正白旗滿洲由務府元裕管

慶麟 廂藍旗滿洲花里雅遜佐領

福祥 正藍旗滿洲松齡佐領

文山 下廂白旗滿洲德通佐領

成錦 下廂藍旗滿洲同治元精阿佐領

祿桂 下廂黃旗滿洲同治五年任

豐鎮	松	德	三	定	徵	薩	五	福
撫民	昌	溥	照	福	齡	麟	麟	增
同知	正紅旗	正黃旗	正藍旗	正紅旗	正藍旗	正藍旗	正藍旗	正白旗
知州	官學	處筆	筆帖	筆帖	筆帖	筆帖	筆帖	筆帖
光緒十年	光緒十年	光緒十年	光緒十年	光緒十年	光緒十年	光緒十年	光緒十年	光緒十年
六月	九	五	四	二	元	十	十	九
初一日	年	年	年	年	年	年	年	年
改理事								
管轄								

謙	李	謙	陳	謙	張	劉	馬
吉	恕	吉	贊	吉	心	鴻	元
順天府	順天府	順天府	山東	順天府	江蘇	直隸	甘肅
寶坻縣	寶坻縣	寶坻縣	寶坻縣	寶坻縣	寶坻縣	寶坻縣	寶坻縣
光緒十年	光緒十年	光緒十年	光緒十年	光緒十年	光緒十年	光緒十年	光緒十年
領	領	領	領	領	領	領	領
領	領	領	領	領	領	領	領
領	領	領	領	領	領	領	領
領	領	領	領	領	領	領	領

光緒二十年七月由清河廳調署

豐鎮廳司獄

師權 江蘇上元人 吏員 乾隆二十一年任

邵禹倉 浙江人 乾隆二十四年任

胡兆甯 順天府大興縣人 乾隆四十六年任

胡坊時 安徽甯國府甯國縣人 乾隆四十六年任

曹天桂 順天府大興縣人 監理 乾隆四十五年署

童士檢 順天府大興縣人 監 乾隆四十五年署

李予思 順天府宛平縣人 議 乾隆四十年署

何梅 湖北施南府未鳳縣人 署 乾隆二十年署

鄭恭和 浙江紹興府蕭山人 補授 嘉慶二十年

蕭肇晉 四川保寧府閬中縣人 監 嘉慶二十年

胡士楷 順天府大興縣人 署 嘉慶二十四年

羅奉鎬 順天府大興縣人 監 嘉慶二十四年

江思祖 江西建昌府南豐縣人 詹事 嘉慶二十四年署

羅奉鎬 順天府大興縣人 監 嘉慶二十四年

胡鈞 順天府宛平縣人 國史 嘉慶二十四年署

沈棠餘 順天府宛平縣人 署 嘉慶二十四年

呂立昇 道光二十四年兼理

朱立志 道光二十八年署

馮之晉 順天府大興縣人 監選授

黃增 直隸保定府清苑縣人 署

聶國英 直隸宣化府延慶州人 授

汪川如 浙江杭州府仁和县人 署

鄒行本 江蘇鎮江府丹徒縣人 授

王以肅 順天府宛平縣人 署

魯承晉 江西新建縣人 署

王昌 順天府義縣人 監

魯承晉 江西新建縣人 署

李乃筠 山東濟南府歷城縣人 授

王福田 陝西同州府大荔縣人 署

高忠信 直隸順天府東安縣人 署

陳韞書 陝西西安府臨潼縣人 署

何開岳 甘肅涼州府鎮番縣人 八月二十日任

豐鎮廳大莊科巡檢

何元炳 廣東連平州人 監任 乾隆三十三年

張宏位 安徽人 乾隆四十六年任

何元炳 嘉慶三年任

周舞賜 嘉慶十六年代理

白忠贊 四川酉陽州人 監署 嘉慶十九年

茹啟昆 順天府大興縣人 監署 嘉慶十九年

黃廷松 嘉慶二十五年署

李予思 道光二年代理

羅奉鎬 道光三年代理

張烈 道光十四年署

潘光祖 道光十四年署

姚汝平 浙江山陰縣人 監署 道光十九年

呂培元 湖北武昌府江夏縣人 監署 道光十九年

胡鈞 道光二十三年兼理

陳汝弼 道光二十九年署

吳寶球 安徽甯國府涇縣人 監署 道光三十年

李廷誥 河南府洛陽縣人 監署 咸豐元年

王楷壽	童培芝	紀鈞	崔文階	戴光涵	邵晉名	吳廷棟	張增慶	楚思孟
順天府	順天府	順天府	山東武定府	浙江紹興府	山東東昌府	江西南安府	江蘇蘇州府	江蘇常州府
附貢	生	監生	員	監生	吏員	監生	監生	俊秀
實城縣人	興縣人	文安縣人	商河縣人	余姚縣人	鄆城縣人	上猶縣人	震澤縣人	無錫縣人
九年	九年	八年	九年	十年	十年	六年	九年	九年
調對	補監	署	補授	署	補授	補授	署	任

豐鎮廳二道河巡檢
光緒十二年三月二十九日
移駐

楚思孟
江蘇常州府無錫縣人

豐鎮廳張皋免巡檢

孫蘭言 直隸清苑縣人吏員 乾隆二十年任

李震 順天府大興縣人 乾隆三十年任

劉應顯 安徽阜陽人 乾隆三十四年任

朱煌 江西瑞州府高安縣人 乾隆五十二年補授

胡兆甯 嘉慶元年兼署 甯國府甯國縣人

胡坊時 安徽甯國府甯國縣人 代理

魏廷勳 順天府大興縣人 署

李予思 順天府嘉慶十年署 甯國府甯國縣人 代理

嚴榮 直隸保定府清苑縣人 嘉慶十六年代理

周紹琪 浙江杭州府仁和县人 署

詹麒 浙江衢州府常山縣人 署

方應垣 順天府嘉慶二十年代理

金春普 直隸保定府清苑縣人 署

白忠贊 順天府大興縣人 署

甯丙耀 道光六年署

孟騰蛟 道光六年署

施繼祖 順天府大興縣人 監生道光八年任

賈汝專 道光十二年署

呂立昇 順天府大興縣人 議

何其沼 廣東嘉應州監生

周學謙 浙江甯波府象山縣人 選授

齊治 咸豐四年署

趙夢松 順天府大興縣人 監

呂烈文 安徽甯國府旌德縣人

徐國梓 順天府大興縣人 監

存英 廂黃旗漢軍慶升佐領下人 監生 光緒二年補授 四年調署仁義鎮

李崇善 浙江紹興府會稽縣人 監生 光緒四年

存英 廂黃旗漢軍慶升佐領下人

黃應業 浙江紹興府山陰縣人

沈守正 浙江湖州府歸安縣人

存英 廂黃旗漢軍慶升佐領下人

選舉

唐堯咨采例陋明揚虞舜考詢功臣枚卜此選舉之始也嗣是而後幣聘莘野之耕夫形求傅巖之築傭夢兆飛熊之釣叟賢興置免之野人登明選公不拘資格商周尚已漢制舉孝廉策賢良方正隋置進士科唐因之為帖括為詩賦宋以經術金以詞賦經義策論中選者為進士律科經義中選者為舉人明以制藝歷代科目取士首重進士皆古者言揚之遺至若茂才異等始於漢貢士之名始於唐明制有恩拔歲之分亦有鄉試副貢之例而武舉則唐武后始置宋仁宗親試之明初立武學科目定武試科甲大抵不離乎虎觀明經鷹揚奏績焉

國朝掄才選士不拘一途踵前代科目復增監生優貢例貢之名並登蓋榜以彰人才之盛豐鎮稱魏遼金元用武地設科制科得與此選者史傳所載何寥寥也方今

聖天子求賢若渴有時再舉賓興即闕門顧俊之盛心鄉舉里選之遺意都人士乘運而興德行才藝各獻賢能以功名及時自奮將見濟濟翼翼戔戔如也爰採數人著之於篇以揚前休且為後進勵

國朝

武科

王浮龍

原籍直隸懷安縣人寄居碾房窰村廷元第三子道光戊戌科武舉辛丑會試武進士任浙江麗水營守

備保陞甯海營參將賞戴花翎咸豐二年

王寶龍

征粵匪陣亡奉旨優卹世襲騎尉

王光龍

欽元第四子道光甲辰科武舉廣西懷吉營守備賞戴花翎

劉濟鉞

原籍忻州洋湖村人寄居公衙村道光己酉科武舉

王連生

浮龍從姪同治甲子科武舉

副貢

賀九疇

原籍祁縣人寄居本城同治壬戌科副榜

拔貢

戴謙

原籍陽高縣人寄居大東溝村道光科選拔

賀九疇

咸豐辛酉科選拔

恩貢

徐在魁

原籍大同縣人寄居本城

歲貢

郭傅

原籍忻州人寄居粗我村

潘綏周

原籍左雲縣人寄居河口灘村

岳鳳池原籍潭源州人寄居慶豐窠小山子村

例貢

麻世俊原籍崞縣庫狄村人寄居萬金莊沙溝堰村

張玉原籍潭源州人寄居三喜坪村

周

劉光裕原籍平遙縣人寄居本城

郝魚泮原籍忻州人寄居本城

兵防

文以致治武以戡亂此常經也如執耀德不觀兵之說謂窮兵黷武不若偃武修文於安不忘危有備無患之謂何故捍外衛內克詰戎兵兵可百年而不用不可一日而不備况豐鎮本蒙古故土久為魏遼金元戎馬蟬集之場借箸而籌烏可緩乎前明嚴墩墩設重兵有騎卒以戰有步軍以守而且總鎮鷹揚奮武虎帳宣威非不握奇致勝防禦精詳而雲中五原猶間有烽燧之警今

國家車書統同溥海內外來享來王梯航貢職邊民樂業安享

太平橐弓戢戈誰曰不宜然猶峙糗糒勤簡閱以重干城腹心之選以防不虞不虞之患未雨綢繆誠可為萬世法也詎得忘聖人足兵之訓而謂範陳八政師獨居終無容整飭戎行修明武備也哉

豐川營

駐防高廟子係豐鎮廳地方

守備一員

乾隆三十四年新設

馬戰兵二十五名

內外委一員 額

步戰兵四十六名守兵

五十四名馬二十四匹

內營馬二十匹 官自備馬四匹

歲支官俸兵餉馬乾等銀二千三百十三兩九錢零五釐
本折米四百五十倉石

隨營軍器

佛郎機砲二位隨小砲位 生鐵子一千顆 鳥鎗四十四
桿 腰刀一百一十口內弓箭兵六十六口鎗兵四十四口 馬兵白梭花
盔甲二十頂副 步守兵青梭花盔甲九十一頂副

馬兵每名戰箭四十枝 步守兵每名戰箭三十枝
帳房二十三頂副 鑼鍋二十三口 鳥鎗鉛彈四萬
七千五百二十顆 鎗砲火藥二千四十一觔四兩

教場

坐落本營迤東一里許

四美莊

把總一員

馬戰兵八名步戰兵二十六名守兵十六名馬九匹內營

匹官自備
馬二匹

歲支官俸兵餉馬乾等銀九百六十一兩六錢七分一釐
本折米一百八十倉石

隨營軍器

烏鎗二十四桿 腰刀六十口內弓箭兵三十六馬兵
白梭花盔甲七頂副 步守兵青梭花盔甲五十三頂
副 馬兵每名戰箭四十枝 步守兵每名戰箭三十
枝 帳房十二頂副 鑼鍋十二口 烏鎗鉛彈二萬
五千九百二十顆 烏鎗火藥九百六十觔

教場

坐落本莊迤東南一里許

豐鎮營

駐防豐鎮廳原為豐鎮汛把總隸得勝路守備管轄乾隆三十六年改隸豐川營守備

把總一員

馬戰兵九名步戰兵三十九名守兵十六名馬十匹

內營馬八

匹官自備馬二匹

後裁馬戰兵一名步戰兵五名加守兵二名

道光二十二年天津出師裁馬戰兵二名咸豐四年裁

步戰兵十四名守兵八名現今實在馬戰兵六名步戰

兵二十名守兵十名

歲支官俸兵餉馬乾等銀一千二百四十八兩四錢七分

一釐本折米二百三十倉石四斗現在每歲應領銀六

百零一兩五錢五分餘不等

隨營軍器

鳥鎗二十四桿 腰刀六十口 內弓箭兵三十六 馬兵

白梭花盔甲七頂副 步守兵青梭花盔甲五十三頂

副 馬兵每名戰箭四十枝 步守兵每名戰箭三十

枝 帳房十二頂副 隨簾細繩鋸梁柱 羅鍋十二口

鳥鎗鉛彈二萬五千九百二十顆 鳥鎗火藥九百六

十觔咸豐二年征兵交戰將原設軍火器械羅鍋帳房

鋤鑿鎌斧等項俱破爛損壞不全現今實在存營長把

刀五口撥沙皮金蟒緞旗一堂兵鎗十二桿備儲五年
烏鎗鉛彈二千五百顆烏鎗火藥三百六十二觔

教場

坐落本營迤南一里許

鋪遞

周禮行夫掌傳遞環人掌送迎蓋一取飛郵一取翔導馬至
達節館穀之司與廬舍止宿之地又有懷方野廬二氏在乃
羽檄旁午星軺苦辛前未及流水之行後已為積薪之室將
奈何是惟按其里而餽於官閒其軀以疾為應軍興之處倍

加額外俾無曠職無廢務無留難耳然則立鋪舍備烽燧墩
堠塘汛兵弁主之以急遞也亦以防守也整飭豈容緩哉

廳屬鋪遞七

總鋪遞一南路鋪
遞三東路鋪遞三

總鋪在本城

得勝鋪城南二十里

榆澗兒鋪城南五十里

孤店兒鋪城南八十里南接大同縣總鋪二十里

黑土臺鋪城東五十里

大莊科鋪城東八十里

張皋兒鋪城東一百四十里東接直隸張家口理事廳界

僻路塘汛二十處

裕如莊鋪 富貴村鋪 發祥村鋪 保和莊鋪 慶雲村

鋪 聚財村鋪 以上豐川營所管

隆盛莊鋪 拱照村鋪 樂成莊鋪 仁壽屯鋪 永善莊

鋪 吉慶梁鋪 留雲窯鋪 平裕莊鋪 以上四美莊所管

保全莊鋪 廣德村鋪 慶樂莊鋪 三臺道鋪 望城坡

鋪 豐收坪鋪 以上豐鎮營所管

驛站

三百里程途十二時定限泥封羽書豈細故哉至郵亭之設所以繼馬力之不及也蓋路當要衝差使絡繹不絕原設夫馬本有定額儻歲歉呼庚草豆騰貴或軍事旁午羽檄飛馳一當大差經過遞接不敷則咄嗟難辦手足莫措將何以應是惟預籌長策俾供役者無稍廢弛主持者時勤嚴飭庶不至坐耗國帑重困官驛也

廳驛在城內額設驛遞馬六匹馬夫三名歲支銀二百一十四兩七錢四釐廳舊無驛乾隆十年抽撥大同縣甕城驛馬六匹夫三名每夫日支工食銀三分每馬日支草料等項銀

八分四釐四毫遇閏之年加夫馬工料銀一十七兩八錢九分二釐

捕盜營光緒十一年經前署撫憲奎奏准口外七廳一律添設自是年七月初一日成軍

經制外委一員月支廉餉米折實銀三兩五錢八分六厘津貼錢三千文

額外外委一員月支廉餉米折實銀二兩五錢三分六厘津貼錢三千文

馬兵四十名每名月支餉干米折實銀二兩五錢三分六厘津貼錢一千文營馬四十匹

所需銀兩由歸綏道衙門按季請領其火葯鉛彈由本省軍裝局請領

隨營軍器

方旗二桿 尖旗四桿 馬鎗二十三桿 長矛二十三桿

馬刀四十口 號衣四十六件 戰裙四十件

武事

昔趙倚武安君為保障鴈門之捷匈奴遠徙十餘年不敢近邊自漢文絕其和親遂入寇中原為紫塞患而征人遠戍飲馬長城著於歌詠嗣後魏遼金元奠基朔方據漠北為故土迄於有明窮邊極塞尤為戎馬出沒之區武事不綦重哉我朝德威遠播人不知兵共頌昇平生全安樂未有感於此時者也然文人逸士登單于臺而弔古遙望龍堆近覘馬邑想見李驃騎霍嫫姚之偉績如在目前生於斯官於斯者苟以為陳迹而弁髦視之則蔑古必不宜今其克奮武衛也幾希

漢熹平六年八月烏桓校尉夏育出高柳中郎將田晏出雲中中郎將臧炅率南匈奴出鴈門各將萬騎出塞二千餘里鮮卑檀石槐逆戰育等大敗

後魏始光元年宣城王奚斤將軍安原閭大肥出雲中白道至漠南

延和五年大武西伐沮渠牧犍宣都王穆壽輔景穆居守長樂王嵇敬建甯公崇二萬人鎮漠南以備蠕蠕吳提果犯塞壽素不設備賊至七介山京邑大駭爭奔中城司空長孫道生拒之於吐頽山會敬崇等破吳提兄乞列歸於陰山之北斬

首萬餘級吳提聞而遁走道生追至漠南還

隋仁壽元年行軍元帥楊素出雲州敗達頭可汗

唐貞觀四年二月總管李靖餘馬邑任城王道宗出大同道幽州都督衛孝節出恒安道

乾符五年正月雲中兵馬使李盡忠等夜執防禦使段文楚雲中守捉使李克用以兵趣雲州行募兵得萬人次鬪雞臺城中執文楚至殺之遂進擊甯武陷岢嵐軍

遼保大二年宋宣和四年也正月遼主延禧獵於鴛鴦灤聞金兵至遂奔雲州

三月金粘沒喝敗遼兵於北安州獲其將衛習泥列因知遼主在雲州宿衛單寡報其都統斜也曰機會不可失也於是斜也出青嶺粘沒喝出瓢嶺遼主聞金兵將至趨白水灤粘沒喝以精騎襲之將近遼主行營遼主乃覺率輕騎走夾山遼主出奔使耿守忠救雲州金斜也與粘沒喝擊走之時雲州城西有浮圖遼據守更下射攻城者斜也曰必奪是城乃可下會金將幹魯鶻巴魯攻浮圖奪之以精銳下射城中城中震慄留守蕭察刺開門降

四年正月夏稱藩於金金以下寨以北陰山以南雲中之地

二千里界之雲中古雲中也

金大安二年八月留守胡沙虎及元木華黎戰於定安敗績元遂陷雲朔豐勝

元至正十八年二月黃河萬戶田豐降劉福通以曹濮兵轉掠而西踰太行焚上黨遂掠晉冀鴈門及大同諸州復大掠而南

六月關先生破頭潘等分二道一出絳州一出沁州踰太行破遼州轉掠晉冀鴈門之間至是復掠大同諸州及塞外諸路平章察罕帖木兒遣將關保擊却之

十月關先生南攻保定不下攻陷完州遂北掠塞外攻大同達魯花赤定者帖木兒棄城遁城陷

明正統十四年夏也先謀入寇都督同知毛勝偕平鄉伯陳懷等率京軍三萬鎮大同懷戰歿勝脫還

天順中毛里孩據套分掠水泉營及朔州佩將軍印楊信屢却之寇遂東入大同六年信與副將徐恕參將張瑛分道出塞遇敵戰胡柴堡敗之寇且戰且却復敗之獲馬五百餘匹成化五年提督軍務王越選輕騎出孤店關俘敵於威甯海子

十九年亦思馬因大入大同總兵官許甯分遣副總兵周璽
守懷仁甯與遊擊董昇營西山自將中軍擊之夏米莊敗績
甯昇被圍數重幾陷亟發巨砲擊之敵多死圍乃解璽聞中
軍失利亟還兵援夜遇敵乘勝前銳甚厲將士曰今日有進
無退大呼陷陣敵少却久之短兵接臂中流矢拔鏃戰益急
與子鵬及麾下壯士擊殺數十人會甯兵至中軍潰卒亦稍
集敵乃退許甯等亦還

二十一年督軍務余子俊請築長城五月都指揮顧綱以京
營兵六千助役

嘉靖十六年二月梁震出塞與俺答衆戰於玉林川廢宣甯
縣斬首四十餘級三月又戰於紅崖兒斬首八十餘級十七
年二月入安子山十八年閏七月俺答繇石窰溝入時五堡
初就梁震禦却之七月又入總兵官周尚文禦之斬五十餘
級內一人金帶錦裘二十三年九月入大同總督翟鵬禦却
之二十四年和川奉國將軍克灼坐罪奪爵怨望乃與襄垣
中尉克燾謀引寇入大同殺代王以舉事應州人羅廷璽與
其黨王廷榮以白蓮教惑衆入見克灼為妖言克灼因與畫
計約奉小王子入居大同藉塞外兵攻鴈門取平陽克灼為

王事定卽計殺小王子克灼然之先遣人持火箭焚大同草場五六所而令通塞外語者衛奉闌出邊總兵周尙文邏卒遮獲其所獻表物鞫實以聞克灼等伏誅

二十九年俺答數萬騎入塞伏精銳谿谷中巡按御史胡宗憲信敵誘乘醉趣總兵張達出師達欲持重宗憲厲聲責之不得已率所部出達素勇敢好離營繞鬪至是憤怒挺身陷陣寇兵圍之數匝達左右突不得出副總兵林椿別擊零騎於彌陀山聞達急引兵西救一日三戰亦陷重圍矢如雨達椿俱死軍盡歿

三十九年二月大同總兵劉漢自鎮河口出塞搗寇帳於灰河斬首二十八級奪高駝一百七十餘隻特寇聚喜峯口外漢乘虛攻其巢穴以牽制之寇果狼狽西顧自後各鎮往往乘間出勦寇始有戒心遠徙其幕

田賦

則壤成賦什一取民古聖王輕征薄斂誠以朝廷之經費卽民生之脂膏所關綦重不可不慎也自助徹廢而賦稅不均已非惟正之供唐設租庸調法猶為近古後以軍興分兩稅趙宋相王介甫復定青苗法民不聊生矣今

國家務農重穀田野日闢邊外駐牧餘地疊次招民墾種土之肥磽不等賦之輕重因之洵法良意美也第豐鎮地多沙磧荒熟無常民少蓋藏遷徙靡定所謂按其圖則是核其實則非者蓋地闊民稀與其糧浮於地曷若地浮於糧是在撫字

者時留意焉

○

一原額民糧牧地係雍正十二年裁豐川衛鎮甯所接收直隸張理廳移交撥歸經管並陸續開墾共地肆千叁拾壹頃叁拾捌畝肆分柒釐貳毫每畝徵銀壹分肆釐共徵銀伍千陸百肆拾叁兩玖錢叁分捌釐陸毫捌忽於乾隆二十六年奉文改征本色米地壹千叁百壹拾貳頃捌拾捌畝肆分柒釐貳毫內除正銀壹千捌百叁拾捌兩叁分捌釐陸毫捌忽每銀壹分改徵米捌合共改徵米壹千肆百柒拾石肆斗叁升捌勺捌抄陸撮肆圭實征民糧地貳千柒百壹拾捌頃伍拾

畝每畝征銀壹分肆釐共征正銀叁千捌百伍兩玖錢遇閏之年每正銀壹兩加征閏銀叁分正閏銀每兩隨征耗銀伍分此項應征正閏銀兩內除本衙門官俸役食銀捌百貳拾壹兩叁錢陸分又耗銀內除傾寶鞘木騾脚等項費用外餘剩銀兩按年解交綏遠城糧餉同知庫

存留項下

一存留官俸役食銀捌百貳拾壹兩叁錢陸分內同知一員俸銀捌拾兩書辦六名工食銀肆拾叁兩貳錢

門子二名工食銀壹拾貳兩

快手八名工食銀肆拾捌兩

皂隸八名工食銀肆拾捌兩

民壯二十名工食銀壹百肆拾肆兩

新添民壯四名工食銀貳拾捌兩捌錢奉文自行捐廉給發

捕役六名工食銀叁拾陸兩

轎夫四名工食銀貳拾肆兩

傘扇夫三名工食銀壹拾捌兩

件作二名工食銀壹拾肆兩肆錢

禁卒八名工食銀肆拾捌兩

更夫五名工食銀叁拾兩

改募解差四名工食銀壹拾玖兩貳錢

斗級三名工食銀壹拾捌兩 留吏一名司庫請領銀二名

司獄一員俸銀叁拾壹兩伍錢貳分

獄皂二名工食銀壹拾貳兩

弓兵六名工食銀叁拾陸兩 係從馬廠地糧銀內留支

張皋兒巡檢一員俸銀叁拾壹兩伍錢貳分

皂隸二名工食銀壹拾貳兩

弓兵十名工食銀陸拾兩

大庄科巡檢一員俸銀叁拾壹兩伍錢貳分

皂隸二名工食銀壹拾貳兩

弓兵十名工食銀陸拾兩

○ 一原額民糧改徵米地係乾隆二十六年奉文由前項民糧折

色地內改徵本色米共地壹千叁百壹拾貳頃捌拾畝肆

分柒釐貳毫每畝徵米壹升壹合貳勺共徵米壹千肆百柒

拾石肆斗叁升捌勺捌抄陸撮肆圭遇閏之年每正米壹斗

加征閏米叁合正閏米每斗隨征耗米貳合此項應征正閏

耗米除存留運米脚價外餘剩米石按年解交綏遠城糧餉
同知倉

一原額二道溝等處旗租地係乾隆四年招民墾種共地玖百
伍拾陸頃貳拾貳畝每畝征銀壹分肆釐共征銀壹千叁百
叁拾捌兩柒錢捌釐向不征收閏耗銀兩所征租銀存儲廳
庫聽候察哈爾都統委員領取公用由旗報銷

一原額太僕寺改折牧地係乾隆三十年奉察哈爾都統奏准
自三十一年陸續開墾三十六年陞科共地壹萬叁千伍百
柒拾壹頃柒拾肆畝壹分每畝征銀壹分肆釐伍毫共征銀

壹萬玖千陸百柒拾玖兩貳分肆釐肆毫伍絲遇閏之年每
正銀壹兩加征閏銀叁分正閏銀每兩隨征耗銀伍分此項
應征正閏銀兩除按年截留銀壹萬貳千叁百伍拾肆兩柒
銀伍分解交直隸口北道庫外餘銀柒千叁百貳拾肆兩貳
錢柒分肆釐肆毫伍絲又耗銀內除傾寶鞘木驟脚等項費
用外餘剩耗銀隨同正銀按年解交戶部

一原額太僕寺折色牧地係乾隆三十年奉察哈爾都統奏准
自三十一年陸續開墾三十六年陞科共地伍千貳百柒頃
伍拾捌畝每畝征銀壹分肆釐共征銀柒千貳百玖拾兩陸

錢壹分式釐遇閏之年每正銀壹兩加征閏銀叁分正閏銀
每兩隨征耗銀伍分此項應征正閏銀兩除原留改折項下
運米腳價銀式千柒百貳拾肆兩玖錢肆分叁釐解交戶部
外餘銀肆千伍百陸拾伍兩陸錢陸分玖釐又耗銀內除傾
寶鞘木騾腳等項費用外餘剩耗銀隨同正銀按年解交直
隸口北道庫

一原額五字圖廟旗祖地係乾隆四十三年庄頭二違子等認
領共地叁百叁拾陸頃貳拾陸畝每畝征銀壹分肆釐共征
銀肆百柒拾兩柒錢陸分肆釐遇閏之年每正銀壹兩加征

閏銀叁分正閏銀每兩隨征耗銀伍分除耗銀解交本省藩
庫外其正銀內除正紅旗總管委員領銀壹百柒拾兩捌錢
以作養贍什拉扣措六佐領下貧苦蒙民之用其餘正銀貳
百玖拾玖兩玖錢陸分肆釐存儲廳庫聽候察哈爾都統委
員領取公用由旗報銷

○ 一原額禮親王牧地係乾隆四十五年奉文查辦四十八年會
同查明該府廠地坐落正紅旗所屬胡魯素太地方因碍游
牧會兌換該旗西爾濟圖等處地方於五十年詳准招佃認
墾五十一年陞科共地壹千叁百叁拾貳頃叁拾玖畝每畝

征銀壹分肆釐共征銀壹千捌百陸拾伍兩貳錢肆分陸釐
遇閏之年每正銀壹兩加征閏銀叁分正閏銀每兩隨征耗
銀伍分又每公隨征該府私稅之四厘共征銀貳百貳拾伍兩
外餘銀按年解交綏遠城糧餉同知庫

○ 一原額承安牧地係乾隆六十年奉文庄頭推出招民認墾共
地貳千伍百陸拾肆頃貳拾壹畝捌分每畝征銀壹分肆釐
共征銀叁千伍百捌拾玖兩陸錢伍釐貳毫遇閏之年每正
銀壹兩加征閏銀叁分正閏銀每兩隨征耗銀伍分又每畝
攤征差銀壹釐陸毫貳絲陸忽貳微貳纖伍沙共攤征差銀

肆百壹拾柒兩此項應征正閏耗差銀兩內除傾寶鞘木騾
脚等項費用外餘銀按年解交綏遠城糧餉同知庫

○ 一柵牆口外馬廠地係大同鎮牧馬營地因水草並不暢茂馬
匹不能飽食經大同鎮奏准將承安入官地畝

思賞牧放營馬所有舊馬廠地畝於道光四五年間招民墾種墜
科共地柒百肆頃叁拾柒畝捌分每畝征銀壹分肆釐共征
銀玖百捌拾陸兩壹錢貳分玖釐貳毫遇閏之年每正銀壹
兩加征閏銀叁分正閏銀每兩隨征耗銀伍分此項應征正
閏耗銀除傾寶鞘木騾脚等項費用外餘銀按年解交綏遠

世○九○分○之○上○原○該○府○遣○及○自○行○領○取○所○有○之○項○同○稅○銀○內○除○傾○寶○鞘○木○騾○脚○等○項○費○用

征銀壹分肆釐共征銀壹千捌百陸拾伍兩貳錢肆分陸釐
過閏之年每正銀壹兩加征閏銀叁分正閏銀每兩隨征耗

外餘銀按年解交綏遠城糧餉同知庫

○ 一原額承安牧地係乾隆六十年奉文庄頭推出招民認墾共

地貳千伍百陸拾肆頃貳拾壹畝捌分每畝征銀壹分肆釐
共征銀叁千伍百捌拾玖兩陸錢伍釐貳毫遇閏之年每正
銀壹兩加征閏銀叁分正閏銀每兩隨征耗銀伍分又每畝
攤征差銀壹釐陸毫貳絲陸忽貳微貳纖伍沙共攤征差銀

肆百壹拾柒兩此項應征正閏耗差銀兩內除傾寶鞘木騾
脚等項費用外餘銀按年解交綏遠城糧餉同知庫

○ 一柵牆口外馬廠地係大同鎮牧馬營地因水草並不暢茂馬

匹不能飽食經大同鎮奏准將承安入官地畝

恩賞牧放營馬所有舊馬廠地畝於道光四五年間招民墾種陸

科共地柒百肆頃叁拾柒畝捌分每畝征銀壹分肆釐共征
銀玖百捌拾陸兩壹錢貳分玖釐貳毫遇閏之年每正銀壹
兩加征閏銀叁分正閏銀每兩隨征耗銀伍分此項應征正
閏耗銀除傾寶鞘木騾脚等項費用外餘銀按年解交綏遠

城糧餉同知庫

一 禮親王白塔溝牧地係道光八年奉文飭查前放廠地內有與牧丁酌留牧廠一段後因牧丁回京該府赴部呈明願將此地招民墾種於九年奉文自十年陞科共地伍拾貳頃伍拾陸畝柒分每畝征銀壹分肆釐共征銀柒拾叁兩伍錢玖分叁釐捌毫遇閏之年每正銀壹兩加征閏銀叁分正閏銀每兩隨征耗銀伍分此項應征銀兩內除領寶鞘木騾脚等項費用外餘銀按年解交綏遠城糧餉同知庫

一 順承郡王牧地係道光八年奉文查辦該府牧廠坐落正紅旗活賴溝地方因有碍游牧曾兌換該旗卓素圖等處地畝於九年奉部覆准開墾十三年陞科共地玖百貳拾頃伍拾畝每畝征銀壹分肆釐共征銀壹千貳百捌拾捌兩柒錢遇閏之年每正銀壹兩加征閏銀叁分正閏銀每兩隨征耗銀項應征正閏耗銀除領寶鞘木騾脚等項費用外餘

銀按年解交綏遠城糧餉同知庫

一 承啟推給黃榆窰教民段振舉等牧地係同治八年間承啟家丁盧太得受租錢推給教民等開成熟地壹百陸拾叁頃玖拾貳畝陸分後續墾餘荒地陸拾肆頃玖拾玖畝陸分二

城糧餉同知庫

一禮親王白塔溝牧地係道光八年奉文飭查前放廠地內有與牧丁酌留牧廠一段後因牧丁回京該府赴部呈明願將此地招民墾種於九年奉文自十年陞科共地伍拾貳頃伍拾陸畝柒分每畝征銀壹分肆釐共征銀柒拾叁兩伍錢玖分叁釐捌毫遇閏之年每正銀壹兩加征閏銀叁分正閏銀每兩隨征耗銀伍分此項應征銀兩內除順寶鞘木騾腳等項費用外餘銀按年解交綏遠城糧餉同知庫

一順承郡王牧地係道光八年奉文查辦該府牧廠坐落正紅旗活賴溝地方因有碍游牧曾兌換該旗卓素圖等處地畝於九年奉部覆准開墾十三年陞科共地玖百貳拾頃伍拾畝每畝征銀壹分肆釐共征銀壹千貳百捌拾捌兩柒錢遇閏之年每正銀壹兩加征閏銀叁分正閏銀每兩隨征耗銀伍分

銀按年解交綏遠城糧餉同知庫

一承啟推給黃榆窰教民段振舉等牧地係同治八年間承啟家丁盧太得受租錢推給教民等開成熟地壹百陸拾叁頃玖拾貳畝陸分後續墾餘荒地陸拾肆頃玖拾玖畝陸分二

項共地貳百貳拾捌頃玖拾貳分均於同治十二年造報陞科每畝征銀壹分肆釐共征銀叁百貳拾兩肆錢玖分捌毫遇閏之年每正銀壹兩加征閏銀叁分正閏銀每兩隨征耗銀伍分此項應征正閏耗銀按年解交藩庫

一原額攤征大同府原征左等十四團操丁徭銀叁百貳拾陸兩玖錢奉文在於額征民糧銀叁千捌百伍兩玖錢太僕寺改折牧地銀壹萬玖千陸百柒拾玖兩貳分肆釐肆毫伍絲太僕寺折色牧地銀柒千貳百玖拾兩陸錢壹分貳釐禮親王折色牧地銀壹千捌百陸拾伍兩叁錢肆分陸釐五字圖

廟折色旗租銀肆百柒拾兩柒錢陸分肆釐共征地糧銀叁萬叁千壹百壹拾壹兩陸錢肆分陸釐肆毫伍絲核計每正銀壹兩加攤丁銀玖釐捌毫柒絲貳忽柒微共加攤丁銀叁百貳拾陸兩玖錢按年解交藩庫銀叁百壹拾肆兩玖錢大同府衙門解差工食銀壹拾貳兩

一阿魯庫楞官荒空閒地畝係同治八年奉文查辦其地坐落察哈爾正黃旗第十四蘇木界內屢經查辦於光緒九年升科共地二千一百七十五頃三十五畝一分五厘每畝徵銀一分四厘共徵銀三千四十五兩四錢九分二厘一毫遇閏之年每

銀一兩加徵閏銀三分正閏每兩隨徵耗銀五分又每畝隨徵租銀四厘共徵租銀八百七十兩一錢四分六毫此項應徵正閏耗租銀兩除傾實鞘木騾腳費用外餘銀按年併解歸綏道衙門交納

一三佐領官荒空閑地畝係咸豐八年奉文查辦其地坐落察哈爾正黃旗達克党羅素拉什達爾濟玉林三佐領游牧界外屢經查辦於光緒九年升科共地一千六百三頃六十畝五厘每畝徵銀一分四厘共徵正銀二千二百四十五兩四分七毫遇閏之年每正銀一兩加徵閏銀三分正閏每兩隨徵耗銀五

分又每畝隨徵租銀四厘共徵租銀六百四十七兩四錢四分二毫此項應徵正閏耗租銀兩除傾實鞘木騾腳費用外餘銀按年併解歸綏道衙門交納

一麥胡圖湘公牧廠地畝係光緒五年奉文查辦該府牧廠坐落正紅旗豁爾托巴地方後因其地有碍游牧曾於道光十五年開免換該旗麥胡圖等處地畝於同治十年奉部覆准開墾於光緒九年升科共地一千一百四十三頃九十八畝三分每畝徵銀一分四厘共徵正銀一千六百一兩五錢七分六厘二毫遇閏之年每正銀一兩加徵閏銀三分正閏每兩隨徵耗

銀五分又每畝隨徵該府私租銀四厘共徵私租銀四百五十七兩五錢九分三厘二毫該府遺員自行領取所有應徵正閏耗銀除傾寶鞘木騾腳費用外餘銀按年並解歸綏道衙門交納

一榆樹窪官荒空閑地畝係光緒八年奉文查辦其地坐落察哈爾正黃旗游牧界外早經成熟亦於光緒十年升科共地二百四十五頃九畝每畝徵銀一分四厘共徵正銀三百四十三兩一錢二分六厘遇閏之年每正銀一兩加徵閏銀三分正閏每兩隨徵耗銀五分又每畝隨徵租銀四厘共徵租銀九十八

兩三分陸厘此項應徵正閏耗租銀除傾寶鞘木騾腳費用外餘銀按年併解歸綏道衙門交納

一紅毛營德瑞牧廠地畝係光緒三年奉文查辦該府牧廠坐落察哈爾正黃旗第九蘇木界內屢經查辦於光緒十二年升科共地一千八百一十五頃五畝九分每畝徵銀一分四厘共徵正銀二千五百四十一兩八分二厘六毫遇閏之年每正銀一兩加徵閏銀三分正閏每兩隨徵耗銀五分又每畝隨徵地主私租銀四厘共徵私租銀七百二十六兩二分三厘六毫該地盡自行領取所有應徵正閏耗租銀除傾寶鞘木騾腳費用外

餘銀併解歸綏道衙門交納

一烏拉胡祿公牧廠地畝係道光八年奉文查辦該府牧廠坐落正黃旗烏拉胡地方屢經查辦於光緒九年始經該旗指交地界於光緒十二年升科共地七百一十頃八十二畝每畝徵銀一分四厘共徵正銀九百九十五兩一錢四分八厘遇閏之年每正銀一兩加徵閏銀三分正閏每兩隨徵耗銀五分又每畝隨徵該府私租銀四厘共徵私租銀二百八十四兩三錢二分八厘該府遺員自行領取所有應徵正閏耗銀除傾寶鞘木驟腳費用外餘銀按年併解歸綏道衙門交納

一徵田房稅契銀每年叁肆拾兩不等

一徵油課稅銀壹百四十兩

一徵躉缸稅銀玖拾貳兩

一徵當稅銀叁百零伍兩

戶口

周禮秋官司民掌萬民之數自生齒以上皆書於版辨其國中與其都鄙及其郊野異其男女及三年大比以萬民之數詔司寇司寇及孟冬祀司民之日獻其數於王王拜受之登於天府蓋民為邦本國非民不立王所受於天地祖宗者莫重於此豐鎮自設衛所以來按戶稽口即以民籍實之嗣後生齒日繁凡成丁者咸入冊即窮陬僻壤皆隸籍焉自乾隆初裁衛所規模仍舊後雖改為廳治而戶口猶是也第土田磽瘠民無常產生聚維艱牧斯民者所宜時加軫恤俾煙戶

無嗟碩鼠歎群羊焉

通廳現在土著民人二萬六千八百一十九戶

男婦大名口十萬零二千五百二十五名口

男婦小名口四萬三千三百零五名口

本城

實在土著民人四千四百八十七戶

男婦大名口二萬一千零八十三名口

男婦小名口八千八百八十七名口

東鄉

實在土著民人一萬二千七百六十九戶

男婦大名口六萬零一十四名口

男婦小名口二萬五千三百七十名口

西鄉

實在土著民人三千四百五十七戶

男婦大名口一萬六千二百四十二名口

男婦小名口六千八百五十六名口

南鄉

實在土著民人三百三十七戶

男婦大名口一千五百七十八名口

男婦小名口六百六十八名口

北鄉

實在土著民人七百六十九戶

男婦大名口三千六百零八名口

男婦小名口一千五百二十四名口

新收

現年滋生民人一百二十五戶

男婦大名口五百八十七名口

男婦小名口二百九十三名口

以上戶口按年稽實冊報

原額徵丁徭銀三百二十六兩九錢乾隆五十九年詳奏
俞允丁銀全數歸入地糧徵收永不加賦

倉庫

倉以納粟米庫以輸金幣禹貢載之周禮職之依古無或改也然庫多在官府內署而倉必掌諸外吏啟閉尤宜嚴焉豐鎮常平倉儲以濟荒窮黎胥賴矣但官之那移者劃償無術民之借領者還補無期遂致兩病以興利之舉而為積害之端曷以善其後其必入勿中飽勿陷澤出勿外漁勿漏陂庶幾有備無患乎

國朝順治十一年令各府州縣俱有預備倉義倉社倉積儲備荒十二年題准各衙門自理贖緩春夏積銀秋冬積穀悉入常平倉備賑置簿登報其鄉紳富民樂輸者多方鼓勵勿勒定數勿使胥吏侵剋及加耗滋弊十三年議准積穀賑濟務令修葺倉廩印烙倉斛選擇倉書糶糶平價不許別項動支十七年議准常平倉穀春夏出糶秋冬糶還平價生息務期便民如遇凶荒卽按戶給散災戶貧民

康熙十八年題准地方官整理常平倉每歲秋收勸諭官紳士民捐輸米穀照例議叙留本地備賑鄉村立社倉鎮店立義倉捐輸積儲留本村備賑復公舉本村敦重善良之人管理出陳入新春月借貸秋收償還每石取息一斗年終將數

目詳報如有培剋者照侵欺正糧例處分有強派抑勒借端
擾民者察出治罪

常平倉在廳治東北倉廩五十間豐一廩裕一廩計十間乾
隆二十八年置通判堂瑛承建二十九年增裕二廩裕三廩
計十間三十年增裕四廩豐二廩二十二年三十三年增豐
三廩豐四廩計十間俱通判朝璧承建三十四年增豐五廩
裕五廩計十間同知威中額承建成豐三年同知恒祐重修
光緒七年同知德溥捐廉建修豐一廩裕三廩原為徵儲牧
地米石嗣因牧地改徵折色銀兩倉廩詳請存留分儲常平

倉穀現今常平倉內實儲穀一萬二千七百八十五石六升
高廟子倉在廳治東北高廟子邨倉廩十間乾隆三十四年
同知威中額估建現今守備署東有舊倉廩五間皆坍塌損不
全五間僅存故址不知何時圮廢查前碑記上鐫乾隆十一
年立其他字跡多磨滅不可識該邨正東七里卽直隸張理
廳屬之馬潮窪子邨也

庫藏

豐鎮錢糧歲內支解年清年款並無存儲亦無閒款庫藏尚
未興造乾隆末年始於大堂東側建庫一楹成豐二年同知

恒祐重修



風土

古稱幽并之民好勇任俠燕趙之士感慨悲歌唐一行曰晉代負險用武之國豈北方風勁土剛其民習兵地氣使然遂沿為風俗歟夫風樹於上俗成於下民從上也千里殊風百里異俗治因民也我

朝誕敷文德無遠弗届山陬海澨莫不欣欣向化道一風同革其舊俗矣豐鎮密迺

帝畿被服聲教尤早讀葛屨蟋蟀諸詩唐俗勤儉魏俗儉嗇塞北土瘠民勞俗尚質樸猶有古之遺風焉粵稽往古太史采風

以觀民俗易曰省方觀民禮曰陳詩納賈是詢芻蕘備採訪亦司牧者之責也爰據府志所載及今俚俗所尚並著於篇以資觀風者披覽焉

漢書地理志趙分得趙國鍾代石北民俗漢好氣為姦不事農商自全晉時已患其剽悍而武靈王又益厲之故冀州之部盜賊常為他州劇定襄雲中五原頗有趙齊衛楚之徒其民鄙樸少禮文好射獵鴈門亦同俗

晉書地理志冀州地有險易帝王所都亂則冀安弱則冀疆荒則冀豐

魏書食貨志太宗永興中勅有司勸課民田是力農歲數豐穰
畜牧滋息

宋史王仲德傳北土重同姓並謂之骨肉有遠方相投者莫不
竭力營贍若有一人不至者以為不義不為鄉邑所容

遼史地理志并州有代朔其民執干戈奮武衛風氣剛勁自古
為用武之地

遼史兵衛志并州以北勁風多寒隨陽遷徙歲無甯居

明史耶律楚材傳山後民質樸緩急可用

明布政李承式記雲北邊大藩鎮其俗驕悍軍氓雜處號稱難

治

士習 士為四民之首上之立德立功立言垂諸不朽次亦
不失品行端方為時表率非徒騁才藝苑博第科名也士而
曰習則以廉恥自勵氣節自操囿於鄉曲子衿佻達儒林不
茲矣竊幸啟謹之家父兄目不識丁性情酷嗜詩書其子弟
即不才亦必延師訓迪負耒之暇即令橫經往往誦讀數年
輒棄學力耕間有聰明子弟亦半塗而廢又兼貧寒之家多
其間質直自好之儒非負笈擔簦出就外傳不數載即改業
貿易無他憂貧之心勝於憂道故也我

國家重道崇儒自太學以及府州縣衛並建學宮釐定章程於
邊外獨缺彼時未設豐鎮耳迄今人頗務學苦無師承又且
應試艱難以致中止儻能建學宮創書院設立黌序再延名
宿主講訓誨辛勤將見朝漸夕摩越數年即士風丕變蒸蒸
日上即以是為高矢決之是又所厚望焉

農事 周以農事開基男務耕耨女重織紝誠以衣食為養
命之源一夫不耕則啼飢一婦不織則號寒民事不可緩也
所以周公輔成王書陳無逸詩譜豳風使先知稼穡之艱難
農之所係豈淺鮮哉大同孤懸塞外豐廳尤僻在邊陲土壤

沃少瘠多氣候風高霜早三春無花四季多寒故農人往往
於清明後始種麥立夏時始種穀小滿後始種黍豆等粟較
之大同陽天諸處猶遲半月且無水田盡待雨露其民服田
力穡雖有終歲之勤決無再獲之地因而俗尚勤儉恒存蟋
蟀之風焉現今屢放牧廠招民開墾其東北鄉土較腴窮黎
雲集村落星羅安居樂業頗無刁悍風自北而西而南地多
沙漠磽确人苦貧乏不解詩書近年頗多務學而應試維艱
棄儒業者十有八九是在觀民風者亟立學校以廣教化焉
工作 國有六職百工與居一焉城中大街通衢有九小巷

僻路亦數十餘條民房廛舍比櫛鱗密是以工用多而泥瓦木石諸匠實繁有徒雖師承不皆鳩拙然俗尚質樸不為雕華鏤采故奇技淫巧不鬻於市尚有先民遺風金錫陶埴之類率皆樸素渾堅極其粗陋足供備用而已求如西洋之精奇則相遜遠甚其他工作技藝亦日用之常無異通都大邑惟是皮革毛襖口袋等物匠藝最繁較他處為十倍云

商賈 易曰日中為市所以通工易事懋遷有無也本城服賈者率皆太原忻代雲郡蔚州人居民為商者不過十之一日在市廛亦但利逐蠅頭取給鵝眼微薄貿易而已非能擁

厚貨居奇貨往來運販歸化綏遠張家口各城為巨商大賈龍斷擅利所以俗尚勤儉有陶唐氏之遺風近年居闡闡者踵世邊居婚嫁隨之一切服飾競效素封之家務期華麗間有崇尚節儉不求麗都而反笑其齷齪然儉為美德長民者苟能示之以儉則奢侈之俗庶不至靡所底止矣

冠禮 冠禮所以責成人之道也載在禮書儀制甚詳柳柳州時已稱數百年來人不復行其禮蓋廢久矣前明尚有沿其遺意者今天下皆不行故不贅顧冠禮雖久不行而子初生取乳名呼不連姓成童就傅始命名連姓呼之曰官名及

長所業稍定乃字然僅朋儕呼之父師之前仍呼名其猶有古意歟

婚禮 古者仲春令會男女男三十娶女二十嫁今不拘也豐俗擇男女年齒相等兩家門第相當者媒妁通言兩家父母既許諾然後送庚帖合婚卜日男家先下聘名曰換帖有財禮羊酒首飾綉緞布疋貧富雖不同要即古問名納采禮也擇吉迎娶行納幣禮名曰下茶即附以請期書名曰通信即古納吉納徵請期禮也迎娶前一日壻家備肉麪納於女家謂其肉曰離孃肉麪曰離孃麪名曰催妝女家即以所資

妝奩納於壻家及期壻家備肩輿鼓樂燈籠車馬擇女眷中嫺禮者二人如女家逆女名曰娶親女家亦擇女眷中嫺禮者二人輿至壻家名曰送親即古媵遺意其親迎禮村莊士庶家尚行之城中紳士富戶亦間有行之者庶人概不親迎僅以女眷攝之壻向猶俟於門外今則俟於庭堂而已新婦既至壻家再擇女眷二人迎入中堂設香案行禮男拜女不拜名曰拜天地是夕行合巹禮如古制次日夫婦同拜先祖及父母及長族姑嫜親屬名曰拜堂即古廟見見舅姑禮也是日女家具酒饌送於壻家名曰圓飯即古饋舅姑禮也嫁

三日壻見婦之父母女亦隨壻歸省名曰回門婦在壻家住
九日在母家亦住九日名曰住九天取長久之義也至彌月
亦如之女住一月乃還名曰住對月繼娶閨女與初婚禮同
再醮則更簡略矣至婚期過早甚有十二三歲投室者故夫
婦年歲往往不倫近年有學識者恐夫綱易授婦執多閱歷
者恐求孫已先棄子頗改此俗而奠雁古禮一概不行
喪禮 喪事慎終易不如戚張橫渠曰三年之喪二十五月
而畢又兩月為禫禮鑽燧改火天道一變而情不能已再期
而又不可已更加三月是二十七月也蓋由初喪期而小祥

再期而大祥統計二十七月而禫始除服為三年之喪畢也
豐俗親始歿孝子披髮跣足朝夕擗踊哭泣無數具棺入殮
殯於中堂訃於戚友大功以上皆以麻括髮名曰下頭家人
裂布裹首三日成服齊衰以下各服其服晨昏奠每飲必薦
是日親戚僚友悉來焚紙帛唁名曰燒紙是夜用鼓樂哭訃
於城隍廟名曰送燈村民哭訃於五道祠名曰告廟七日設
祭焚紙錢受親戚賻奠名曰開帛亦有延禮生行家奠者每
七日黃昏後然燈燭焚香楮男女哭泣柩前名曰燒夜紙貧
民多有七日九日葬者富室亦有經年而後葬者惟紳士及

庶民之知禮家於百日内卜日治葬葬期之前數日送引狀
計期通報親知送靈前三日親友賻奠名曰辭靈其富者延
禮生如開弔家奠儀及葬亦如之亦有用僧道導引者柩到
墳前點神主祀后土祭壙畢反主於家凡置靈座用冥儀設
魂帛立銘旌繪容像造明器告遷柩設遣奠期功之喪亦必
素衣素冠皆如古制既葬三日主人祭掃於墓奠薦庶饌名曰安
竈又曰復三必親封土修墓名曰圓墳紳士家亦間有三五
日即哭於墓者但豐俗崇尚佛事近有苦塊之餘輒延賓朋
逢七齋僧作樂皆飾一時耳目之觀非禮也程正叔曰某家
遵文公家禮不作佛事

治喪不用浮圖在洛亦有化之蓋螺鈸西方之樂用之死者
之側是以其樂臨死者也今士庶每尚浮圖惟好禮之家能
祭禮 祭先主孝所以報本追遠盡人春露秋霜之感也程
子謂無遠近多少盡當祭之似亦太甚士庶不過三代仕宦
不過四代上至始祖則諸侯之禮也又推始祖所自出則天
子之禮也安可僭乎張橫渠曰祭用分至取其陰陽往來又
取氣之來時之均也豐俗祭祀先祖自元日至除夕歲時薦
新及父母生辰忌日紳士家皆祭庶人每闕略焉惟清明節

七夕家家與小女兒纏足穿耳學鍼蒲取乞巧之意

中元節祭埽拜墓與清明節同但祭品多薦時鮮若瓜果之類家家門首插麻穀食新麥蒸麩人麩魚親戚互相餽贈

中秋節各家俱用瓜果月餅供月其供月之餅名曰團圓餅分給家人不及親朋親朋另買餅以遺之節後輪流請客食餅月盡始止預於半月之前麩鋪俱開鑪做餅市中瓜果堆積聯絡不絕有如山如阜者然

重陽節多以餼羊獻天地名曰進平安牲飲菊花食糕間有登高者頗仿古人遺意

十月初一日家家門外焚燒楮帛五色花紙名曰送寒衣婦女號泣與清明中元節同

冬至城中鋪戶祀財神品儀甚豐其慶賀禮書館與在官者同俗言新冬舊年故拜冬與拜年同鄉邨少異

十二月初八日名為臘八前一日往河取冰融水次早晨喫棗兒豆粥不如葷俗傳如來佛講經日也

二十三日祀竈以糖餽俗名麻糖雖久沿用不解其說至除夕守歲與他處略同

七月望十月朔拜掃塋墓士庶共行若娶婦三月廟見亦應
祭祀而今多不行其祭儀貴者用五簋士庶家以三四味為
式富室用羊豕雞鴨酒醴黍稷麪食并時鮮若瓜果之類貧
家止用蔬食至祠堂之設此地概無惟位木主於中庭拜跪
從事而已其祀外神高賈雜技莫不立社酬神獨四月四日
五月五日記極隆重十八日次之除仲冬季冬兩月外靡月
不崇祠祀而紳士多立竈於爨室於八月初三日十二月二
十三日記之庶人多雜祀外神於中堂且有雜祀於寢者非
禮也其農人尤虔祀龍神春祈秋報亦必釀錢獻牲演戲與

各社同

節序

今夫志以紀事亦惟提綱挈領而已至節序之遞遷人事之
不齊如祭祖酬神與夫日用飲食賓朋宴饗瑣瑣者似可鄙
夷焉而不屑道抑知冠昏喪祭儀禮綦詳閭巷歌謠風詩併
錄與其挂一漏萬何如並蓄兼收况載在志乘正以驗人情
紀物理紀風俗考政治烏得略而不書故志之

立春前一日治署率紳民出東門外迎春東郊名曰迎春用
紙人一高三尺六寸五分按周天三百六十五度名曰芒神

用紙牛一高四尺長八尺名曰春牛以句芒神冠履服色與
春牛頭尾毛色占一年旱潦豐歉次日立春之刻禮生導引
用彩杖擊牛名曰鞭牛餞臘即所謂擊土牛以送寒氣也

元旦前一日家家壘若浮圖過夜半擇吉時用乾柴爇之名
曰旺火前夕用白紙尺許長八寸寬合成方箔每面二寸如
神主櫝然上貼紅紙三寸許按三代姓名書於其上名亡疏
置諸神主之側具果脯素饌供於案前約家中男婦老幼拜
祭名曰供疏元旦張燈結綵貼春聯具犧牲肴饌各以其力
為差祭天地諸神及祖宗畢家眾以次祝賀不論貧富飲酒

食太平餅俗名圓食天明外戚友朋亦交賀待以茶酒兒
童拜賀者賞或錢或核桃多寡不等名曰拜年

初五日名破五又名五窮日黎明各灑掃穢垢送於門外又
剪綵為人在街頭相更換名曰送窮婦女忌針指補窗罅大
抵是日宜補不宜破也

初八日俗名八仙日是日順禳星辰先是前臘各廟僧道與
相識者送迎祥疏一道至期家家布施各廟焚化神疏有八
仙社在城隍廟獻戲四期

初十日名十指忌鑿炭忌針指至晚逐家在室暗處點燈焚

香俗名鼠娶婦

上元俗名燈節鄉下多扮燈官唱秧歌互相徵逐仿儼禮城中各大街設棚迤三官木主於其中或用鼓樂或扮秧歌或獻戲十四十五十六日各晚大放花燈有燈山燈樹燈樓各名色煙火有丈餘高大旺火及時發之礮聲震天滿城燈火照耀如晝男婦游觀填闔塞巷行者如蟻聚者如堵治署飭差役巡查將近二鼓悉令下火此後鋪戶即接連擇吉發市發市之日各相拜賀

十六日至晚將除夕所供之亡疏盛以木盤燒化於門外名曰送疏亦有初三初六日送者

二十日名為小添倉二十五日名老添倉是日凡積米麩處必焚香拜祝甚有乘此日糴米麩以添蓄者是月先半月婦女忌鍼指日極多然是兩日尤忌俗語云過了老添倉羞死懶婆娘

二月初二日太陽星君聖誕家家設供日餅焚香以祭或有太陽廟獻戲者初二日名為龍撞頭黎明戶家按是年治水龍數投錢於茶壺汲水井中隨走隨傾至家則以餘數合錢傾入水甕名為引錢龍

清明寒食節家家禁烟火插柳枝蒸白麵烏與兒童戲名曰寒燕蒸寒食點心可入藥祭掃墳墓焚燒楮帛城鄉婦女多野哭者

四月初四日忻定社祀 關帝儀極豐隆獻戲之外又扮架戲數十齣舉國若狂男女同途禮義自守者能禁約至其奉帝君神像隨架戲徧歷街衢殊為不敬然 帝君座前用五色紙剪奇花異草極其鮮妍又用白麵染色做牌樓鐘鼓樓飛檐鬥角情景逼真用意之巧亦有足觀者

初八日子孫聖母會家家上廟還願至十二歲止有用銀人

泥人木人紙人以替死者有用羊雞者有用筍箒神幡者有婦人跪長香者此俗不獨在城為然即鄉下亦處處有之

端陽節家家門上插艾黏符兒童臂纏絲繩食角黍涼糕飲雄黃酒以驅邪疫前一日 關帝位前供果品花卉扮架戲二日與忻定社同名曰雲郡社

十八日城東大王廟獻戲酬神城中男婦各攜酒食茶具至其地聚會望海樓前觀山色聽流泉名曰踏青

六月初一日農民社 龍神位前報賽四日錢行社亦於是日在 關帝座前獻戲結綵懸燈觀者其麗不億

物產

禹貢方物之獻各因其地冀州獨闕厥貢非因帝畿也不責有於無也豐鎮古為新雲中僻陋塞北地瘠天寒實無奇珍然雖霜早收薄而土物之宜未可以邊陲而畧之也

周禮職方氏正北曰并州其民二男三女畜宜五擾穀宜五

種按此以周公

漢書河內曰冀州其民五男三女畜宜牛羊穀宜黍稷按此

分九州言然語與周禮無異未核其詳

穀屬

穀即梁也脫殼則曰粟米亦曰穀米總名小米今直名曰穀

北人呼穀子有青紅黃白數種孟詵謂人不識粟李時珍謂人不識梁穗大毛長而粒粗者為梁穗小毛短而粒細為粟性有軟硬之分其實一物也又粒細色白者曰梁穀亦有大小二種其黏者有紅黃二色去殼謂之小黃米

黍苗穗似稷而大實圓重土高燥者宜黍黍以大暑種故謂之黍刈後乘溼打則粃易脫有紅青黃白紫黑數種胥可釀酒其性亦分軟硬脫殼軟者謂之黃米硬者謂之斬米按詩緝云黍有二種黏者為秠可以釀酒不黏者為黍如

稻之有秠糯也李時珍云黍稷一類二種黏者為黍不黏者為稷猶稻之有稷糯也其說正相反嘗考黍稷之黏者曰秠不黏者曰稷又黍中亦有黏者曰糜黍糜實稷類也則詩箋說近是然今通稱黍子不復知稷矣姑兩存以備考稷似黍而小卽所謂糜黍也似粟而巨光滑過之先諸穀熟刈欲早過熟則實隨落米色特黃故土人稱黃米糜卽黍之不黏者北人去殼炒之謂之炒米稻一名秠有秠糯二種宜水田去殼謂之大米亦曰白米此地無種者

高粱卽芟子一名蜀秠以種來自蜀也南人謂之蘆稷有紅黃白三種黃白者性黏米可為粥亦可造酒李時珍曰蘆稷酒最能益氣和中諺曰處暑不出頭割得喂了牛謂高粱也

麥有大小二種大麥俗名草麥卽府志所謂橫麥皮肉相連造麴用亦有碾其皮以食者作粥飯殊滑藥可為錫有露仁不露仁二種小麥皮薄多白麴食之宜人生於山地麴硬色青生於川地者麴軟色白有火麥紅麥白麥和尚麥諸種漢武帝勸民種宿麥白露前種小暑後刈種收隔歲故

名宿麥此地早寒無種者大小二麥春分前後種豐鎮多在清明後種立秋後始熟諺曰齊秋拔夏是也明史御史徐汝圭條上邊防兵食謂宣大產二麥宜多方收糴

雀麥見爾雅一名燕麥一名油麥俗名莜麥莜即油字之譌夏種性寒宜邊地按博物志食燕麥令人骨節斷解吉樂府云道旁兔絲何嘗可絡田中燕麥何嘗可獲言虛名無用也今油麥中有黑稔長芒而粒大者土人謂之燕麥府志云似非油麥考核未真

莜麥俗譌作蕎麥去殼則為粃籽其種較油麥為遲早種者色黑遲種者色黃有黑斑二種諺曰中秋有月則莜麥多實別有苦莜一種俗名胡食子苗似莜麥而莖青花白實似莜麥而稜角不峻味最苦淘去苦汁可作粉餌北人飼馬者多用以為馬料

豆即菽也種類甚多大豆南人謂之蠶豆小豆有赤白黑三種豌豆有白綠二種白者味佳菜豆有摘角刈梗油綠二種又有大菜豆熟最晚此地早寒無種者豇豆有深紅淺紅淡白三種又有菜豇豆柴豇豆二種胥可為蔬亦可佐粥梅豆一名蓮豆佐粥甚宜為蔬最良有

紅紫白三種 青豆有大小二種或名茶豆 黃豆有大
小二種可造醬兼可作腐 黑豆俗名料豆入藥良有大
小二種 扁豆有白梨二種花如小蛾翅尾俱全成實後
磨粉麩 刀豆 羊頭豆 以上諸豆胥夏種惟豌豆扁
豆宜春種

麻有二種大麻卽草麻色蒼而顆大可榨油仁可入藥色紅
黑者名胡麻莖如石竹花小翠藍色子可榨油古者中國
止有大麻漢使通西域始自大宛得油麻故名胡麻一名
巨勝

玉蜀秫苗葉胥似高粱穗如秫麥葉旁別出一苞垂吐白鬚
久則苞拆子出顆顆攢簇有黃白紅黑四色黃白色者佳
俗名玉秫又名玉茭子近年又有西洋玉蜀秫顆扁色頗
白而味淡

黃芥子子可榨油又一種紫色者名黑芥子又一種紅色者
似芥菜子而差大名菜子胥可榨油

千歲穀高四五尺葉潤而尖苗帶赤色葉旁胥穗穗皆長條
下垂故名其子碎小光滑黏而可食又有二種穗上簇而
不下垂色黃名玉穀色赤者名老來紅

稗子顆大而白與野生者別五代史安重榮勸民種稗即此

蔬屬

蔓菁一名紅白二種芥菜花葉二種白菜箭杆二種牛肚菘形似劈

爛味美俗一名玉蔓菁蘿蔔紅黃白三種俗名蘿蔔性

之所高苴一名波稜菜原荳一作芫荳即胡著蓬

俗名甜菜根一名胡荽荳蔻一名胡荽皆高食

者忌蔥韭孝文非又名塞北狀如韭云是魏孝文帝所植

蕤葷菜似韭爾雅蒜二種茄子二種苣菜甜苦地皮菜似木

小地蕈菌之地上大者菌生木上小者麈菇類鹿尾菜俗名羊尾把

椿菜即麻黃地筍一名地留兒蕨根如紫草莖青苜蓿皆人馬

瓜屬

甜瓜 西瓜 香瓜 菜瓜有數種倭瓜 番瓜 看瓜 王

瓜藤一名葫蘆有西葫蘆藥瓠子 蕒瓜

果屬

桃 杏 李 果 沙果 郁李 酸刺俗名酸榴

木屬

楊 柳 樺 榆 檉柳 白楊 松 杆

草屬

蘋

萍

即藎草俗名藎草

龍鬚

蓆箕

即蓆具草一名塞路古詩云千里蓆具草

是草可為掃帚又可編筥

蒿

管

馬蘭

蓬有數種

地椒

艾

蘆

蒲

即馬藍一名歲可為澱

花屬

牡丹

芍藥

菊

種類甚多俗名向陽花

石竹

山丹

拳丹

即百合

雞冠

赤紫黃數種

鳳仙

俗名海納其色各別

玉簪

粉團

紅蓼

水紅

金盞

荷葉蓮

篆枝蓮

萬苣蓮

罌粟花

虞美人

荷包

瑤隆

牽牛

月季

金菊

柳葉桃

蜀葵

戎

葵 月季

石榴

藥屬

甘草

赤芍

白芍

大黃

柴胡

紫蘇

麻黃

防風

蒼朮

遠志

葶藶

蒺藜

杏仁

茵陳

薄荷

二丑

即牽牛子

百合

秦艽

藎麥

即石竹苗

蒼耳

茅根

黃耆

藜

蘆

瓜蒂

粟殼

御米

黃精

扁蓄

車前子

地骨

皮

益母草

大小薊

蒲公英

兔絲子

固精子

萊

服子

地丁草

夏枯草

蒿苣子

瓦松

草麻子

郁

李仁

扁豆子

巨勝子

藁本

木賊

王不留行

甘

葉秋涼屬蟻 螽蟴 蝻 蝴蝶 蚌 蝙蝠 壁蝨

水屬

魚 五色魚 水蛭 蜚 蝦


貨屬

靛 鹽 蘇 紅土 包黃 白土 石粉 豆粉 黃酒

燒酒 炒米 礞石 石灰 瓦器 氈貨 皮貨 硝

麻 胡油 醯 醬 天冰塊粒如石 表裏如玻璃 水晶狀 然脆而

不堅土人用以映窗令內外朗照無障俗名天皮



天

災祥

周禮眡祲掌十輝之法以觀妖祥保章氏掌天星以志日月星辰之變動辨其吉凶左氏亦謂分至啟閉必書雲物春秋書災不書祥書事不書驗凡以人事變於下天道應於上和致祥而乖致沴理有固然使人無時無處而不致其恐懼修省也是以古聖必兢兢於天人之際出王游衍無敢戲渝焉夫禾五穗麥兩歧虎北渡河蝗不入境六事責而膏雨降一言善而妖星徙孰非善政類應之祥徵然而夜星不見星隕如雨孛星入斗以及龍鬪石言隕霜拔木有蜚有域無麥無

禾亦未嘗不時見於史冊至若記災而并記祥亦謂雨雹地震固足示怪卽芝產河清麟遊鳳巢亦足見異修德而祥桑死聽神而號國亡苟不委為氣數之適然則人事之感通天道亦因之而變化震來虩虩庶可永孚於休也已

嘉慶七年夏五月本城富家巷民某宴客從窗飛入小蟲落屋壁似蚰蜒寸許行漸如筋長尺餘倚壁有几一几上有錫器二蟲飛近几几上二錫器鎔成汁蟲漸如蛇觀者目瞪口呆霹靂一聲破壁飛去滿座人昏倒後甦卻無所傷或曰龍也不然何其神歟

幻異

今夫怪為聖人所不語而幻異之端往往載在史冊登諸志乘似與聖教相違顧聖人不語所以正人心維風化而史乘所書亦以紀時事徵休咎故星隕石言春秋書之非矜奇也蓋欲人見幻異而克自警省使幻異胥消於烏有是亦聖教維世之意也夫

嘉慶五年秋九圍溝路旁自來石人高丈餘腰大十圍狀似佛者至今存

本城東門外新城河邊有石牛一頭北卧石上蓋牛屬丑丑
土取土剋水之意因以鎮河或傳乾隆四十九年自來二石牛後一去一存不知何據

人物



天地者人物之逆旅人物者天地之胎孕天地英華之氣不
間世而始鍾人物奇特之生不擇地而皆有是故人物之品
議者重焉特是古往今來時易代更或難彙集品誼悉登志
乘然存其名也實必副之紀其實也名可沒乎其上聖名賢
為萬世楷模者固可與天地同悠久即匹夫匹婦孝友彰於
鄉閭貞烈出於慷慨生德不爽死矣靡他無非天地鍾靈毓
秀而生亦能不朽於千古夫天地大矣其間丈夫女子忠孝
節義雖各異致而苦誼孤行貞操炳若日星山川為之生色

皆人物也皆可傳也豈論地之名區與僻壤哉語云十室之
邑必有忠信豐鎮雖處塞外其間氣所生不與侗儻磊落卓
犖人寰以垂不朽於斯世君子疾沒世而名不稱人物可湮
沒而不志也哉

韓廣成奉親克盡孝養性勤儉尚義資稍裕輒喜緩急人有窮
屬巡檢某歿其妻妾子女貧不能歸哀鳴嗷嗷幾至流離瑣
尾韓力任其事仗義捐金送歸梓里俾免黃鳥失所其他義
行周急恤貧排難解紛不一而足歿後遠近婦孺聞之無不
感歎流涕及葬送者千餘人

孝子

今夫子之克孝分也分所當為即為人之所難為初非為人
初不必求知於天下之人與後世之人何足志願孝為百行
之原子之孝雖非為人雖不必求知於天下後世之人而天
下後世之胥賴以安者必原於子之孝蓋一家之子孝而家
齊一國之子孝而國治天下之子孝而天下平天下後世之
事孰重於孝詩云孝子不匱永錫爾類又云永言孝思孝思
維則子不足志孝子烏可以不志

續天珍新城灣村人也乾隆五十二年邊外大荒薪桂米珠民

多流亡時珍尚幼其父外出十數年無耗珍母子乏食度日
幾死者數後成立矢志尋親山陬水澗足跡幾遍一日至陝
河套晚宿店主晉音也異之細叩來歷知為其父遂述所自
來父子相認悲喜交集已而將店產出售奉父歸買田屋父
子夫婦重為聚首珍婦尤善事翁姑鄉鄰稱之珍年八十二
而卒至今六世家道豐裕子孫蕃衍人皆以為孝德之報

張仁大莊科村民也家甚貧力耕自給其父進財素患腿疾艱
於步履每如廁仁親負出入至於飲食雖甚急迫必親侍之
久無倦色里人競傳其孝年已八旬猶健焉

孝婦

今夫孝根於性子與女本無殊也顧子有婦則孝哀女為婦則孝難非婦之性異也婦於翁姑無生育之恩有尊嚴之義較之子女則恩疏而愛薄而天下之為翁姑者往往寬恕其子女而苛責其婦婦亦因其苛責遂暗相詬誶不獨不以翁姑之心為心並不以子女之心為心故子女之孝難而婦之孝尤不易苟有其人是亦唐氏乳姑之後進烏可湮沒而不彰故志之以為世之為婦者勸

喬氏賀大有妻年十七歸賀性婉淑事親孝姑卒翁老得癱疾動作需人賀既無伯叔兄弟又服賈外出經年不返而喬事翁曲體順從惟恐不當翁意勞瘁備至略無倦色晝奉飲食湯藥不離側夜以繩繫臂而隔窗授繩於翁有所需掣繩動臂喬即隨掣而至如是數年其子九疇咸豐辛酉拔貢壬戌副魁人皆以為孝德之報

李氏弓玉妻年十八歸弓性柔順最孝夫服田力穡終歲勤動而李事翁姑先意承志克盡婦道姑歿事繼姑尤加孝敬繼姑又歿翁又娶李事之如一內外無間言不數年又歿翁已六十餘矣得腿疾卧病不能下牀李事之朝夕不離側恐他

人不當翁意凡湯餅甘旨必親奉之牀褥穢垢必親滌之如是十年未嘗有倦色及歿哀毀盡禮鄉鄰賢之

劉氏庠生李揚藻妻十六歲歸李性溫淑最孝後翁年五十餘得饑症甘旨不能下咽惟求乳汁養之適劉氏生次子歿擠乳乳之六閱月翁病愈後間數月復病劉復乳之屢病屢乳至翁歿如是九年不倦時人難之親鄰皆以為賢

常氏劉源之妻十七歲于歸事親孝祖姑年逾七旬得病將危醫藥罔效常哺幼子以他食而乳其祖姑數年不倦病尋愈鄉鄰皆以為賢

樊氏翟廷采妻性柔順至孝歸翟後其祖姑失明姑患腿疾俱動作需人是時其曾祖翁姑猶在年邁力衰終年卧病其夫服田力穡終歲勤動不暇內顧樊以一身支持力事三世飲食湯藥糞除穢垢數十年不倦內外無間言遠近賢之

節婦

自來婦主中饋無非無儀以順為正而已譬之芳華春榮夏
茂風蕩月妍責以經霜猶勁凌雪不凋蓋亦難矣又况有齋
之女斯飢之季曷其有常然或以節著矢丹心於皓首或以
烈傳蹈白刃於青春植大義樹綱常徽行懿德為千古不可
磨滅者不乏其人何兩間正氣萃於女子之多耶顧窮鄉僻
壤莫為表揚遂湮沒而不傳者不知凡幾我
朝表厥宅里於窮簷陋巷之壺儀閨範足增閭里光者凡年例
已符不分存沒其姓氏皆得上達

楓宸建坊

旌表以慰潛德以闡幽光而輕生刳股者不與豈徒巾幗之楷
模哉抑使長樂老人輩覩顏而抱愧也爰採史志紀載並訪
故老傳聞其軼事可嘉悉為纂入不濫不遺亦標孤芳於奕
世扶正氣於千秋云爾

相氏王孝妻年十七于歸家貧孝嘗傭工於外鄰有無賴徒某
窺其夫出意謂質弱可欺以言挑之相拒之甚嚴逼之相恐
不免詭令出窺人遂閤戶而自縊乾隆四十五年 旌表
張氏姚攀龍妻年十七歸姚翁姑年邁環堵蕭然張事親孝持

家儉年二十八夫歿遺四子矢志守節含苦茹荼撫子成立
壽七十而終咸豐癸丑 旌表

王氏李振業妻年二十三夫亡遺子茂未週歲家無擔石王截
髮毀容矢志苦守持家訓子克儉克勤壽六十而終咸豐三
年 旌表

李氏劉恭妻年二十八夫亡矢志不二守節五十一年

范氏薄登旺妻十七歲歸薄年二十二夫亡無所出嗣夫兄子
成運為子撫養成立矢志靡他壽七十四而終守節五十二
年

劉氏嚴存和妻年十七于歸三年夫歿矢志守節堅如金石姑
病劉侍之每夜數起三年不懈姑沒哀毀盡禮後事繼姑尤
謹其子遵母教亦以孝聞卒年七十五道光五年 旌表

李氏胡兆魁妻年二十九夫亡遺二子俱幼姑老且病李奉侍
湯藥衣不解帶數年及卒哀毀盡禮力終大事辛苦萬狀撫
子成立現年四十九

劉氏李彬妻年二十三彬亡劉矢志靡他守節四十年同治五
年 旌表

王氏姚玉妻十九歲歸姚事翁姑克盡婦道年二十九玉亡遺

二子俱幼家甚貧矢志苦守冰霜自勵年八十而終

白氏李玉英妻二十歲歸李家貧年二十四夫亡遺子未週歲

白十指謀生撫孤成立守節四十九年壽七十三而終

潘氏劉建基妻庠生綏周之女十七歲歸劉溫婉有淑德夫亡

遺一女號慟欲絕三日殮訖語家人曰吾困矣吾歸卧莫吾

覺也人不之疑遂入室易吉服諸事受理投環自縊天明人

覺而體已冰矣時年二十五

李氏袁萬義妻十七歲歸袁甫三載袁歿遺子週歲家甚貧李

截髮毀容立志堅守女紅自給撫孤成立卒年六十二

郭氏薄登厚妻年二十八夫歿遺子一尚幼郭守節撫孤冰霜

自勵卒年七十二

李氏張宗第妻十八歲歸宗第後因富豪某言出無禮義不辱

投環自縊聞者傷之

尚氏王梅妻年二十二梅亡遺一子方週歲翁姑老尚堅志事

育之死靡他現年七十三

旌表

趙氏張廷祥妻年二十九廷祥歿四子一女室如懸磬趙守節

撫孤冰霜自勵後諸子長家亦裕孫曾繞膝趙年七十七親

見之閭里咸以為苦節之報云

蕭氏張繼康妻年十九歸張忻州賈人也家甚貧由忻之張
皋鎮貿易因聘蕭忠義之女為妻後因久病益致蕭條饑
不繼蕭以鍼黹供晨夕炊經年無倦色繼康竟於同治八年
季冬時病故蕭欲扶柩歸里誓以死殉適夫族弟之皋聲言
家無斗筲勸其服闋他適其父憐其年幼無子欲奪其志蕭
泣不從逼之蕭恐終不免佯為喜色竟乘間投環自縊親族
鄰里賢其節烈於九年十月間賻助偕其夫柩同歸梓里時
年二十二

趙氏劉士奎妻諸生守正之女幼聰敏能讀書識字十七歲歸
劉二十二歲夫亡痛極誓不欲生殮畢入室易吉服刎頸出
血不死家人邏守之趙乘間以手自扶其喉而歿聞者烈之
忻郡生員趙安宅為之作傳

賈氏候選巡檢薛玉奇繼室年二十七夫亡子幼思勤教養備
歷艱辛壽六十七而終同治元年 旌貞潔可風

薛氏胡錦雲妻年十七歸錦雲二十五歲夫卒有遺腹越六月
生子薛矢志守貞孝養翁姑後四載翁姑相繼而歿家益落
以鍼黹度日備嘗艱苦撫子成立現年三十四

趙氏張吉星妻年二十九無所出吉星歿形影巉巉家徒壁立
或勸他適趙矢志柏舟誓死不嫁依其母弟傑終身及歿傑
送歸夫家合葬壽五十八而終

趙氏張德妻年十八歸張翁姑早逝家甚貧年二十四夫亡遺
一子甫四歲趙守節撫孤截髮毀容鍼黹易食至有不舉火
者累日後子漸成立家亦小康壽八十八而終於同治十三
年 旌表

劉氏趙振妻十七歲歸趙家貧姑性嚴以尺寸繩人劉事之能
得歡心年二十八夫亡時翁與姑在堂遺三子二女俱幼劉

矢志守節敬事翁姑以鍼黹奉甘旨後歿哀毀盡禮竭力營
葬夫弟無子氏以己之三子延夫弟嗣奉養周至以終天年
後諸子長皆克家而長子啟昌尤能孝順壽五十九而終同治
十二年 旌表孝慈節義

汪氏王清榮妻年二十九夫亡遺一子彌月一女九歲汪守節
撫孤至於成立現年七十二

樊氏孟師仲妻年二十八師仲歿遺子五歲樊矢志守節撫孤
成立親族贈其節凜冰霜匾額表其門

吳氏郭崇妻年二十六夫歿遺子週歲矢志柏舟誓死不二撫

孤成立現年七十二

陳氏劉蔭民妻年二十七夫歿家貧親老遺子四歲陳茹荼含苦養親撫孤矢志不二四十年如一日同治十二年 旌表

貞潔可風

趙氏姐彥海妻年二十七夫歿守節撫孤備歷艱辛數十年未嘗見齒現年六十四

于氏肖連陞妻年二十五夫亡矢志守節養親撫孤孝慈傳於鄉里內外無間言現年六十五

劉氏霍鈞彥妻年二十六夫歿遺子四歲劉守節撫孤藜藿是

甘冰霜自勵數十年不倦現年八十四

趙氏姐永全妻年二十四夫亡子幼趙守節撫孤矢志不二五十九年矣

劉氏朱貴福妻年二十九夫亡二子俱幼劉守節撫孤甫能成立二子相繼歿遺二孫劉撫之如子及長又俱歿劉復撫其曾孫艱難辛苦備歷三世現年八十三

王氏楊彥榮妻十七歲歸楊事翁姑克盡婦道年二十八夫亡遺二子俱幼王守節撫孤冰霜自勵至老彌謹現年六十三歲

樊氏王光裕妻年十六歸王二十三歲夫亡遺一子未歲樊守節撫孤心堅金石現年六十二

李氏郭大仰妻年二十五夫亡家貧親老子未週歲李矢志苦守奉姑至孝撫子成立嘗以十指度日現年五十三由大同縣學 旌表精白乃心

康氏王道直妻年二十八夫亡矢志守節二十九年現年五十七由籍 旌表

王氏貢生郭鴻珠妻二十九歲夫遺三子俱幼王立志守節撫養諸孤不出中門者幾三十年親鄰罕覩其面現年五十七

薛氏嚴化龍妻年二十七夫歿子六歲矢志守節上奉孀姑下撫孤子克孝克慈人咸稱焉現年五十

李氏張允聖妻十八歲歸張家貧克勤克儉年二十八夫亡遺四子一女俱幼李守節撫孤辛苦備歷男婚女嫁胥賴鍼黹經紀焉現年五十七

武氏劉繼菴妻十九歲歸劉年二十九夫亡矢志守節撫孤成立現年五十五同治十二年 旌表

張氏富永盛妻年二十九夫亡矢志守節撫孤成立現年五十五

李氏牛萬和妻二十八歲萬和歿守節撫孤誓死不二現年五十二

劉氏張近禮妻年十五歸張二十二歲夫亡無所出劉矢志守節誓死不二嗣夫兄子為子盡心撫養過於所生俾克成立現年四十歲同治十二年 旌表

李氏呂士哲妻年二十四夫亡遺子盛周甫二歲李矢志守節撫孤形影相弔年三十九而終

周氏呂士麟妻年二十九夫歿立志苦守冰霜自勵撫孤成立現年五十五

宋氏弓龍威妻十六歲歸弓踰年夫亡無所出宋決志守貞毀容截髮冰霜之操良不愧也嗣夫兄子彥為子盡心撫養甫能成立而宋三十六而終

李氏弓彥妻節婦宋氏媳也十八歲歸彥年二十五夫亡無子家貧或勸他適李矢志柏舟誓死靡他嗣夫從兄子建榮為子撫養成立鄉鄰稱為兩世守節冰雪雙清現年五十五

杜氏范治齋妻年十七于歸二十九夫亡遺二子俱幼家甚貧饔飧不繼茹荼含苦守節撫孤以鍼黹力作餬口艱辛備歷子俱成立現年五十七

王氏馬九霄妻年二十七夫亡遺二子俱幼王守節撫孤堅貞
自矢因夫弟騰霄無子將長子文出繼撫次子章成立克儉
克勤備嘗辛苦壽五十而終

龐氏郝延華妻十六歲歸郝年二十三夫亡姑老家貧遺一子
甫三歲龐矢志守節事孀姑以鍼黹易甘旨一十七年終無
倦色撫孤成立現年五十二

麻氏陳藍妻年十七歸陳二十六陳歿遺二子一女家貧繼姑
欲奪其志麻矢志苦守之死靡他事繼姑曲意承順終於底
豫撫子女成立艱辛備歷難以殫述現年六十二

王氏郭鴻璽妻十七歲于歸事翁姑以孝聞年二十九夫亡遺
子尚幼王守節撫孤經紀家務井井有條現年七十六

張氏劉榮妻十七歲歸張性至孝年二十七夫亡遺子甫週歲
家甚貧父母欲其改適張嚴拒之矢志守節事親撫孤克慈
克孝現年六十五

張氏肖尚通妻幼失明年十七歸尚首二十五歲夫亡遺二子俱
幼四壁蕭然無以自活張忍死以守與族中舂糧澣衣易升
斗以哺二子茹荼含苦備歷艱辛現年五十六二子亦俱成
立

李氏魏榮妻十六歲歸魏二十七歲夫亡家貧子幼李相舟自矢撫子成立家亦小康守節四十餘年現年七十四

李氏張伏士妻性婉淑至孝年二十八夫亡姑老子幼李矢志事育克慈克孝守節五十餘年現年八十一猶健焉

王氏蘭永貞妻家甚貧夫病篤時慮不能存令其身後更適王對夫誓日聲淚俱下及歿王年二十五矢志苦守撫孤成立備嘗艱辛現年五十九

鄧氏冀興印妻十八歲歸冀年二十四夫亡無所出矢志守節之死靡他現年五十二

張氏富世清妻年二十八夫亡時遺一子張守節撫孤心堅金石現年五十二

劉氏李實妻十六歲歸李二十八歲夫亡劉矢志柏舟撫孤成立現年七十二

周氏李有財妻年十七歸李二十二歲李亡遺二子家甚貧李守節撫孤鉞菑力作艱辛備歷冰霜之操老而彌謹現年七十三

劉氏劉德元妻十六歲于歸夫病瘵醫藥罔效語劉曰吾病危在旦夕汝青年且無子必不能守吾歿後待二年而後嫁吾

瞑目矣劉泣曰夫善養之莫吾計也夫病愈幸也倘有不測
誓死以殉已而夫亡劉自盡卒如所言時年一十九聞者哀
之

王氏劉建基妻年二十一夫亡遺子存佑甫三月王守節撫孤
矢志不二而存佑幼卽以孝敬聞王卒年三十七

李氏武建妻年二十八夫亡家貧無子矢志苦守節勵冰霜心
堅金石數十年如一日現年六十一

秦氏蕭仲威妻年二十五夫歿矢志守節仰事俯畜克孝克慈
現年五十八

李氏李聯芳妻十七歲于歸年二十六夫亡矢志柏舟誓死不
二現年五十九

李氏李建榮妻年二十八夫歿二子俱幼矢志守節撫孤成立
現年五十五

李氏張永盛妻二十九歲夫亡遺子三俱幼家素貧李氏茹苦
撫子成立現年六十四

技藝

士君子不為良相則為良醫蓋相變理陰陽以治世醫診視脈症以活人精於醫術則功參造化道合陰陽與相無異理也存心濟物而於物克濟君子兼善淑世其用心如是而已苟因小道而略之不幾湮没人善乎至若僇班之工巧亦足以昭茲來許惜北地邊民魯鈍樸拙精巧寥寥無幾耳

陳孔輝精青囊術在豐售藥活人甚多其子遐昌延昌與孫朝梁朝棟曾孫德福元孫立業均能紹箕裘勿墜濟物利人故歷世匾額林立

張桂林字一枝性落拓不羈有奇才精醫術診脈投劑無不奇效識者目為盧緩復生後誤中烏毒成痼疾俾晝作夜求醫者填闐塞巷至有忍死以待而累日不得一面者人嘗慕其術之精而惜其運之蹇也

劉光裕字象賢平遙人父德元由籍之豐以醫為度日計活人甚衆有隱德光裕生而穎悟讀書過目成誦後家貧親老棄儒學醫精脈理尤神於傷寒症投劑輒效人以為仲景復生其藥價廉且不與貧者較直以故聲名大震遠近求醫踵相接而光裕尤好善樂施凡施衣食放生諸善事至老不倦

壽七十而卒遺子三長照蔡入大同邑序次映蔡性孝友亦
能讀父書析薪克荷人咸稱為三世名醫云



仙釋

虛無寂滅之教清靜鳴高不在聖賢正道之中孔子攻異端
孟子拒楊墨韓子諫佛骨何嘗不嚴辨力闢深惡而痛絕之
但彼隱居山谷煉氣修真亦以靜可延年空可息智自行其
善耳原非欲率天下而爭效之也奈愚夫愚婦聞一雲遊跨
鶴見一卓錫飛鳧遂炫異矜奇競相誇耀甚至披剃棄家而
不自惜斯誠足為世道憂然當今之世羽客縉流不過借此
為衣食之資而且有不可勝言之事問孰是謝絕世故如關
度青牛寺樓白馬書授黃石遊從赤松服氣鍊形不食人間
煙火氣者然則果能修煉歸真不獨非世道憂即可為羽客
縉流法也統計數千百年仙佛遺蹤到處有之吾黨亦存其
意而已概可沒乎哉

國朝

李筐筐陽高縣編筐工也好道術乾隆間棄其業居雲門山
懸雲觀為黃冠子人稱筐筐李師傅逸其名在觀修煉誦道
德經歷寒暑不輟如是者有年忽一日跣趺於山門之西而
逝道徒將委蛻肉身瘞土塔內後住持張永安欲毀塔取土
陶輒修廟工人拆半日土甚堅不可破日晡又拆時有羣蛇

壙聚其上衆皆驚駭莫之敢近事遂寢前有輒浮圖相傳其
弟子示寂處

袁道士不知何許人也道光年間居懸雲觀學道修行常入
定於捨身崖西之古洞行導引胎息法趺坐而化後人繪像
於洞壁至今猶存

藝文

志以徵實辭達而已非如文選文集博採名作彙輯眾體侈
鴻製也雖藝成而下文勝則史似不足取然自班孟堅著漢
書分為十志終以藝文後世經籍藝文志郡縣志載藝文凡
義緣地起可以察政治紀人物覽土俗作志者率仿其體
例以藝文終篇豐鎮雖處邊徼宏篇偉製傳者寥寥而殘碑
斷碣搜羅於荒煙蔓草之中其為學士大夫所記載名人逸
叟所題詠亦間有之茲編所載藝文祇取其事之可法可傳
不計其詞之有工有拙以故或垂古典或傳本末或關國政

或著民風悉以年代挨次稽錄彼浮華靡麗者雖字雕句織
不敢混載也

疏文

請免衛所屯田起科疏略

佟養量

看得雲鎮地處極邊山高風猛種遲霜早南府桃李開謝北地
萌芽纔生則天時不若也腹裏肥膏每畝收糧二三石所謂寸
金寸土雲屬土壤沙磧地價不過二三錢遇雨暘時若之際收
四斗者便稱有年則地利不若也况值逆闖變後繼以水旱不
時復值姜匪兵戈擾攘人民顛沛不惟當事者確知諸王公大

人所親歷而目覩者若再與腹裏州縣同科竊恐加多而並廢其少取盈而反致其虧夫有人斯有財損下即所以益上伏乞
勅部議覆

書啟

丁歸地糧稟啟

嚴慶雲

查丁徭一項自康熙五十一年永免加賦之後渾源額徵民尖各丁銀二千七百一十八兩零嗣於乾隆十年奉文飭議酌歸十分之三仍徵丁銀一千九百三十餘兩此後節奉檄飭率以仍舊為便緣持議者富於大戶不利丁歸遂謂渾源地薄糧重

將丁攤入輸納益艱以致遷就因循久為窮黎之累慶雲於乾隆三十六年履任正當編審之期無業窮丁紛紛告愬細加查察因從前丁多有業之戶或經衰耗逃亡所承之丁即在本戶攤賠甚至人盡戶絕則歸里甲均攤有無業窮民而身賠二三丁者亦有戶大產饒而止輸一丁者間遇外來寄籍之戶五年編審陞插不過數人不足以紓苦累竊思人戶之興衰數年一變土穀出產終古不易與其令無業之丁懸而無著曷若準任土作貢之義輕而易舉與其偏累窮民向隅莫訴曷若均攤業戶辦納尚屬有資約計民糧每兩攤銀二錢三分九釐零屯糧

每兩攤銀七分五釐零合無仰懇俯准丁盡歸糧不但窮黎得以蘇息並訟詞催科亦漸歸簡易矣

碑記

招墾牧廠曠地碑記

威中額

豐鎮東北即蒙古察哈爾正黃旗遊牧地也。南毗連民地者為太僕寺牧廠東自哈檀和碩西自阿魯十八兒太綿長二百餘里寬濶四五十里自乾隆二十年間因水草不均移廠於正藍旗之商都河地方遂爾曠廢於今十餘年矣其間率多膏壤內外農民樂致慕乾隆三十年冬直隸總督方 察哈爾都

統巴 前大中丞彰 仰體

聖天子重農勸稼愛養黎元之至意以廠地荒廢日久召民承墾利濟邊疆合詞具奏特荷

勅部議准復輕其賦稅分別本折徵銀按晦一分四釐納米每頃一石一斗二升一夫授田百畝五頃共成一分如遇交界山溝不足五頃者為畸零地畝時委大員經營區畫膺其任者歸綏觀察長公安前平陽太守今調太原郡徐公浩本郡太守史公奕瓌朔平太守羅公士昂前別駕今陞員外郎朝公璧甯遠別駕五公明阿各委佐貳督同文明共得地二萬三千三百頃有

零以豐鎮甯遠為四號立六十七處村莊並留設村基場圃分
駐專營塘汎隸甯遠者十之二屬豐鎮者居其八山連地接克
資守望之稱碁布星羅允藉稽查之密遂爾通示州邑農民雲
集編號掣籤各歸樂土兩載經籌已云周備第因山原間錯丈
之時未免肥瘠未均是以膏腴之產農民播種爭先磽瘠之區
地戶畏難殿後且有豪強侵佔隸胥隱匿良懦未免向隅今大
中丞蘇來撫三晉首以開墾為生計之本訪得牧地民隱急
切偏枯復委本郡大守史公朔郡大守羅公專督委官履畝清
丈自乾隆戊子夏仲起至秋初告竣共丈得豐鎮所屬除豁除

沙石河灘等地一千二百三頃九十畝可墾地一萬八千七百
七十九頃零正經界以鋤強梁追侵隱以惠窮黎意甚盛也某
荷憲恩以地定繁難缺更司馬謬膺薦擢深切冰淵所當殫心
竭力共効懇誠往來阡陌爰相爰度將各村號細數繪圖勒石
永昭遵守俾家喻戶曉不受欺愚此皆大中丞念切愛民之
惠政又賴兩太守心殷除弊之仁風而某與共任厥事者應州
吳牧炳渾源州魯牧演大同吳令毅陽高石令文秀亦皆克體
憲懷維勤維慎以冀釐定一切者也若夫養民既厚化導為先
職在守土實深統凜所望爾民勤樸務本力農和氣召祥豐年

屢告著休風於新地成美俗於邊疆共享昇平咸歌大有爰為
搦管弁言勒石永誌勿諼是為記

大朔設官紀略

長世圖

粵稽九邊古志自宣鎮陽和至大同平頂山延亘六百餘里俱
順義王任牧之所前代未經附府本

朝統一中外載附版圖其始為察哈爾八旗及太僕寺馬廠地畝
雍正三年以地土閒曠招民墾種隸直隸張家口征納而刑訟
事件未及設有專司嗣後人民日繁事務日多治理不可無官
十三年巡撫覺羅石麟奏請改隸晉省於新平路邊外地名高

廟子設衛守一員得勝路邊外地名衙門口設所守一員隸大
同府管轄殺虎協邊外地名赤不漢契設衛守一員助馬路邊
外地名後營子設所千一員隸朔平府管轄

廷允所請兼錫佳名隸大同府者曰豐川曰鎮甯隸朔平府者曰
甯朔曰懷遠民事始有專責然地界毗連旗境蒙漢雜處界址
易紊姦宄迭生蒙民交涉之件月不絕書衛所漢員言語不通
文字不同難以飭理是年復經巡撫石麟奏准添設理事通判
一員職兼大朔任統衛所綜計其地東至宣鎮張家口南竟大
朔二郡所屬邊牆西抵歸化土默特北連察哈爾西四旗牧廠

凡蒙民交涉案件一併管理而官制新設章程未備乾隆元年
前通判顧世衡因民雜五方事兼蒙漢擬定罪犯輕重不齊鞫
獄異候均無專所乃詳請添建圜圉以處囚禁而司禁尚乏專
員世圖於乾隆十年蒞任即詳請添設司獄一員此設官命職
之所自昉也查府州縣邑各有志乘綜紀巔末以垂永久各邊
官制分設已逾十載而署牘未存深恐久而漫滅因取其梗概
題記姓字以備後賢採覽焉

創脩壩堰碑記

張 晶 崞縣
庠生

聞嘗考山川覽圖記而知豐府天下名區也其城東林木秀美
清流激湍景物尤佳 關帝廟及國之倉廩在焉車馬輻輳遊
人往來於其間者固通衢也邇來河水泛溢隄防傾隕又近逼
廟宇之側太府之藏豈特跋涉艱難而已哉然事非猝興工難
遽竣非力倡大義者不能修也伏維同知 松俯仰左右顧而
傷之於是樂施募化鑿石修隄栽種樹株向之泛溢者自此慶
安瀾焉夫急公奉上小民之情也興利除害長吏之事也嗣後
壅塞謹而倉無朽蠹之虞水潦備而神享安止之吉彼車馳轂
擊往來其間有不望汪洋而欣利濟者乎因為詳其始末述其
繕修之事使知居民有安瀾之慶者皆長吏之德也

創修純陽閣碑記

松 祿

嘗稽載籍 呂祖之於世靈應至矣觸處皆通求則必得時而
調和風雨時而澤徧天下錫福士民厥功豈不偉哉 予於辛巳
秋來守斯郡即欲廟祀以邀庇其民而簿書鞅掌未愜所願今
適初夏雨澤愆期民心震恐 予虔心默禱曰如賴夫呂祖之仙
靈而得生民之甘雨 予即建祠以報也自禱之後雨滂沱而田
暢茂四野遂歡聲矣 予倡言創修和者如一先捐己俸後藉眾
擎乃相地於大王廟之東南隅既除既治爰為呂祖閣一閣下
為亭二為坊一院內腰亭二為厨室二又因大王寢宮左右有

耳屋三間改為保嬰娘廟一增福財神廟一功既竣於廟前海
灘復修以路及廟中匾額對聯桌几器用無不備制庶足以壯
觀瞻而答靈庥也夫是役也功程浩大未能不日成之經始於
四月初旬落成於十月下澣既勞商吏監造之心又賴士民資
助之力安可不鐫珉以紀之

重修城隍廟碑記

松 祿

吾豐城隍廟者豐人瞻仰之所也始於乾隆三十七年創修至
今五十六載矣靈應非常居民有求必應焉上年瘟疫流行 予
率民祈禳之瘟遂止焉其靈應即此可得而知矣然年代綿遠

旁風上雨不免摧殘穴鼠瓦雀不無褻瀆闔城士民咸憾焉以
為神之福人也如彼而廟之頽圯也如此非所以酬神安民也
於是會議重修豐之居民咸鼓舞歡欣以成厥事經始於四月
初旬落成於七月下澣凡廟內廟外傾者立之欹者正之朽者
易之漶漫者丹雘之不貪大不拘小不奢不陋仍舊為新足展
祀事按其中正也大殿三楹所位城隍東西廊楹所列十司神
鬼又東西二楹所分祀土地等神殿之後寢宮三楹旁之兩廡
所列城隍女使名位以及正殿之前左右小院二所東以致齊
西以省牲又廟門馬殿東西樂樓一為鐘一為鼓他如石獅旗
杆戲臺牌匾之屬無不煥然改觀既又運石以甃廟前之洋溝
分金以修廟東之公館美哉洋洋乎斯亦極豐城之大觀矣因
而豐之士民念董事之勤苦信士之樂施與夫神之靈應功之
浩大僉曰是不可以不誌也欲請予以記其梗概勒於石辭不
獲已予謂明有禮樂幽有鬼神司教化者所以盡心也城隍保
障一方設廟致祭天下郡縣自前代以及我朝敬祀備至誠
以賞善罰惡洞如帝天也今修葺而祀之者當視為善善惡惡
之地不可幸為祈福免禍之所徧告豐人於是為記

重修關帝廟碑記

徐在魁大同
歲貢

揆文奮武立德不廢立功八極九州易名何曾易地如雲中為
冀北之古郡而豐鎮在大同之北百里人民安堵其統為北冀也
明矣大帝為山西之聖人而顯威於嘉峪以西一時暴逆伏誅
是佑彼西域也神矣至浩氣兼吞吳魏大義克配春秋靈應妙
於天工士庶隆其廟貌無容贅矣乃歲月遞遷精彩宜煥於是
捐辦糾理殿宇則金碧輝煌牌坊亦丹堊燦灼東西廡溯當年
之仁勇鐘鼓樓振此日之聾盲山門過殿出入應效其步越照
壁圍牆瞻依弗離乎包與娘娘廟拜禮者均歌繁衍財神廟禱
求者共荷豐盈且杜房咸與維新足備沐浴而齋戒樂樓重加

修飾無間絲竹之賡颺斯固吾豐之盛舉而以饗以祀以妥以
侑傳之億萬世而不能忘也謹鐫於石以為繼興者之鑒

創置義塚碑記

劉正寰 濟甯
廩生

嘗思樂善者君子之心好施者仁人之志是以散貨財以濟孤
苦鄉里傳芬措衣食以周飢寒道途感德大施小捨俱見仁心
哀死憐生同歸善念然小捨則人之受恩有限大施則人之被
澤無窮憐生者或有望報之心哀死者並無居功之念義塚之
設善無量矣人鮮及矣 恒公蒞任斯土軫念生民推恩枯骨
因思豐屬之地人民輻輳商賈充盈或家無稍積一抔之薄土

未營或客死他鄉千里之遺骸誰寄秋風夜雨每多無依之魂
蔓草荒煙時有不瘞之骨爰啟仁心興茲善舉擇於城西南之
留雲窻邨東南灘地建置義塚一所計地一項一十畝立石為
界樹碑作記男女攸分次序不紊自今以往庶無力營葬者不
致暴露而興嗟即有時遷葬者亦不至渺茫而莫辨矣謂非德
政之一端乎爰誌其地而述其由並勒諸石以垂不朽云

新建財神廟碑記

賀九疇 壬戌
副貢

且人有意所欲為而未能竟遂其意者有禮所當為而未能竟
合乎禮者此事之所以貴審時尤貴度勢也即如我豐自乾隆
八年始建關帝廟而財神廟即附於正殿之西由來久矣或
有以無專祠譏其不恭者然想當日位置之意雖屬牽就蓋亦
限於時勢之無奈故不得不因陋就簡使人不至於舉典亡經
耳神果有靈能無怨乎迄於今開疆拓地幅幘日闢物阜民康
雖偏陬僻壤可稱極盛之區微神之力何以富足若此倘仍舊
制甚非所以崇享祀而肅觀瞻也爰糾眾公議謂城隍廟之東
有官地一所宜建財神廟一倡百和莫不踴躍遂建正殿三楹
而金庫銀庫附於旁山門三楹而鐘樓鼓樓列於側東西禪房
各五楹鑿聚寶盆於院之中是工也起於甲戌之春於光緒二

年夏告竣其輪奐之美煥然一新不必多贅而睹廟貌之森嚴
悉動虔誠之念仰聲靈之赫濯俱無怠慢之容由是濬財之源
疏財之流俾寶藏興於闡闡福星聚於閭閻深恩厚澤其感應
不更有甚於往日者哉爰修俚語以誌其不朽云爾

豐鎮廳志卷之

豐鎮廳同知德溥纂輯

藝文

漢樂府

瑟調曲

飲馬長城窟行

長城下有泉窟可以飲馬
戰士遠行之苦始於此

青青河畔草
絲絲思遠道
遠道不可思
夙昔夢見之
夢見在我傍
忽覺在他鄉
他鄉各異縣
展轉不可見
枯桑知天風
海水知天寒
入門各自媚
誰肯相為言
客從遠方來
遺我雙鯉魚
呼童烹

鯉魚中有尺素書
長跪讀素書
書中竟何如上言
加餐食下言

長相憶

國朝古樂府

長城謠

宋梅

噫吁嘻乎此長城
列嶽埤垸高崢嶸
臨洮首役遼陽訖
絲亘屈曲萬里程
蒙其當日興
建築黔黎性命鴻
毛輕
孀人之妻
孤人子
四野嗷嗷聞哭聲
哭聲動地哀欲絕
荆風凜冽城為崩
紫塞屹立中外控
祖龍慘淡經營成
輜輶車雜鮑魚載
海內逐鹿紛縱橫
金湯在德不在險
一語千秋足定評
噫吁嘻乎此長城

五言古詩

梁

詠霍將軍北伐

虞羲

擁旄為大將汗馬出長城
 長城地勢險萬里與雲平
 涼秋八月鐵馬入幽并
 飛狐白日晚瀚海愁雲生
 羽書時斷絕刁斗晝
 夜驚乘墉揮寶劍蔽日引高旌
 雲屯七萃士魚麗六郡兵
 哀笳關下聽玉笛隴頭鳴
 先聲鋒自誓三捷燧無驚
 玉門罷斥埃甲第始修營
 位登萬庾積功立百行
 成天長地自久人道有虧盈
 未窮激楚樂已見高臺傾
 當今麟閣上千載有雄名

唐

飲馬長城窟行

山西通志載唐太宗飲馬於龍泉寺

太宗

塞外悲風切交河冰已結
 瀚海百重波山陰千里雪
 迥戍危烽火層巒引高節
 悠然卷旆旌飲馬出長城
 寒沙迷騎迹朔吹斷雁聲
 烽塵清玉塞羌笛韻金鉦
 絕漠干戈戢車徒振原隰
 都尉返龍堆將軍旋馬邑
 揚麾氛霧靜紀石功名立
 荒徼一征衣靈臺凱歌入
 高節胡塵清玉塞將軍旋馬邑
 二十字疑唐時立石

飲馬長城窟

釋子蘭

遊客長城下飲馬長城窟
 馬嘶聞水腥為浸征人骨
 豈不是流

泉終不成潺湲洗盡骨上土不洗骨上冤骨若不沉水四海有
還魄空流嗚咽聲聲中疑是咽

出塞曲

劉濟

將軍在重圍音信絕不通羽書如流星飛入甘泉宮倚是并州
兒少年心膽雄一朝隨名募百戰爭王公去年桑乾北今年桑
乾東死是征人死功是將軍功羸馬牧秋月疲兵卧霜風仍聞
左賢王更欲向雲中

塞上曲

常建

翩翩雲中使來問太原卒百戰苦不歸刀頭怨秋月塞雲隨陣

落寒日傍城沒城下有寡妻哀哀哭枯骨

塞下曲

常建

黃雲鴈門郡日暮風沙裏千騎黑貂裘皆稱羽林子金笳吹朔
雪鐵馬嘶雲水帳下飲葡萄平生寸心是

前出塞曲

杜甫

挽弓當挽強用箭當用長射人先射馬擒賊先擒王殺人亦有
限列國自有疆苟能制侵陵豈在多殺傷

後出塞曲

杜甫

朝進東門營暮上河陽橋落日照大旗馬鳴風蕭蕭平沙列萬

幕部伍各見招中天懸明月令嚴夜寂寥悲茄數聲動壯士慘
不驕借問大將誰恐是霍嫖姚

塞上逢盧全

劉又

直到秦乾北逢君夜不眠上樓腰脚健懷土眼睛穿斗柄寒垂
地河流凍徹天羈魂泣相向何事有詩篇

代北言懷

喻坦之

困馬榆關北那堪落景催路行沙不絕風與雪兼來草得春猶
白鴻侵夏始迴行人莫遠入戍角有餘哀

登單于臺

李士元

悔上層樓望翻成極目愁路沿蔥嶺去河背玉關流馬散眠沙
磧兵閑倚戍樓斜陽三會角吹白旅人頭

宋

李牧

司馬光

椎牛饗壯士拔距養奇才塞馬方驚避秦兵已闌來旌旗移幕
府荆棘蔓叢臺部曲依稀在猶能話郭開

金

古長城

李愈

秦築萬里城保祚迄蟠際阿房赤炬炎亡秦維二世勿謂約椽

愚千秋資控制

元

秦長城

陳孚

驅車出長城飲馬長城窟朔雲黃浩浩萬里見秋鵲白骨渺何處北風卷寒沙蒙公劍下血化作川上花祖龍一何愚社稷付征杆長城土未乾秦宮已焦土千載不可問似聞鬼夜哭矯首武陵源紅霞滿川谷

望李陵臺

柳貫

平沙北流水青山在其上李陵思鄉臺駐馬一西向草根舍餘

淒峰尖入寒望俚言雖莫稽陳迹尚可訪想其深入初步卒亦材壯手掌天子威氣奪名王帳覆車陷邊塵此志迺大妄一為情愛牽皇恤身名喪縷縷中郎書挽使同跌踴安知臣節恭之死不易諒河梁執別處出語謾惆悵家聲故煇赫三世漢飛將兵法有死生人運迭休旺忠回在信史豈沒功罪狀馬遷當腐刑強欲雪其謗土思豈能無層雲塞亭障千載麒麟圖吾將執元覽

七言古詩

金

并州少年行

元好問

北風動地起天際浮雲多登高一長嘯逸瀨層霄摩我欲橫江
鬪蛟鼉萬弩迸射陽侯波或當大獵燕趙間黃熊朱豹皆遮羅
男兒萬馬隨搗訶朝發細柳莫朝那埽雲黑山布陽和歸來明
堂見天子黃金橫帶冠我我人生只作張騫傅介子遠勝僵死
空山何君不見并州少年夜枕戈破屋耿耿天垂河欲眠不眠
淚滂沱著鞭忽記劉越石拔劍起舞鷄鳴歌東方未明兮奈夜
明何

修邊謠

尹耕

去年修邊君莫喜雪作邊牆牆下水今年修邊君莫憂石作邊
牆牆上頭邊牆上頭多凍雀侵曉霜明星漸落人生誰不念妻
孥畏此營門雙畫角

樂耕行

蔡天祐

君不見農家百畝田號為青銅海祖孫世相守此樂不更改春
來下種先深耕牽牛拽犁布穀鳴土膏脈起人易墾雖用人力
猶為輕南方水田尤異此男女手足多胼胝橫斜深栽插秧齊
儂歌互答真可喜四月五月雨水勻高田下田如綠雲根著已

艾佳未長物色生態殊欣欣後苑之東地如掌繁華正好恣心
賞如何甘作稼穡場要與太古同擊壤造化育物同吾心盛德
大業昭森森果然有相存乎我天人一理堪推尋詩書之暇來
田畝召彼農夫與田叟較晴雨課細商評此輩誰知調燮手吾王
上念中興功欲佐天子問年豐同與小民荷帝力晴煙淡霧優
游中豐年上瑞本無價帝力謳歌通大夏始知樂耕樂無窮更
將此樂普天下

五言律詩

北周

關山月

司空王 襄 臨沂人

關山夜月明秋色照孤城影虧同漢陣輪滿逐胡兵天寒光轉
白風多暈欲生寄言亭上吏遊客解雞鳴

早登興和

金幼孜

未曉戒嚴程鳴弓度塞城川雲隨地起野火雜星明虎旅聽笳
動鑿旗傍蹕行草青沙路軟渾覺馬蹏輕

塞上喜秋稔

翟鵬

雷嶂稱天險霓旌滿路光驛通三晉遠城鎖五原長雞田飛雪

冷燕麥引風香邊事封初定家家泛羽觴

七言律詩

望雲中塞

謝榛

幾年欲向塞門遊北度桑乾重旅愁
畫角悲涼孤館夜黃榆搖落九邊秋
壯心未擲班生筆浪迹堪憐季子裘
回首江湖任鷗鳥漫嗟華髮滯燕州

附

豐川行

王楨

滄海桑田幾更變河山猶是舊真面
近年邊地果如何荒域業已成芳甸
我來豐川訪古封晉魏事業杳無蹤
元山傳是唐人寨曰周曰薛誰適從
事業欲向東流問空留古蹟餘風韻
英雄割據今已矣先民曷嘗爭聲聞
長城夜月白如銀不見當年牧馬人
幸際五原兵革埽編氓共樂太平春
行人莫道黃雲戍民居鱗密如碁布
文教蒸蒸日上苞桑萬載金湯固

藝文詩補

黃旗草地晚行即景

同承章

紅日已沈西四圍山色晏車行轆轤聲驚起一羣鴈

明月清風店

明月原無月清風卻有風黃沙俱一樣飛起蔽長空

花臺在三瑞里民居院內見用帶草泥坯壘作花臺野意扶蘇青葱可愛因吟一律以誌

嫩草連泥取將來壘作臺四圍清似水一片綠如苔雅可供詩句情能動酒盃誰知村僻地卻有化工才

民風

生來儉省迥非凡肉食居家禁最嚴此地民風真可慕羨他男女不貪饒

石元山

英雄初遇李王時百萬貔貅聽指麾遺跡於今古井在山頭不見樹牙旗

新雨初霽

四面參差疊翠巒停車一望眼光寬而今頗得居官趣無限雲山任飽看

細雨霏霏灑道途禾苗滋潤一塵無歡歌知是農家樂今歲秋

來賦易翰

即時有感

凍地消融四月初者纔耕種動犁鋤西瓜熟在中秋後沁齒寒
涼冰不如

遊大王廟

纔一登高眼便清遠山泉水自洄潑平鋪隴陌青無際遠疊峯
巒翠有情北望川原多毳幕南瞻高下見邊城沙荒地亦隨時
化到處煙村雅趣生

紅旗草地遇雪

北風蕭瑟雪如銀蕩蕩乾坤絕點塵有興吟詩權勒馬無村沽
酒莫停輪連天素影千峯靜巾地清光一片新恍若玻璃成世
界寒涼且耐賞觀頻

海留素太阻雨悶坐

悶坐茅簷有所思簾前細細雨如絲一官縈絆難尋樂百事纏
綿懶賦詩蒙職惟知貪利賂刁民不解感恩慈為人作嫁真堪
笑勞碌奔忙到幾時

附

周德威屯兵處

范大元

昔日屯兵處蒼蒼亂石橫如今風雨夜猶作戰場聲

石牛

牛石鎮東門尋常帶水痕牧童何處去千古卧黃昏

馬射臺

臺古惟遺址猶傳馬射名當時征戰地剩有暮雲橫

長城

騎虜昔難平秦牆紫塞橫輿圖今萬里不必限長城

喇嘛洞

洞裏人何在尋來總未逢石牀高卧處祇有綠苔封

鴛鴦河

河本無情者緣何兩兩投鴛鴦愁別苦不遣水分流

石牛

張鳳翔

何日化為牛寥寥曠代留怪他心不轉空向水東流

牛心獨秀

孤峯高秀處羅列少兒孫賸有雲霞繞氤氳接遠村

昭君出塞

范大元

一去紫臺前飄飄宛似仙琵琶辭漢闕環佩入胡天馬上風偏冷關頭月自圓黃金如許贖書寄鴈雲邊

塞下曲

漢將出天山單于夜遁還陣開雲乍密弓滿月初彎曉騎隨金鼓春風度玉關可憐魂夢裏猶自弄刀環

其二

日落大旗飄天山一望遙三軍傳夜柝諸將射飛鷗馬飲長城窟笳吹萬里橋樓蘭何日斬戎役罷嫖姚

五巖圖古剎屯雲

山寺何年造高峯卓不羣懸巖晴暮雨古殿宿秋雲座易薰香靄檐難透夕曛尋幽臨絕頂身世入氤氳

大海灘登孤山有感

雲重壓三邊登高望遠天山頭埋暮雨林角挂秋烟大漠龍蟠塞長城馬飲泉古來征戰地滄海幾桑田

清涼山風洞相傳此洞與天鎮縣風神山洞相通

古洞通天鎮雲山歷幾程峯眉描柳色谷口咽風聲境邃龍眠穩林深虎嘯生乘時能破浪萬里寄豪情

鴛鴦河

張鳳翔

本是雙飛鳥緣何此錫名應同珠合浦不異玉連城瀉出青無際翻來碧有情漫愁離別苦常伴水洄瀾

五巖圖龍泉降雨

王瑞菴

造化從來結構奇，懸巖石磴瀉漣漪。
神龍本是非常物，旱禱甘霖四野施。

奇峯獨聳卽猴兒山

何處飛來此一峯，嶄然天外碧芙蓉。
巉巖莫謂恒山峻，超過恒山又幾重。

海樓夜月

張鳳翔

星移斗轉夜初晴，氣象應知畫不成。
祇有多情天上月，送來光彩總無聲。

牛心獨秀

孤峯突兀秀無倫，添得豐川物色新。
儻有仙人能引路，應教舉手摘星辰。

馬脊雙流

岩崑天外似昂頭，神駿從來畫不侔。
萬里浮嵐雲拱向，兩灣滴翠水爭流。

青山寶藏

范大元

珊瑚鐵網水中懸，誰料青山玉種田。
雪裏瓊飛冬嶺上，雨餘珠落夏雲邊。
璇懷春浦川俱媚，圭蘊秋峯月亦圓。
更有晴霞留晚

照峯紫氣接長天

又

休言荆璞最難求
寶藏從來此地留
明月影沈光不夜
碧霞精斂氣橫秋
稜如琥珀鋒鋒利
色比雲英靄靄浮
想是媧皇遺五色
補天曾補大羅不

碧海風濤

輕寒獵獵逼西風
萬頃波濤湧碧空
突起鼇山翻雪白
倒懸烏日射天紅
玻璃世界真仙境
瓊玉峯巒似化工
彷彿靈昏迴八月
雲垂海立闔門東

又

果然海上有三山
莫謂虛無縹緲間
一陣黑風來朔漠
千層白浪起峯巒
雲騰神馬來飄忽
壁峭靈鼇駕往還
蓬島漫言修不到
而今蓬島在塵寰

雲門古洞

仙師何日去雲門
洞口遺蹤尚有痕
丹訣不曾留朔漠
梵音猶自響黃昏
白雲地僻封幽境
紅葉秋深認遠村
徧訪空山人不見
蒲團導引共誰論

又

洞門寂寂水潺潺雲去雲來任往還
碧蘚無情埋古跡綠陰何事鎖禪關
龍盤寺塔秋燈暗鹿擾僧廚落葉間
此境從來人罕到到來能使俗塵刪

煙浦靈泉

石元山下海樓前尋得豐川第一泉
夜靜浮沈邊塞月朝晴呼吸滿城煙
龍蛇有感隨萍出鷗鷺忘情傍石眠
莫謂荒陬無勝地此中靈異已多年

又

依依垂柳覆重淵一勺能參造化權
礎待靈根三尺潤瓶添仙露十分圓
幾經酷暑炎風日倏作翻雲覆雨天
自有甘泉神廟祀邊城無歲不逢年

牛心獨秀

牛心山下水涓涓高卧重霄不計年
林角觸時青覆地峯頭昂處碧摩天
泉微靜喘雲邊月壁峭難耕隴上煙
自放桃林歸未得牧童村指杏花巔

又

環豐林壑景偏幽突兀牛心據上游
雨後晚霞留一角朝來晴翠豁雙眸
削成峭壁孤峯出望到齊煙九點浮
幾度振衣看直

上最高登處好回頭

馬脊雙流

山如馬脊最為奇
兩水分流左右宜
蹄沒麥苗新雨候
鞭垂楊柳暮煙時
沒濃屏嶂皆成畫
高下人家並入詩
更上嶺頭攀石磴
何人遊騎忘歸期

又

龍盤虎踞鎮雄邊
馬脊園林別有天
水到合流歸野浦
山因高聳跨炊煙
碧溪春暖紅塵外
金勒風嘶紫陌前
回憶永和修禊事
蘭亭觴詠敘當年

海樓夜月

蓬萊仙境石橋頭
晚景登臨記勝遊
雲淨邊城山過雨
天空古寺月橫秋
煙叢絮白煙中樹
水底燈紅水上樓
夜半倚闌頻領略
高歌宜唱小瀛洲

又

盈城車馬厭喧闐
能隔紅塵地亦仙
數里孤峯雲外寺
一輪皓月水中天
波平綠送東園樹
風定青來北郭煙
無限詩情何處著
夜闌泉響聽涓涓

山寺朝霞

山寺樓臺近碧空，晴明風景望無窮。
遠山遙送千重翠，旭日初臨一點紅。
河抱曉光來塞北，樹含秋色入園東。
倚闌最是宜人處，萬丈飛霞射彩虹。

又

雞聲纔動曙光寒，鳥語時聞夜色闌。
紅到僧窗花欲放，白生禪室月將殘。
依山煙樹全然火，滿寺樓臺半染丹。
萬里朝霞晴出海，東來紫氣日三竿。

西閣晚晴

晚來登閣雨初晴，西望人家入畫屏。
日色漸分鴉背紫，山光遙送馬頭青。
虹垂樹挂絲千縷，鷺下風翻雪一汀。
萬丈落霞紅未了，盈城燈火點星星。

又

登臨宜雨復宜煙，晚景新晴別有天。
捲去濃雲山外擁，送來斜日水中懸。
秋高黃葉家家樹，春暮青疇隴隴田。
最是冬來多積雪，數峯了了夕陽邊。

南樓秋曉

姚升聞

邊城風景似中州，曙色登臨最上頭。
萬戶有雞皆報曉，四圍無樹不含秋。
東園場圃全依水，北郭人家半住樓。
塞外輿圖何日

關甘棠誰與樹荒陬

龍口垂涎

劉映藜

神物何緣下九天
空山蜿蜒幾多年
來從風雨滄溟外
瀉出珠璣碧落邊
白練常飛千尺雲
青山劃破萬重煙
他時儻若從雲去
應普甘霖徧陌阡

咏壩道

劉昕

雄山直欲與天齊
野店荒村望裏迷
車走雷霆坡上下
雲翻嶺東西
泉飛萬丈峯頭挂
雪積千層月額低
此道崎嶇何日關
到來時聽馬聲嘶

雲門古洞

張鳳翔

漫言邊外少名山
認得蓬萊在此間
古洞不嫌青靄障
閒門常向白雲關
鹿馴幽澗頻來去
鳥入深林任往還
無怪當年多羽客
而今人到俗塵刪

煙浦靈泉

吳宗周

煙浦微茫古剎前
清泉不竭水涓涓
流來畫本無雙地
瀉出豐川別一天
雲霧釀成三日雨
波瀾溉徧四圍田
會看人慶豐年樂
靈異能參造化權

南樓秋曉

王楨

晨迎曉日快登樓遠近山河一望收
峯淨東南鳥欲曙天空西
北鴈橫秋環城木黍連雲密
接地煙霞映日流縱目凭欄俱入
畫新晴靄霧不曾留

西閣晚晴

淋漓好雨快初晴返照偏宜此閣迎
一抹煙霞紅入畫半隄楊柳碧
連城遙天鷺影飛飛白近郭泉聲
滴滴清漫道黃昏光不久黃昏最足
釣詩情

薛剛寨

峯頭古寨舊遺痕唐將聲名今尚存
馬道半留馳射跡陣雲無復戰兵屯
英雄堪壯河山色姓字空傳父老言
嶺外夕陽迴照處寒流日夜聽潺湲

北海騰蛟

王瑞菴

破浪翻濤大海中蛟龍吞吐氣如虹
昂頭易撼波心月掉尾能生水
面風更有山巒排左右儘多雲霧繞
西東知君不是尋常物直與鯢魚變
化同

光緒壬寅荷月中澣長白裕島山自署者藉園

